

NAIT O ...

(Ka kot parom ion PNAR)

A Novel in PNAR

by

D. R. Michael Luam

NAIT O ...

(Ka kot parom ionj PNAR)

Da u D. R. Maikhæl Buam

This is an original work of fiction in Pnar.

Kani ka parom toh kawa mutdur don hi da u nonthoh na
ki jinjia wa da tip wei wachem u.

© 2012, D. R. Michael Buam.

Email: drmbuam@gmail.com, ☎ : +91 9612389453

Published by Mrs. Joptimon Dkhar for TechLife.

TechLife



TechLife

Kiang Nangbah Road, lawmusiang, Jwai,
Jaintia Hills, Meghalaya, India - 793150.

☎ : +91 9774029693, 8014910431

Email: techlife.jwai@gmail.com

© All text copyleft for non-profit purposes.

Layout and Design by DENISILIA DIGITAL LAB, Jwai.

Front cover image – *Taxus baccata* (Kseh Blei)

Back cover image – *Potentilla fulgens* (Lynñiang, Wathāñ)

Printed at:

Don Bosco Press

Shillong, Meghalaya, India - 793003.

Minimum Retail Price (MRP): ₹ 100.00



© 2012, D. R. Michael Buam.

The texts in this book are **copyleft**. The author and publisher permit others to copy, distribute, display, quote, and create derivative works based upon them in print and electronic format for any non-commercial, non-profit purposes, on the conditions that the original author is credited, "NAIT O..." is cited as a source, and the work is reproduced in the spirit of the original. The author and publisher would like to be informed of any copies produced.

Reproduction of the texts for commercial purposes is prohibited without express permission from the author and publisher. All works produced for both commercial and non-commercial purposes must give similar rights and reproduce the copyleft clause within the publication.

© The artwork and photograph on the cover page of this book are **copyright** of the respective artist and photographer, and may not be reproduced without permission.

Any profits from the sale of this book will be contributed to DENISILIA FOUNDATION a non-profit aimed at promotion of Jaintia culture, tradition and literature.

Acknowledgements

At the very outset, I acknowledge God's grace for making this dream come true. I am also indebted to my father, (Late) Denis Dkhar and my mother, Sumer Sisilia Buam for igniting in me the desire for knowledge and learning at an early age.

It would be near impossible for me to mention the names of all those who have contributed in the process of writing this book; so, I will mention a few at the risk of offending others.


Being a Var-Jaintia by birth, my association with the Pnar people, with whom I'm constantly in touch with, particularly, my wife, Mrs. Joptimon Dkhar, and friends, Mr. Riquoma Rq Laloo, Mr. R. Konel Phira, Mr. Sajeki Passah and many others have enriched my Pnar vocabulary and emboldened me to write this novel in Pnar.

I also put on record the guidance I received from Dr. B. Myrboh, Dr. B. Kharbuli, Dr. H. Kayang, Dr. Don Syiem and Dr. B. S. Khongwir and all my colleagues at North Eastern Biodiversity Research Cell, NEHU. The experience I gained there helped me in writing this book.

The support and 'ego massage' given by friends and relatives has always reaffirmed my faith in myself and goaded me. Thank you Ioannis Thamar, Samson Pohthmi, Blassius Buam, J. Joseph Buam, K. S. Lyngdoh, Rimiki Ksoo, E Nangbah, S. Kharpuri and others.

I am deeply grateful to the efforts of Mr. S. Q. Sumer, Mr. Riquoma Rq Laloo and Mr. Ioannis Thamar for proofreading the manuscripts and enriching the novel with their suggestions. Any flaws in this book are mine.

Thank You all. Chihajarjōh.



(D. R. Michael Buam)

Chi kyntien

Kat nan puræ o ïa kani ka Parom wa thoh wa pynbait da u Ma D. R. Maikhæl Buam, u khynrō na ka thaiñ Ri War Jaintia, kattæ nan pynsakhiat ko ïei nait o, wa "U Bru næ Kā Bru wēm dam ki u chynthut næ takhōh hei manbru lonbru ïon ki wow khyrnjat wow on ki "Nait o!"

Kamtæ, kyntu o ïa waroh wow puræ ïa kani ka kot Parom wada pynchon pynthiah bha da u nonthoh sarin pa sarin, ïa waroh i wa "Tip, wa ïō, wachem u" iwa em ki nonrim wa sakhiat ha ka.

Khublei.

Chihajarjōh.



(S. Q. Sumer)

**I Pynwandur İa Ki
DAK THOH NÆ PURÆ
Hei İonpnar
(Da chim na ka kot wa thoh da u
waheh Riquoma Rq Laloo)**

a ā b k ch d e ē æ ŋ h i ĭ j l
m n ñ ŋ o ō p r s t u ũ w y

**Ki nuksa İong ki dak wa pynpsiah
thymme:**

ā - kām; Rām; Sahnām; İām.

ch - chān; chdōh; chukor; chkæh.

æ - æ; tæ; puræ; slæk; chakæ.

ē - slēiñ, kēiñ, wēiñ.

ŋ - ŋa; ŋait; ŋam; ŋiah; ŋiat.

ŋ - ŋia; ŋiaw; ŋiām; sŋiaw; ŋianŋon.

ō - thōh; ō wow da; sōm; dōh.

ũ - ũ ē; ũ lai; ũ dam; ũ on; ũ khana.

Harōd kawi ka chnoŋ kawa pyrtuit Mōlaiñ, nei lian mihsŋi, em kawi ka khlō. Harōd itæ i khlō, em kawi ka par mō-ïoŋ. Heitæ em lē nŋt ki bru wa thāp mō-ïoŋ ha ka Shaktiman.

Hajan itæ, em iwi i krem mōïoŋ wa khian. Na itæ i krem mō-ïoŋ, mih uwi u khynnah wa daŋ 13 snem i r'ta deiwa patah ïa ka synduk deiñ wakhian wa dap mō-ïoŋ.

Uni u khynnah, uwa tip ki bru kām u Lamchwa næ, em u i riam wa jæt wa tŋit. Manda mih u na krem, li theh u utæ u mō-ïoŋ harōd, heiwa da em chwa i wa da theh u, tæ li choŋ u hajan ka muna u kawa em pyn hajan itæ i krem. Na katae ka muna, sai u ïa ka kot ïoŋ ō kawa ē u pa'u ïa ō. Kani ka kot toh ka **'Model English Translation'**.

Jōh hikai u pa'u ïa ō ha iuŋ, kammon u puræ wow thoh mynda ioh por u. U pa'u leh u wa tip hi u puræ wow thoh khajak khajak; kwah u leh u pynstad ïa ki khon, taŋ du nei daw wa ban ka dōh, ũ ioh u, u pynlai skur iow Lamchwa.

Choŋ noh u Lamchwa heitæ i thaw tæ pyllai jŋmut bha u hei wa khreh ïa katae ka kot. Katwa daŋ puræ u ïa kani ka kot, phōh i khmut i khmat u dei wa sōhrkhai.

NAIT O...

U Lamchwa toh u khynnah uwa chalak wa buit; uwa thraṅ ṛei stad. Kwah bha u, u lai skur, kamwa lai kiwi ki khynnah. Taṅwa, du neidaw wa dōh ka ṛuṅ ka sem, ũ ioh ka bei-u pa u, u pynlai skur ṛa ō nei por daṅ khian u. Taṅwa ki diah u pyn-arṅut ki, ioh ki u lai puræ ha ka skur kawa em ha chnoṅ ki.

Kamtæ, ō, ṛarap khih u wow pa'u katcha wa lai u. Em ki sṅi li mylla mait deiṅ ki cha khlō ki bru. Hei por thuṅ-kba-ah-kba, li mylla rep ki cha pynthor-hali ki bru. Kam ynne ka sṅi wan, mylla tih mō-iōṅ ki ha ka par uwi u malik.

Katwa naṅlai ki por, ha pyrdi itæ i khrehkot iōṅ ō, sṅiaw . u ṛei wa sawa 'rrrrrrmmmm! rrrrrmmmm! uuuurrrrrr! bbbhhhhppp!'. Khyr-uiṅ u cheitæ wa ky'an wa sawa tæ kba i u dei wa khyrṅiat, "Pa! Pa!"

Ṽeiṅ u joit na wa choṅ tæ phet u cha khmut itæ i krem mō-iōṅ. Heitæ iō u wa da chah kset kataæ ka krem dei khyndaw wei mō. U pa iōṅ ō, u ma Rianṅ wa daṅ tih mō-iōṅ hapoh itæ i krem da sah kut u heitæ! U Lamchwa dem u heitæ tæ khloh u ṛeitæ i khyndaw i mō da ki kti iōṅ ō deiwa ṛām khyrṅaṅ, "Pa! hu-hu-hu! Pa!"

Ki bru wa thāp mō-iōṅ leh da poi ki heitæ. Ki leh da sṅiaw ki ṛei jōh i sawa wei wa iō ki leh ṛei wa phet u Lamchwa cha krem dei wa ṛām. Uwi na kitæ chim u

NAIT O...

ia u Lamchwa na kti tæ oŋ u. "Ileh doŋ ?"

U Lamchwa, khlem tip de u klam dei wa che, dei iām khyrŋaŋ wei kdaw kti cha krem, oŋ u, "U pa ! U pa ! hu-hu-hu" klam u dei wa iām.

Kitæ ki bru leh da sñiawthōh ki iei wa jia. U wa da klam chwa ynne, oŋ u ia u lok u, "Dieh ne, li chim kitai ki belcha neitai!". Utæ u lok u leh da lai u lura lura.

Paït wan u cha'u Lamchwa tæ klam u. "Me ham pynjōr dei iām. Dieh li pyntip cha ka bei mi, dieh. Oŋ ia ka u khut bru chōh ko, iow iarap ki i heini. Ieh, i wa naŋ ialeh u pyllait iow pa mi. Dieh, dieh, smat u lai deptæ wan leh lura lura."

U Lamchwa daŋ hei wa iām, phet u dei phet iow li khana cha ka bei u.

Kitæ ki bru da sdaŋ ki u tih ia kataæ ka krem da ki lynka wa ki belcha wa da rah utæ u lok ki na ka trok Shaktiman.

I iun̄ ka bei u Lamchwa toh iwa chna da ki dēiñ wa ki praw. Ha tnōm, da sap da ki phlan̄ saiñ. Em leh du sō kāmra itæ i iun̄. Iwi i kāmra chet wei bam, iwi i chyŋkōh, wei ar kāmra ki thawthiah. Em ka tyŋkoŋ um wa p'teiñ neitæ'i iun̄. Ka bei u Lamchwa, ka Koŋ Rida daŋ pynsum ko ïa ka diah u Lamchwa, ka Salan, heitæ i tyŋkoŋ um.

U Marbōd, uwa bōd iow Lamchwa, daŋ sap sula-patlun u hajan heitæ. Ō leh da dep sum u. Wan poi u Lamchwa ha p'chem iun̄ dei wa noh mynsien iŋgheh iŋgheh. Pait khyrŋiat ka bei u cha ō tæ oŋ ko, "Lamchwa! Ileh me kām̄tu! U pa mi cheiwon u?"

Pait u Lamchwa cha ka bei u dei khmat wa jŋem wei sō nei wa iām. Oŋ u ïa ka, "Ōr ka krem mō bei!"

"Ha!" Khyrŋiat ka bei u dei wa iēiñ syndet neiwa pynsum khon. Ka Salan da iām wa jhia um sabon ha khmat ko. "Kammon oŋ mi itæ, khon?" Lai ko hajan u tæ ksoh ka ō ha tūpha dei wa dem.

Oŋ bian̄ u Lamchwa dei sur wa jem wei sōhiām. "Wa ōr ka krem mō-iŋ stæ bei. U pa daŋ chapoh krem u. Oŋ kitu ki bru wa wan rap ïa i, iow khut bru chōh iow pyllait iow pa."

Klam ka bei u dei wa choh kti ha khlieh, "A Blai! Ka

NAIT O...

**pap saŋ ĩa ŋa!" Da pynhiar ko ĩa ka kti na khlieh tæ
ksoh bian ko ha kti u Lamchwa, dei wa tãn ô ĩow lai
tæ oŋ ko, "Pi khon, lai i cheitæ".**

**Katwa dan lai ki, oŋ ko ĩow Marbōd, "Pynsum noh
da me ĩa ka diah mi, mo khon." U Marbōd dep u u
ky'i ĩa ka bei u tæ lai wot u cha tyŋkoŋ um.**

Ka bei wa u Lamchwa da ĩa lai lura lura.

NAIT O...

3

Kat wow poi u Lamchwa, ka bei u, wei sa san ɲut ki wahēh para chnoŋ iōŋ ki heitæ i thaw wa tih mō u Ma Rian, chem ki da ki bru rew ne ki wa iēiñ sōdoŋ kawī ka met kawa da pynthiah ha madan dei wa tūmoh da ka that phlalen.

Ka bei u Lamchwa, mar syn iō iēitæ, da phet cheitæ dei wa kbai "Pa'u Lam!"

Kitæ ki bru wa iēiñ heitæ pyllait luti ki iā ka u lai. Dem ko ha ka met iap u Ma Rian-tæ klām ko deiwa iām sñiawsih, "A Blai! Ileh jia iā ɲa kāmni? Ki yi de wow pusai iā kini ki khon i? Kiyi wan u kyrsu thiah iā ɲa man i step? A Blai! Ileh chem pap saŋ o kat deini? Ka ske ki iē wa toh ha ɲa? U... hu hu hu...u...hu hu..." U Lamchwa leh da ksoh iā ka bei tæ da iām sñiawsih laŋ u wa ka.

Uwi na kitæ ki bru u wa pyllait iā ka met u Ma Rian neitæ i krem klam u iā ka, "Koŋ Rida, sñiawsih i u oŋ.... wa.... ũ iē i u pyllait pynsmat iā ō. Kattæ leh, u oŋ i, choŋ hei mon u Blai Kynrad. Pi rah noh i ō cha iuŋ."

Kiwi tawan ki bru kiwa emlaŋ heitæ leh klam pyntɲen ki iā ka. Da khreh ki u rah iā ka met iap u Ma Rian. U Lamchwa leh chdōh u iā ka bei u iow liwan noh ki cha iuŋ.

Kat nan lai ki por ki sñi, u Lamchwa da ìaleh u u khih u kreh chitom ìow pyndap ìa ka yuñ ka sem. Ka bei u leh da sdañ ko u li mylla sñi cha ìuñ ki bru para-chnoñ. Hadien wa ìap u pa ki, mut ko u pyndam skur ìow Marbōd wa ka Salan. Tanwa oñ u Lamchwa ìa ka, "Bei, da mylliñ pho mo ìei wa thrañ u pa u pynstad ki, ìow suk ka mynried ìoñ ki?"

Klam u Lamchwa ìa ka bei, dei sñiawkhia bha ha mynsēn u, "To bei, ieh, ynlai bait ki kam wa mut u pa. Na wa da dōh ìa kani ka lad, ū sñiawsuk o u pyndōh ìa ki leh. To bei, ieh lai bait ki. Na u khih chitom o nei bynta ìoñ ki ìoh u pyndep o ìei wa thmu u pa."

Myn da klam u Lamchwa kām̄tæ, jem i mynsien ka bei u tæ mih ki umkhmat ko dei wa tōid ha ñab ìoñ ka.

Dem tæ kdup ka ō u Lamchwa ha rupai ìoñ ka tæ oñ ka ìa ō, "Da heh syndet mi, mo khon. Na mut o wū em kyrmen de ìa ña. Hanpaïa dañ em uni u khon phrañsji ìoñ i."

Pyllait ko nei wa kdup ìa ō tæ chim ko ki kti u ha ki kti ìoñ ka tæ klam bian ko dei wa pait ha ki khmat ìoñ ō, "Toh hi, i wa oñ mi, wa u pa phi kwah u, u pynstad pyn puræ ìa phi ìow suk ka mynried

NAIT O...

ïonphi. A næ khon! Katwon sñiaw budnōd i, u pa phi wa ña, toh nei daw i duk ïon i, wū ïoh lad i u pynlai skur ïa me dañ hei por ïon mi. To, ña leh u khiih mylla noñ o, ïow ïe i u pyndap ha iun wa ïa ki diah mi."

Kamtæ, u Lamchwa khiih u kat cha wa ïoh u i jait kreh. Ynne ka sñi, li mylla rah um u ïa ki dukan ja cha sūrok heh. Heipor wa mut u u theh ïa ka um na ka tin wa rah u ha ka top um wa em ha thaw sait tiar itæ i dukan ja, toh ïōh u hei sabon tæ pat u heitæ. Chah ah ka sla kti tidiañ u ha ka tin um neiwa ïaleh u u ïada ïei pran ïon ō. Waroh kiwa em heitæ i dukan da ïapait cha ō du wa sñiaw ki ïeitæ wa pat u. On kataæ ka tre dukan, "To pait o ka kti mi heini" wa da ïō ko ïei wa mih snam ko.

"Ū pher doi koñ" Jubab u Lamchwa. Sait u kataæ ka sla kti u kawa mih snam da ka um wa em heitæ tæ kli u ka dei tana wa sai u na kata ïon ō. **Dep neitæ** li rah um biañ u.

Ka sŋi da sep, da sdaŋ u kem iŋgreiñ. Hapoh iuŋ, ka bei u Lamchwa daŋ chet ja - chet tye ko ha kamra chet. Ki diah wan u daŋ choŋ khreh kot ki ha chynkōh. Ha pyrdi wa ka Salan danthoh kot, sñiaw ko ïei sawa wa kieh ki juti 'kdup kdup' ne. Khai khlieh ko tæ pait ko cha'u Marbōd tæ klam ko dei iōkmen, "Pundæh, ap itæ! Da wan u sanpun!" Ō leh ieh u ka kattæ ka kot wa khreh u tæ pyn arŋut ki da iapait ki cha ka dwar wa iōluti ki iow sanpun ki. I mysen ki da dap chwa dei kmen wei kyrmen.

Du wa sñiaw ki wa da poi u ha dwar, u Marbōd da lai lura u iow wai ïa ka dwar. U Lamchwa da ieiñ hakhmat ka dwar tæ choh dwar u, khlem pait cha dwar. Toh wū em u pynboh ki ïa ka dwar, u Marbōd tăn u chi tăn tæ wai ka dwar. Tne u u wai ka dwar heipor wa tied dwar u sanpun u tæ chah tied u ha khmut u.

Heitæ, da iakhyrŋiat ki pyn arŋut ki katwa ka Salan wan naŋ rkhai ïa ki hadōh wa ksoh kpoh. U Lamchwa wow Marbōd leh da iarkhai laŋ tæ li choŋ ki ha ki mura wa da em chwa heitæ'i kāmra.

Ka bei ki na kāmra chet da sñiaw ko ïeitæ wa awri ki tæ kbai ko. "Iyi ioh phi u rkhai itæ?"

Oŋ ka Salan "Ma ioh phi'u iō tæ bei... iō chutia saŋ...

NAIT O...

Mut u sanpun u choh dwar tæ toh choh u ha khmut u pundæh. Ha! Ha! Ha!"

"Õ...õ..." oŋ ka bei dei sohrkhai. Ka leh da poi ko ha chynkōh.

U Lamchwa da sai u ïa ka tin jommetri napoh ka muna-kēiñ iōŋ ò tæ ē u ha'u Marbōd uwa chim ïa ka dei wa sōh-rkhai wei oŋ khyrŋaŋ "Khublei Chibōn Pun!" U Lamchwa leh pait u cha ò dei sōhrkhai tæ kyndæh maïa u ïa ò na sñiuh u.

Ka Salan leh da iēiñ tæ pait ko cha'u sanpun ko kam u ksaw wa ïaŋ bam na u trē. La di em tdoŋ ko tæ, da kaweh bha ka ò. Klah bian u Lamchwa napoh muna-kēiñ iōŋ ò tæ sai u da uwi u jrikdohsñiuh wa iōsuk bha, wa u ribon sō, tæ ē u ki cha ka. Da chynna bha wa kmen ka Salan du wa iō ko iēitæ. Thap kti ko dei wa kynthih khyrŋaŋ tæ chim ko ki na ki kti u sanpun ko tæ kdup ka ò. Õ leh doh u ka ha thŋa ko tæ iēiñ wot u. Ka bei ki hawa iō ko iēi wa kmen ki khon ko, dap i mynsien ko dei maïa wei kmen.

Lai u Lamchwa cha ka bei tæ ē u kataæ ka muna-kēiñ iōŋ ò cha ka tæ oŋ u: "Bei, pait; ki chini, ki blōh wow piat em ki hapoh kani ka muna; hei jhan o'u poi iuŋ tæ mylliñ noh o'u thied sei sabon sum."

"To khon, thied wan ka mynstep leh," oŋ ka bei u.

NAIT O...

Ka bei u, heipor wa chim ko katae ka muna na kti u, iō ko iei wa kli u dei tana ia ka sla kti u tae kylli ko dei wa teiñsar mynsēn, "Ileh katu ka kti mi, khon? Dian mot pait o!"

On u Lamchwa, "Wū em doi bei! Khajiak eh takha o." Khana u ia ka kāmwa jia hapoh dukan ja.

Ka bei ū em u nait ko khlem ioh u pait iei tae i kha u tae iah ka ō cha kāmra chet tae phah choŋ ko ō ha knor. Chim ko ia ka dabor plastik na almari tae theh um thnam ko na ka katli wa em harōd tpai.

Katnaŋ bōn kām ka bei u kāmte, u Lamchwa pait maia heh u ia ka bei u dei wa pynbōd u ia ki khmat u cha ki kti ko kām wa khih wa kreh ki. Dep bær blōh ko khajiak heitae ha um thnam ha dabor, chim ko sa ka thad wa khōid tae rah ko katae ka um ha thaw wa choŋ u Lamchwa.

Loit ko iei tae i tana wa kli u ha sla kti tae wieh ko da katae ka thad wa khōid ha um thnam tae sait ko iei tae i kha u. Mynda dep sait ko, chim ko sow chyrmit u wa dadep tylliat tae tap ko heitae i kha u. U Lamchwa, sa du pait heh u ia ka bei u dei wa phalaŋ ki khmat u dei maia i wadap wachlai ha mynsēn iōŋ ō.

HADIEN 12 SNEM

Ki bnai ki snem da lai. U Lamchwa leh, kat naŋ lai ki bnai ki snem, naŋ heh i bor i rynīēiñ u. I buit i budia leh naŋ che ki. Da tip u leh u khih bōn jait ki khih ki kreh toh wa lai mylla bait u kat cha waïoh. Wat wow ïah kari leh da stad bha u.

Kamtæ dei khih chitom, da ïoh u, u chna dei ïuŋ tin ïa ki.

Ki diah u leh naŋ ku klass ki man u snem wūjōh sah klas ki uwi wot u snem leh. U Marbōd kattæ da lai B.Com u, katwa, ka Salan wan da khreh XI ko. Hawa kamtæ dap ka ïuŋ ki du'i kmen. Taŋwa ka bei ki, ha kini ki snem wa da lai, da sdaŋ ko u khai kjut. I kjut leh toh ha ki mat chyēiñ. Kamtæ, duk ki u li thōh dawai ïa ka chisien chibnai. Han la kattæ leh, pynchkæh ko u sumar ïa ki khon wow pynbian ïei bam ïei dih ki ha ïuŋ.

Ynne ka sŋi, toh ka sŋi wa dap 12 snem wa da ïap u pa ki. Tæ da wan li bōh syntu ki ha lōm jŋntep u pa ki deiwa pynlut por ki leh u duwai u phirat heitæ. Kamtæ li kreh u mynda chitēiñ sŋi. Ynne ka sŋi kynmō u sa du ïow pa bait u wei riñ dur bian u ïa ki por wa da lai, ki por wa daŋ im u pa ki, ki por wa li kreh mylla laŋ u wa ō.

ŊAIT O...

Da sep ka sŋi, u Lamchwa leh da dep kām. Tæ katwa naŋ liwan u dei kĵat cha iuŋ ha surok kawa lai cha chnoŋ ki, chem u ĩa u Ma Kian, uwi na ki malik mō-ïoŋ, uwa da jōh kreh mylla bha u ha ki par mō ïoŋ ō.

U Ma Kian, mut u, u lai cha Mōlaiñ, cha iuŋ uwi u para-malik u, toh wa em ka khawai dap snem ĩa ka ksu ïoŋ utæ u malik. Da riam u leh ynne ka sŋi dei sut wei but. Daŋ hawa ĩah kari Olto u ha katae ka surok chnoŋ kawa sih wei dap da ki thlu suda, paŋchor ka kari u ha pyrdi surok.

Da hiar u Ma Kian na kari u tæ pait u ĩa katae ka taïar wa da paŋchor. Mai sih u ĩa katae ka taïar wa ka surok, taŋ wū em ki wa sñiaw ĩeitæ. Dei wū ïohsa, duk u'sai iow jek wa ka taïar spær na poh bhen. Klam u samen samen, "Sep-ai itæ i riam sut. Hanpaïa ēiñ heh ko ŋa heini!"

Daŋ hawa mut u'khynroŋ jek, poi u Lamchwa heitæ tæ klam u dei wa tipmit, "Ieh, Ma Kian, ynleh da ŋa kitu ki kām... ĩa tĵit paŋthan ka sut phi. Ê leh da ŋa uwa da tĵit chwa, jait daw sum hi o mynda poi iuŋ o."

Mut u Ma Kian u kyrŋah, taŋwa da chim u Lamchwa iow nar rah jek na kti u. Kamtæ ē lad u iow Lamchwa u leh katwa ŋait u. Sñiawŋōh u leh ĩei wa lait u nei pyntĵit ĩa ka sut khamtam toh u lai u chā

NAIT O...

wa khawai dawai u lok. Klam u hapoh mynsēn dei sōhrkhai samēn samēn, *"Hanpaïa, daŋ eh daw hi kini ki sut thūme o mo!"*

Pait u Ma Kian̄ ïei wa kreh kām u Lamchwa wut-wut næ. Pait beiti u ïei wa stiñ kti u, u kreh. Klam u ïow Lamchwa, "Ũ toh wa kheĩñ poh næ leh heh o sæ... ïō mi Lam.. wa mut o' u lai bam khawai cha wa dap snem ka ksu u Dame, tæ riam ka leh kāmni. Wa sih bhah kani ka taïar ïōm. Da bōn sien paŋchor ko ŋa. Toh u panaŋ ka cha khlō ïow sñiawthōh ko."

U Lamchwa, rkhai u ïei wa klam' u Ma Kian̄, taŋwa ũ em u jubab u iyi iyi leh. Ĭaleh u'pyndep pynsmat ïei kām. U Ma Kian̄ lai mih lait u cha khlō harōd surok. Kat u wan u, chem u wa da dep pyndait taïar u Lamchwa. U Lamchwa leh da dep thap jek thap taïar u hapoh bhen.

Oŋ u Ma Kian̄, "Khublei chibōn mo Lam; tæ... ku hapoh kari na-oŋ, ŋa leh cha chnoŋ hi phi u lai o."

"Toh hi," oŋ u Lam tæ lai wot u na dwar lian̄ tidian̄.

Katwa naŋĭah kari u Ma Kian̄, ïō kām wa bōn pyrkhat u. Kylli u ïow Lamchwa, "Tæ Lam, yi ïoh mi u khih u kreh katni?"

"Mylla sŋi heh ka næ Ma Kian̄, kat cha waïoh ka," jubab u Lamchwa.

NAIT O...

U Ma Kianj da klam ha mynsēn u, "*Īō bha, ĭō smat, ĭō stiñ o uni'u Lam. Tharai, hoi hi u bōh da ō ha dukan hei thaw utu uwa dalai liwan chnoŋ.*" Oŋ bianj u ĭow Lamchwa, "Hawa kamtæ, biēn hi mi næ u kræh noh ha dukan ĭoŋ ŋa heitai ha Mō-Suwe?"

"Ū toh da bōn ki noŋkreh phi heitæ?" Kylli kylla dow Lamchwa ĭa ō.

"Ha o stæ," oŋ u Ma Kianj ĭa ō. "Īō mi, wa liwan chnoŋ u menejar ĭōm, tæ la chi bnai khlem wan dē u. Kobsar da ksoh ka kurim u ō cheitæ. Tæ... lada biēn mi tæ, da suk o sæ, lait o'u thōh bru cheiwi, wei wa eh u ĭoh bru dei toh rukom katni ta om."

U Lamchwa khlem jubab syndon u. Pyrkhat chwa u tæ hadien chipor arpor, oŋ u ĭow Ma Kianj, "ĭeitæ na ai tæ hap klam chwa o wa ka bei, ĭōw ap kāmmon oŋ ko. Lada chah ka bei tæ u wan bait o ha dukan phi mynstep 8 bajc, mo ma."

"To meitæ. Ŋa u ĭō luti o ĭa me mynstep, toh ŋait o, ka bei mi leh ū tharai o u khanj ko me," jubab u Ma Kianj dei ĭōkmen wei sōhrkhai.

Ka bei u Lamchwa daŋ ah salah pharæŋ ko da ka wait tyŋkroŋ hapoh kāmra chet. I ja dajan ih wei wa daŋ sy-iñ ko ki hajroŋ diñ. Wan u Lamchwa tæ pait ko cha ō. Em i bam dih cha iwa da thied u nei dukan wa em pynhajan iuŋ ioŋ ki. Ê u ietæ ha ka bei u tæ choŋ u ha ka knor kawa em hajan ioŋ ka.

Ka bei u da iēiñ iow bōh kitæ ki bam dih cha hapoh duli. U Lamchwa sñiaw u wa laŋam i iuŋ kiaw-kiaw kaw-kaw tæ kylli u ia ka bei, "Cheiwon lai ka Salan wow Marbōd ini?"

Khyr-uiñ ka bei na ka duli tæ jubab ko, "Lai iaseiñ ki na-oŋ. Wa man iaseiñ iuŋ ki ha ioŋ ka Bombai ynnē."

"O sakhiat! Na leh mylliñ o kiaw ne! Lada ũ toh wa iarap o iow Ma Kian ynnē tæ daŋ ioh hi o sæ u lai laŋ wa ki," oŋ u Lamchwa.

Ka bei da choŋ bian iow ah salah. Pait ko cha ō tæ kylli ko, "Iyi ioh mi u iarap i'u Ma Kian?"

Jubab u Lamchwa, "Wa paŋchor ka taiar u na oŋ. Iō budnōd o ia tŋit ki sut ki but u tæ oŋ o ieh da ŋa leh ne." Saŋeh u, u klam chipor tæc p'teiñ bian u, "Seiwi leh, mut o'u oŋ ia phi wa khut u ŋa u kreh ha dukan ioŋ o ha Mō-Suwe."

NAIT O...

Rap ktien pynsmat ka bei u, "Tæ lai na-on, khon. U Ma Kian pathan u wa smat bha u iarap ia kiwi. Ūtoh u wa saron kam kiwa bōn ki Malik."

Pait u Lamchwa cha ka tæ on u, "To bei. Du wa da monjur da phi, tæ ɲa leh da bait o'u lai nadōh mynstep." Īēiñ khyrɲaɲ u nei wa choɲ tæ klam biaɲ u ia ka, "Tæ, ɲa u khreh sum noh o kattæ, mo bei."

"To khon. Da tyrtah hi katu ka um mi wa tu ka Salan ia me nadōh ynne," jubab ka bei.

Ō lai wot u. Ka bei leh da ah pyndep ia ki jhur wa em ha dabor.

Ka iun u Ma Kian toh kawa heh bha ha ka chnon Mō-Suwe kawa em harōd National Highway. Em ko ar mala hi eh tanwa kawa heh wei miat dur toh wa da disaiñ da ki arkitek na Shillon. Ka thaw bōh kari leh kawa kyllōid. Em wan ka dukan Hardware kawa bōh u harōd surok kāmwa 5 minit u lai dei kjat na iun u.

Ynne ka step, u Kian wa ka khon u, ka Maia, dan dih cha step ki ha kāmra bam. Em ki ruti ha piris, wow makhon wa ka tari, wa ki pylléiñ 4 tylli ha kawi tawan ka piris. Ka Maia chon ko hajan u pa na lian tidian u. Ka nan khlæh makhon ko h'u ruti tæ ē ko h'u pa. Ka, toh ka khon samen; ka bei ko, ka kon Rimon, da khlad ko nadōh dan 5 snem ko. Kamtæ, duk u pa ko u ri ia ka samen samen. Ō leh, ũ em u thōh kurim de u chawi, toh wū iē dē u'mylliñ ia ka bei ka Maia. Ō toh u khon wa dōh wa duk na ka chnon Kremkhli napoh thaiñ war.

Dan hei por khynrō u, mih u na chnon iow thōh mylla sji u cha kini ki chnon pnar wa em mōion. Kamtæ, kreh u chibet wow wi u malik, chibet dow wi tawan, katcha wa khut mylla ō. Hawa kut tæ kreh u wa u pa ka kon Rimon ha ka chnon Mō-Suwe. Neitæ iatipmit u wa ka kon Rimon.

Nei tipmit poi ki chei iamaia hadōh wa poi syndon

NAITO...

ki hei iachonkha. Ka bei u Pa ka Konj Rimon leh sñiawsuk ki u kam pyrsa ia o toh wa da io ki iei jinglon akor u toh u wabha wa khoid. Kamtæ da sah u wa ki, tæ kreh u leh wa ki. Kamtæ nanroi ka khih ka khan ki toh wa stad u'khih. Mynda dap ka Maia 2 snem, da chna noh u jar i iun tæ sah ki leh heitæ.

Heipor wa da em ka Maia 5 snem, khlad ka bei ko nei wa aksiden kari pasenjar wa chon ko ha Riat Hapmasi hei por wa lai ko cha Shillon. Ha katæ ka joh ka aksiden, khlad leh ka beipun wow papun ka Maia kiwa iachonlan ha katæ ka kari. Ka Maia da lai skur ko heitæ i por. U Ma Kian da iam piah mynsien u heipor wa ioh u ieitæ i khubor wa sñiawsih. Da raikut hi'u leh wa u bien de u'thoh kurim chawi tanwa u thehlut u ki i maia u ha ka khon ion ki, ka Maia, kawa syriem dur wei miat kynthai kam ka bei hi ko.

Kattæ i por da dep ki'u dih cha tæ on ka Maia iow pa, "Pa, na mut o'u lai cha NEHU myntu. sñiaw o wa on ki lok mynstep u mih ka result i."

U ma Kian da boh ia ka khuricha ha piris tæ pait cha ka dei sohrkhai. "Kamtæ sakhiat? Boi u ialai lan i sæ? Na leh jhan bha o'u tip ia ka result ionpha."

Rap ktien ka Maia, "Lada lai phi tæ, kiyi wan u pait cheini ha dukan?"

NAIT O...

U Ma Kianj da iëiñ na wa chonj tæ onj dei wa kâp khyrñan cha kāmra pdeiñ, "Chæ! Emhi u wa da phah o. Nait o jan u wa bianj hi u bru, toh wa dadep takit o chapñan ionj ô danj ha ki por wa jōh kreh u wa ña. U bru tæ uwa khih chitom wei bha jinlonj. Nadōh wa iap u pa'u tæ, ô wot sæ wa ri wa sumar ka bei u wa ki diah u."

Ka Maïa kawa bōd nadiën nadiën u pa da kylli ko, "U yi utæ ma-ai?"

"U Lamchwa," jubab u Ma Kianj. "Uwa na Mōlaiñ, neini marjan chnonj hi."

Onj ka Maïa dei kmen, "To Pa, du wa daïoh bru hi phi, ña leh kmen o, ioh phi'u lai lanj wa ña."

U Ma Kianj da khyrñiun cha ka dei sōhrkhai tæ kdup u ña ka dei wa onj, "Lad'm pynkmen o ña pha, iei yi thiēj? Lad'm em sa pha, wym em jinmut hi dē u im o leh! Pha, toh ka daw iei jinim o heini ha pyrthai. Tip hi pho iëitæ, wa, pha man pho kawa kordortam ña ña heini ha pyrthai; neibhah, pha toh u soh i maïa ionj i - wa ña wa ka bei pho."

"I love you too, Dad," kyllianj ktien ka Maïa dei pharæn. U pa da pyllait nei wa kdup ña ka tæ onj u ña ka, "Pha nanj khræh, ña iow lai batai kām chwa o iow Lamchwa. Tæ... wan bait ha dukan myn da dep pho, mo!"

ŊAIT O...

"To Pa," jubab ka Maïa tæ ku wot ko cha kāmra ïoŋ
ka kawa em ha jroŋ armala. U Ma Kiaŋ leh da mih
na ïuŋ ïow lai cha dukan.

U Lamchwa na jñai da chynna ïei wa wan ka kari u Ma Kian̄ tæ da ïēiñ u dei wa bait tæ pynbait u leh ïa ka sula u. Da riam u leh ynne ka sñi dei sula wei patlun thūme kiwa e uwi u malik ïa ō da slem. Dabōn ki patlun ki sula wa ē sñiawbha ki malik - kiwa jōh kreh u - ïa ō por Khrismas, tañwa du neibhah wa sñiaw sarom u'riam deiwa thūme tæ bōh heh u ki hapoh syndup, næ ē u ki ï'u Marbōd kat kiwa ïatoh wa ō.

Ō leh, dañ itæ wot chibet poi u hakhmat dukan u Ma Kian̄. Em ar ñut ki noñkreh dukan u Ma Kian̄ leh da ïañ ki ïa ō heitæ toh wa u chabi dukan leh em u ha ō.

Pynñēiñ kari u Ma Kian̄ harōd dukan tæ mynda hiar u na kari da lai u wi na ki noñkreh ïow chim chabi dukan na ō. Mar syn ïō u Ma Kian̄ ïow Lamchwa, da sōhrkhai ïa ō tæ oñ u, "Da slem wan mi?"

"Dañ itu wot chibet," jubab u Lamchwa.

Ka dukan da dep wai ki noñkreh u. Kamtæ, khut u ïow Lamchwa chapoh. "Alæ psiah i chapoh ïoh u batai kām o ïa me."

Psiah wot ki hapoh dukan tæ lai ki hei thaw choñ u menejar tæ ïa ïēiñ ki hajan chuki u menejar. Kitu ki

NAIT O...

noŋkreh da leh ki jar i kām. Khut u Ma Kian ki tæ pyntipmit u ki iow Lamchwa deiwa oŋ ia ki, "Pait cheini... nadōh myntu, u Lamchwa u man u Menejar heini. Tæ... kām tæ, iōluti ō wow iakreh laŋ phi wa ō deiwa leh phi iei wa oŋ u."

"To, malik," jubab ki noŋkreh tæ ia ē khublei kti ki iow Lamchwa uwi hadien uwi dep tæ ia lai leh wot ki jar i kām.

Sai u Ma Kian ia ki kot rejistar tæ oŋ u iow Lamchwa dei wa kdaw khyrŋaŋ, "Pait kini ki rejistar wa da thoh iei dor i mur ki tiar waroh wa em heini. Tæ lada duna tiar leh iow phone mi cha kini ki Mahajon iow phah tiar ki. Da em lut ki phone nambar ki heini."

Neitæ, da sai u Ma Kian ki chabi wa toh kām ha dukan na kata iōŋ ō tæ ē u ki h'u Lamchwa. "Chim kini ki chabi duli chabi almari iōŋ ka dukan. Wan ē ki deilaŋ wa ka poisa walaŋ wa ki kot jŋkheiñ ha iūŋ mynda dep khaŋ dukan mi... " Taŋ i ktien u Ma Kian leh ū pu kut da psiah ka Maia hapoh dukan. Waroh da iapait ki cha ka.

Pait u Ma Kian cha'u Lamchwa tæ oŋ u, "Lam, pait kani ka khon o, ka Maia. Lada jia wū em o, tæ ka wot sæ wow tip iei kām wa me." Khyruiñ u cha ka Maia tæ oŋ u, "Khon, pait uni utæ u Lamchwa, u Menejar iōŋ i heini nadōh myntu." U Lamchwa wa

NAIT O...

ka Maïa da ïa pait ki dei kyrŋōh khlieh wei sōhrkhai khajiak.

Pait ka Maïa cha'u pa tæ kylli ko, "Dahoi u lai i, Pa?"

Ky'i eh u Ma Kian ïa ka tæ mih u nei thaw wa ïēiñ u tæ klam bian u ïow Lamchwa, "Tæ, Lam, me nan pait deimiat næ mo!"

"To ma. Phi ham khuslai. Da jōh kreh hi o kam kini ki jait kām leh nachwa" jubab u Lamchwa.

U Ma Kian wa ka Maïa da mih ki na dukan ïow lai cha ka kari. U Lamchwa nan chim u kitæ ki rejistar tæ khyndan u ki sla kāmwa spær khyrŋan.

Ka Maïa da em ko hapoh kari, choŋ ko ha khmat hei lian iōŋ pasenjar. U Ma Kian leh dan mut u u start kari, pait chwa u cha ka Maïa tæ klam u, "U li pait chwa i cha stok mōiōŋ leh khajiak mo, boi wan kitu ki dkhar wow su poisa bai mō tæ i'u chim o ka poisa na u Rokki?"

Jubab ka Maïa, "To, Pa. Tan mynda poi heitæ, hiar noh du phi mo. Nja ũ hiar o."

Oŋ wan u Ma Kian, "Toh u hiar lan i na oŋ, ïow tip pho ïa ka khih ka kreh. Lada'm pait da pha, kiyi de u pait mynda lai o neini na pyrthai?"

NAIT O...

"Æ.. u Pa, ham klam kām̄tæ, wū sñiawsuk o. Pi lai i." Klam chrai kyndæh ka Maïa ïow pa katwa ò wan rkhai heh u ka.

"Ïō, pho khon," klam u Ma Kian dei jai ne. "U Menejar ïon i, u Rokki, uwa pynlai ïei mōïon i, suba o, wa leh tōh u. Tanwa ū em u ïoh sabut o'u pyntikna ïeitæ toh bōn kiwa teiñ ïa ò. Neitæ i daw kwah o ïow tipmit pho ïa ki bru kiwa toh kām wa i ïow suk pho mynried."

Stat u ka ka kari tæ lai wot ki na surok heh.

Da em kattu katni ki khyllōd puræ kiwa pait Result ha 'Notice Board' iōŋ ka 'Exam Department' iōŋ ka skurheh NEHU ha Shillōŋ. Dei iō chonchit hi eh ki, toh wa iā bōn ktien wei awri bha ki. Iā pait iā pynbōd ki dei kti ha katæ ka sla kot kawa da chon ki rōl nombar iōŋ kiwa da pas.

Kawi na kitæ ki khyllōd toh ka Pynhun, ka paralok ka Maia. I chnoŋ iōŋ ka toh na Kmawan cha thaiñ sepsni ha ri Khasi. Ka leh iāleh MSc (Botany) ko tæ da pass ko hei First Division. Da iō kmen bha i dur ko. Sei wa da miat kynthai chwa ko, mynda rkhai pathan ko, naŋ miat chōh-chōh ko. I ryniēiñ i pran ko leh i wa da dap da bian.

Ha pyrdi wa ē khublei kti ko iā ka paraklass ka wa em laŋ heitæ, iō ko wa wan ka Maia wow pa iōŋ ka. Da tipmit ko iā ō toh wa da jōh iāchem ki heipor wan pait u ka ka Maia ha hostel wa sah laŋ ki heipor lai MSc ki.

Ka Maia, na jŋai da iō iei wa phōh i dur ka Pynhun deikmen deirkhai tæ da tip ko wa da pass bha ka lok ko. Kamtæ mynda iāpoi ki hajan oŋ ko iā ka, "Tip hi o, wa iōh First Division pho" tæ kynrup wot ko ka tæ iakdup ki pynar ŋut ki.

"Tæ, pha leh na-oŋ... i jōh hi!" ē ktien ka Pynhun iā

NAIT O...

**ka. Tip ko'u klam pnar leh toh da ialok bha ko wa
ka Maia nadoh i por lai kolej ki deilan.**

**U Ma Kian leh dei kmen wei sohrkhai nei bynta ion
ki wa da pass bha ki ta tyrwa u, "Pi ia lai dih cha
pass i meitae. Kat ka MSc pass phi ta toh u khawai
cha pun chnon!" Ia rkhai ki jei ta i klam u ta ialai
lan ki cha ka kari iow lai dih cha ki.**

HADIEN AR SNEM

La arsnem datam wa khih u Lamchwa wa u Ma Kianj. Toh wa khih hok u, tæ budnöd u Ma Kianj u dōh iow Lamchwa tæ da pynku u dei tulop iōŋ ō iōh u u neh-u sah, iow dam u u li kreh wa kiwi.

U Lamchwa leh sñiawsuk u u khih wow Ma Kianj toh wa chem u wa u Ma Kianj ũ toh u wa saronj næ u wa chrai biěj. Heipor wa chitom poisa u ha iunj leh da smat u Ma Kianj u iärap iä ō. Katnu sñiawŋōh - sñiaw dapram u Lamchwa iow Ma Kianj hawa lait u u synta u pyrwa ůei wa duna ha iunj ha sem. Hei por chitom ka bei u leh da iōh iärap u na'u Ma Kianj, hei por toh u su bai college iä ki diah iōŋ ō leh da iärap bianj u Ma Kianj iä ō. Kamtæ sñiaw u iow Ma Kianj kām u ma u woh iōŋ ō hi.

Ka Maïa wa ka paralok ko, ka Pynhun leh da bteiñ ki ůei puræ iōŋ ki tanjwa jar ka laiñ. Ka Maïa da lai puræ Ph.D ko ha ka laiñ 'Genetics', katwa ka Pynhun, btein ko iä ka puræ PhD iōŋ ka ha ka laiñ 'Environmental Science'. Pyn-ar ki puræ PhD ki hapoh NEHU hi wot. Chisien chi taiaw, man ka sñi thohdeiñ, da wan iunj bait ka Maïa iow iōh ko'u emlanj wow pa ko. Teiñ-teiñ, sah ko iōŋ taiaw ha iunj hawa em kām u pa ko iä ka. Ka lai puræ PhD ũtoḥ kawa kdoh hadōh kattæ-kattæ; iōh lad hi ki u lai khih lai kreh leh, chonj hei samlai ki jar i por.

Ha kawi ka diphu mōiōŋ, iōŋ u Ma Kian, em 5 tylli ki trok wa iēiñ thāp mō heitæ. U Menejar iōŋ ō, u Rokki, em u hajan itæ ha kawi ka dukan ja daŋ iaklam u wa ki malik dkhar wa thied mō. Uwi na kitæ ki malik dkhar sai u ia 5 soŋ ka poisa da ki kot hajar bait tæ ē u ha u Rokki ia kataæ ka poisa dei wa oŋ u iōŋ dkhar, "Ye tin gari ka pēment hei. Baki do gari ka paisa, do din me milega."

"Thik hei," oŋ u Rokki dei wa tam iēi kti u chim kataæ ka poisa.

Heitæ i por, psiah u Lamchwa hapoh dukan dei wa mut u dih cha heitæ toh wa daŋ wan bōh tiar wot u cheitu wa phah u Ma Kian ō. U Rokki ū em u iō u toh wa khyruiñ u dei dēn. Kamtæ, u Lamchwa choŋ u ha ka ben wa em hajan dwar tæ pan cha u. Iō hi u ia ka poisa wa pyllaŋ u Rokki wei thāp u hapoh jeket snēh u. Taŋwa ū biēn u, u klam iōw Rokki toh wū jōh iāmain bha ki han lada jōh iāchem hi ki ha iuŋ u Ma Kian leh.

U Rokki wa kitæ ki dkhar naŋbōn ktien ki katwa u Lamchwa dadep wow dih chā wei dep su pyn heitu. Da lai u khlem klam iōw Rokki toh u Rokki leh ū em u bna u ō, wei ū em hi u jōhkhe u leh wa em u heitæ.

U Ma Kian wow Rokki daŋ iachon iaklam iei kām ha kāmra chonke. Daŋ ha wa sai poisa u Rokki iow ē ch'u Ma Kian, wan poi u Lamchwa heitæ dei wa rah ia ki chabi dukan, wa ka poisa wa ki rejistar kiwa mut u u e h'u Ma Kian.

U Rokki da ē ka poisa 4 soŋ donhi da ki kot hajar h'u Ma Kian dei wa on, "Chim, ma, kani ka 4 lak wa su u dkhar ynne. Sa chi lak, u su pyndep u mynkawi on u."

U Lamchwa da khyrŋiat heitæ toh wa da iō u dei khmat ion ō wa su u d'khar 5 lak tyŋka hapoh katu ka dukan wa dih cha u ynne. Sñiaw chrai u iei wa nōd u Rokki u bamsap iow malik u. Kamtæ, klam pyrchah u, "Ū toh 5 lak su utu u d'khar ynne? Na tip hi o!"

U Ma Kian pait u cha'u Lamchwa tæ iō u iei wa chynna i sakhiat ha ki khmat ion ō, katwa u Rokki wan dei wa sō kyr'aŋ ki chkōr u pait u liap næ chow Lamchwa deiwa iō-chrai taŋwa ũ nud u u kiēh kat i em leh. On heh u dei chyoh wa jem iow Ma Kian, "Kani wot ma wa e u ynne."

U Ma Kian da pait ch'u Rokki tæ pait wan ch'u Lamchwa tæ kylli u, "Kammon tip mi iei tæ?"

NAIT O...

Pynche u Lamchwa, "Na em o pyn hajan ki tynne, por wa ē poisa u tu'dkhar ia ō ha dukan ka Biar. Lada klah phi ki kata u, daw chem phi wa em sa chi sonj ka poisa ha ō."

Heitæ da pait sō u Rokki iow Lamchwa.

U Ma Kianj toh da slem hi wa suba u iow Rokki tæ da sñiawnait u iei wa onj u Lamchwa. Onj u iow Rokki, "Sai waroh iwa em na katu ka jaket mi iow tip i iei wa sakhiat!"

Heitæ, u Rokki da kiñ i pyrkhat u, ū tip dē u kammon u leh. Em kataē ka mynsēn ksuid u kawa onj ia ō u pyniāp noh ia kini arjut tanwa i chē ionj bru wan u artatien ko boi ū iē bor u ki pyn-ar. Kamtæ, dei wymiohsa u, sai u ka poisa wa da murieh u chisonj hapoh kata jaket u tæ ē u h'u Ma Kianj, tanwa na itæ i sonj leh da duna ki kot hajar 20 tylli kiwa da pynemkām u hei leh sñiawbha wa ki lok u. Ia kataē u tip ki myn da lakha ki ia ka poisa. Kattæ chōh wym em u johkhe ki iēitæ.

U Rokki ialeh u'iada burom dei wa onj iow Ma Kianj, "Danj mut o'u onj ia phi, ma, wa emkām poisa o ha iun, tæ ksoh o kani ka poisa cha ŋa. Sñiawbha map ia ŋa."

Jubab u Ma Kianj ia ō dei wa khor, "Da slem ki por suba o wa murieh poisa mi na ŋa. Ynne ioh o ka

NAIT O...

sabut kawa bian. Nadōh myntu, me li kreh noh wa kiwa iatoh jinmut mi, wa ɲa hi tæ... ũ chah dē o. Get out!" Klam u iēini i kyntien pharæŋ dei wa kdaw kti khyrɲaŋ chalaɪt.

U Rokki da sñiawthōh u wa da kut ka iaw iōŋ ō heini tæ iēiñ u tæ kam wa lai cha dwar iow mih, klam pasiaw u iow Lamchwa dei sur wa maham dei wa pyniō kti, "Daw iō a me."

U Lamchwa sōhrkhai heh u ia ō, taŋwa em hi i sñiaw ma hapoh i nōd iōŋ ō.

U Ma Kian da pyllaŋ ia ka poisa wa ē u Rokki dep tæ pait u ch'u Lamchwa uwa da choŋ mar pyrchah iōŋ ō ha jroŋ sofa. Sōhrkhai u iow Lamchwa tæ oŋ u ia ō, "Sñiawŋōh o ia me chibōn, wa da ioh o'u beh khih iow Rokki. Da slem leh u iēini i kām taŋwa ũ em u ioh sabut a ō. Embhah sakhiat o yinne wa chem sabut mi ō. Tip dei yi u su kylliaŋ ō ia me?"

U Lamchwa leh ũ tip u kāmmon u jubab iei tæ tæ oŋ heh u, "Æ... to, ma, ũ pher iei tæ. Pait kani ka jinkheñ iōŋ ka dukan yinne, wa kani ka poisa wa laŋ," deiwa bōh khyrɲaŋ ia kitæ ki poisa wa ka rejistar hajroŋ miaj hakhmat u Ma Kian.

U Ma Kian khlem pait cha katae ka poisa ne ka rejistar klam bian u iow Lamchwa, "Sñiawkmen o wa me man mi u wa daŋhok daŋkhōid. Kamtæ...

NAIT O...

kwah o, wa me u man mi u Menejar ïon ɲa ha waroh ki khih ïon ɲa nadōh myntu ka sɲi. Ki khih ki khan ïon ɲa da tip hi mi."

U Lamchwa naŋ ky'i katwa naŋ klam u Ma Kian, "Tæ... pynlai noh da me ki. ɲa da noh i r'ta kamni da sɲiaw tlot o'u pait waroh i jait. Tæ me pait ki deimiat næ. Lada chem jɲeh mi, khana wan ïa ɲa."

U Lamchwa da sɲiawkhia ïei tæ i wa on u Ma Kian tæ jubab u dei wa on, "Khublei chibōn ma, ïei wa chaniah phi ha ɲa. ɲa, hadōh katni leh wym em u mylliñ o ki, ïei waleh bha phi ïa ɲa dei wa khut phi ɲa u kreh laŋ waphi wei iarap phi ïa ɲa ha ka lian ka bei wa ki diah o. Kamwa da chaniah phi ïa ɲa, ɲa leh u khih chitom o ïow naŋ hoi ki khih ki khan phi."

On wan u Ma Kian, "To meitæ, me wan ïachem wan wa ɲa daŋstep mynstep ïoh u batai kām o ïa me wei wow e syndon o leh ïa ki kot ki sla wa ki chabi ha me waroh ïoh mi u pait bait dame nadōh mynstep."

"To meitæ ma. Khublei chibōn" on u Lamchwa.

"Ileh u on mi khublei?" on u Ma Kian ïa ō. "Kani toh ka bainon mi, ïei wa kreh hok mi." Khyruiñ khlieh u cha ka kamra bam tæ kbaï u, "Maïa !"

Napoh itæ i kamra bam wan ka sur ka Maïa kawa

NAIT O...

jubab, "ōi... Pa!"

Oŋ bian u Ma Kian dei sur wa jōh klam hi u, "Rah katu ka chā cheini."

Mih ka Maïa napoh itæ i kamra bam deiwa rah ïa ka Trê kawa em chi khuri ka cha wei chi piris i biskit. Bōd khmat u Ma Kian ka katwa daŋbōh ko ïa ka cha wei tæ ki biskit ha jroŋ miaj. Dap i mynsien wei khmat u dei kmen wei sōhrkhai.

U Lamchwa wan pait heh u cheini cheitai. Dei wa sñiawbēij, oŋ u iow Ma Kian, "Ŋa da hoi u lai o, na-oŋ ma?"

Pait u Ma Kian cha ō tæ kylli u, "Ũ biēn mi u dih cha wa i?"

Jubab u Lamchwa, "Ieh chwa myntu mo ma, wa da'u lai emkām chwa o heitai, ïa slem pathan o'u poi iuŋ. Ŋa mynstep daŋstep da wan o. Mo ma meitæ, lai o. Mo! koŋ Maïa."

Pyn-ar ki da oŋ ïa ō, "To dieh."

Katwa daŋ lai u Lamchwa, u Ma Kian pynbōd khmat u cha ō dei wa iō bōn pyrkhat bha. Pait wan u cha ka Maïa tæ dei wa kdaw kti cha ka poisa wa ka rejistar oŋ u ïa ka, "Pha bōh wan kini ki kot ki sla wei poisa hapoh almari, mo. Tæ pait, da beh a ō'u

NAIT O...

Rokki yntu, toh wa daïoh sabut o ò ìei wa leh tōh u ìa i da slem ki por. Wa chem sabut ò leh toh u Lamchwa hi. Tæ nadōh mynstep, u Lamchwa u pynlai ki ki khih ki khan wa ka dukan."

Ka Maïa mynjur ko dei wa oŋ, "To pa, kat wa iōbian phi."

Hadēn chibet kylli u ìa ka, "Tæ khon, kāmmon sñiaw pho ìei rai iōŋ ŋa, ìei bhah u Lamchwa?"

Oŋ bian ka Maïa, "Ŋa da dep oŋ o ìei tæ - kat wa sñiawbian phi pa."

Hadien chipor kylli bian u Ma Kian ìa ka dei wa sōhrkhai, "Ilawa kām̄tæ, lada pynbia o pha wa ò wan?"

"Ha!" Khyrŋiat ka Maïa. "U pynbia phi ò wa ŋa? Kat ìeitæ tæ... ŋa ũ ìe o'u pdiaŋ."

Daŋ dei sōhrkhai oŋ u Ma Kian ìa ka, "Ileh khon oŋ pho kām̄tæ wān. Ŋa klam pynjaw heh o pha leh. Hei pait hei chem iōŋ ŋa, u Lamchwa man u, u bru wabha wakhōid mynsien bha, ban ìa kiwi ki chynraŋ kiwa da tip o. Wei toh leh uwa khih chitom. Ŋait o u pynkmen u pha chir'ta."

"Toh hi wa man u kām̄tæ, taŋwa ŋa wan wym sñiaw ìahāp kyrdaŋ o wa ò. Sei wi leh ŋa daŋ kwah

NAIT O...

chōh o'u pyndep ïei puræ," oŋ ka Maïa.

Heitæ oŋ wan u Ma Kian, "İō pho khon, u Blai chna u i saman hei manbru. İei kyrđan - i ki bru wa bōh. Ka bei phi leh chim ko ŋa hei jinlon duk. Dei khih chitom wei kyrchan ki bei ki pa, hoi bru o hadōh katni. Sñiawsih, sñiawbudnōd heh o wa ka bei pho wymioh ko u em lan wa i katni, numa em ko da ka, deiwi tawan u man ka iun ka sem i ū toh du kamni don."

Sanġeh u u klam chipor toh wa dap i mynsēn u mynda kynmō u ïa ka bei ka Maïa. Ka Maïa leh da lai i pyrkhat ko cha ka bei. Hadien kattu katni klam bian u Ma Kian, "To. Pha pyrkhat wan ïei wa da oŋ o. Ki por daŋbōn ïa pha, ŋa leh kwah o'u pyndep chwa pho ïei puræ ion pha, tæ iapait wan i."

Dep u klam ïei tæ, lai bian i pyrkhat u cha ka bei ka Maïa. I khmat da iō pait ŋai. Ka Maïa leh da dem hei pyrkhat i ion ka hi. U Ma Kian da sai napoh kata iow loket wa jōh rah u kat cha wa lai. Howtæ u loket, em i dur ka koŋ Rimon, ka bei ka Maïa. Pait u ïei dur ion ka dei mynsien wa dap dei silet wei sñiawsih. Klam u ïa ka hapoh mynsēn u, "*Kammon u pynsñiaw thōh o ïa ka khon i de bei ka Maïa?*"

Ka bei u Lamchwa ha kamra chet dançhet tye ha diñ. Da sñiaw ko ïei wa wan u Lamchwa toh wa sñiaw ko ïei wa sait kti sait kjat u cha lait ha tynkoñ um kawa em hajan itæ i kamra chet ki.

Mar synpsiah u Lamchwa ha kamra chet tæ oñ wot u, "Ade! 'yi ïoh phi'u chet ynne bei, sñiaw bih ban san itæ!"

"Ka syrwa doh masi ne khon." jubab ka bei u tæ kylli ko ïa õ, "Tæ bõn kām mi ynne?"

"Û em de bei" Oñ u. Chim u ïa ka knor tæ choñ u hajan ka bei. Jñieh u cheini cheitai cha wa em kiwi tawan ki kamra tæ kylli u ia ka, "Cheiwon ki, kitu ki diah o? Lai kē ki mo?"

"Dan kattæ tæ khreh kot ki na-oñ. Me leh; cheiwon u ïoh ki u lai ke?" oñ ka bei u.

"Wa sñiaw lanam heh ka iun na-oñ te kylli o," rap ktien u dei wa kynjoh iow khri pathi wa em hajan ka bei u.

Poi wot ka Salan heitæ tæ klam ko, "Hai Sanpun! Wym sñiaw tan wa wan phi leh. Da slem mo wan phi?"

NAIT O...

"Daŋ ite wot doŋ" Oŋ u, tæ kylli u ïa ka, "Kammon i puræ pho ynne? Da ïe kot pho?"

Oŋ ka Salan, "Daŋ dep thoh 'homework' heh o, wei ynne bōn 'homework' saŋ i."

"Ileh kini ki nonhikai leh phah thoh warē ki cha iuŋ? La kām̄tæ i'w krum u lai cha skur? Pyndep ka ka puræ ha iuŋ leh na oŋ?" klam danda u sanpun ko ïa ka.

Heitæ i por wan sa u Marbōd tæ oŋ u dei wa kap khyrŋaŋ, "O... Sanpun! Da wan phi mo? Ileh wymsñiaw i phi?"

"Kobsar me thiah mi jēi ne hei thaw u khreh kot mi" jubab u sanpun u.

"Toh hi sanpun. Wa ïaleh sport i ynne ha kolej tæ ŋiah ware o, lai khmat o daŋ hawa khreh kot" khana u ïei sakhiat.

U Lamchwa da klam dei sñiawmaïa ïa ki, "To, pyn-ar ŋut phi toh u pynchkaēh phi hei puræ i iōŋphi. Na wa ka bei kwah i u hoi bru manbru phi ha kani ka pyrthai. Tæ ūtoŋ u swē phi. Katwon iōh bor o'u khih, hawa iō o wa minot ki diah o, wei wa leh bha ki."

Ka bei u leh naŋ ky'i ïei wa oŋ u. Dep u Lamchwa u

NAIT O...

**klam, pait ko cheitæ i doh syrwa wa dan chet ha diñ
tæ iō ko da hoi hi u rah noh tæ on ko, "Salan,
wanrah ki plian wa ka sian ja heini iow bam ja noh
i."**

**Ka Salan da li chim ia ki plian wa ka sian ja na duli
tæ bōh ko haphran ka bei. U Marbōd da rah u ia ka
dabor um iow sait kti ki. Ka bei dapieh ieiya ieyte
tæ dep ki u nōh Blai, ia bam ja lan ki heitæ.**

Katæ ka sni toh kawa chit bha ha sor Jwai. Ū jōh sñiaw ki kām katæ ka jīŋchit ha waroh ki snem wa da lai. Em kiwa oŋ da kylla ka pyrthai, em leh kiwa oŋ dajan wai ka pyrthai, em wan ki wa batai deiwi-dei ar. Utæ u wa deiñ iitkhmat p'than oŋ u wa da pynjæt ware u bru ïa ka spah wa-im ka pyrthai myndær tæ man kāmni.

U Lamchwa ap eh u ïei tæ i wa ïaklam kiwi katwa daŋ choŋ dih cha u hapoh ka dukan cha kawa em mar pyrchah State Bank. Toh wa dap bru katæ ka dukan cha, wei khian ko, cha ō sñiaw u wa chit katæ ka pyrthai du nei daw wa ïa awri wara ki bru heitæ. Kamtæ dih pynsmat u ïa ka cha tæ dep u u su bai cha, lai wot u cha ka kari Olto u Ma Kian kawa da pynyēiñ pyn hakhmat State Bank.

Ynne ka sni, toh wa lai em kām u Ma Kian cha Laban tæ da phah u da ō u lai ïaw wa ka Maïa cha Jwai toh kwah ko u thied præsen ïa ka lok ko, ka Lana, kawa khawai snikha myntu ka janmiet. Mynda psiah u hapoh kari da sñiaw u wa nanjōr itæ i chit tæ wai lut u ki iit iōŋ ki dwar kari. La kattæ leh toh wa daŋ sñiaw lyŋ-a u, kbai wot u ïa u khynnah dai kot khubor uwa iēiñ pyn hajan itæ. Thied u kawi ka kot khubor taŋ wow iōh u u kawæh lyer ïa ō iōw sñiaw pynŋad u.

NAIT O...

Kat danḡchoṅ u heitæ pyrkhat u ïei wa da leh bha u Ma Kianḡ ïa ô uni u snem. Hadien wa da ē kti u Ma Kianḡ ha ô wow pyllai ïei khih ïei kreh waroh, nadôh ka dukan, ki par mō-ïoṅ wa ki trok ki ïoṅ ô, da bôh u da uwi tawan u Menejar u pait ha dukan. Da thied leh u ïa ô da ka thuk-thuk ïow suk u u lai kreh wan kreh. Ka oṅthai(mobile) leh da thied u ïa ô da kawa syad dor, taṅwa chimpōr ko ïa ô da ki taïaw u tip bha u pynemkām ka. Sñiawṅôh u chibōn ïow Ma Kianḡ wa da chaniah tylli tylla u ha ô.

Ïa ka Maïa leh, khein burom u kam ka diah (toh ô wa heh ïa ka chisnem). Ũ jôh pait u ïa ka dei khmat khlem akor. Leh u leh kat i wa phah kām ka ô. U ïaklam ïakhana wa ka leh ũ tip wara u lait nei kām, toh ô, sñiaw sarom u wei burom u ïa ka kawa da heh i kyrdan puræ. Em ki chynraṅ para chnoṅ, ki paralok u kiwa pynjaw ô wa ka, taṅwa ô ũ em u kam itæ i mysien ïa ka.

Katwa da ṅam wara u hei pyrkhat, ũ sñiaw dē u ïeitæ i chit, taṅwa da mih chit ha thṅa ha radaṅ u. Taṅwa wan ka Maïa leh ũ em u sñiaw u. Manda wai dwar ko tæ khyrṅiat u kruj næ. Ka Maïa da wai ko ïa ka dwar dien tæ bôh ko ïa kitæ ki ar tylli ki beg plastik wa rah laṅ ko hajroṅ sit tæ psiah khyrṅaṅ ko.

Pait u cha ka tæ kylli u, "Su lai noh i mo, kammon mo?"

NAIT O...

"Su lai wot na-onj," onj ko ia ō. Pteiñ wan ko deiwa onj, "Kat kani ka chit wei sma kani ka iaw, ū sñiaw neh chah dē. Lah u liwan ka cha chnonj." Chonj ko tæ khanj dwar wot ko.

U Lamchwa leh da pynim ia ka kari tæ bek u ia ka iow mih noh u. Heitæ wan wot u nonjanj ia katæ ka thawiēiñ tæ pan bai iēiñ u. U Lamchwa da ē da ka kot chipaw kawa da bōh khnanj u iei tæ, tæ pyns'uiñ u ka kari tæ lai wot ki.

Toh wa chynna u wa blok ka surok ha neiñ lad surok Laban, lai u na Kynrōhsaphlanj. Mynda lait ki ia ka Ladthadlaboh tæ kylli ka Maia. ia ō, "Ileh ūbien mi u lai shopping lanj wa ŋa næ?"

Khyruiñ khlieh u Lamchwa cha ka tæ onj u, "Yiw krum o?" Pait bianj u chakhmat deiwa kyllianj ia u kiar tæ pteiñ bianj u, "kat u pait pynsahnōd heh, ha wym em poisa ka u thied!"

Rap wot ka Maia, "Ileh? Da lut wot ka poisa mi? Boi waiañ khyllōd ware mi cha restaurant sæ?" klam danda ko ia ō.

U Lamchwa khlem jubab iei tæ. Sōhrkhai heh u dei sñiawdiaw tæ klam u hapoh mynsien u, "*Klam kat wa ŋait pho. Yiw tip pho iei jingeh ionj i kiwa tymbuiñ wa duna? U pynlut poisa o cha kitæ ki khyllōd mo, cha ka bei wa ki diah ionj ŋa mo?*"

NAIT O...

Lai ki kattæ khlem klam. Da nam ki hei jar-jær i pyrkhat. Mynda sdaŋ ki u poi ha Mō-Suwe iō ka Maia ia 3 nut ki lok ko, kiwa lai kjaŋ narōd narōd surok heh. Da rah ki leh ha kti ki mar iwi i beg plastik. Oŋ ko iōw Lamchwa u pynsaŋeh kari hajan wot ki tæ da saŋeh u. Pynhiar ko ka iit dwar tæ klam ko ia kawa em hajan dōh, "Hei Saka! Cheiwon ini?"

"O, da ka Maia," jubab ka Saka. "U lai i cha iōŋ ka Lana na-oŋ! Pha leh kam wymtip! Ū lai pho mo?" kylli wan da ka.

"Dawlai o stæ! Le, psiah hapoh kari, iōw lai laŋ i mynda dep sum o. Wym slem o, chibet hi eh!" oŋ ka Maia ia ka.

Kitæ le nut da psiah laŋ hapoh kari tæ lai laŋ ki cha iōŋ ka Maia .

I iun̄ ka Lana em i cha wa kut ka chnoŋ Mō-Suwe. I iun̄ leh iwa heh hi wei bōn kāmra. Ki bru wa chah khut cha katæ ka khawai sŋikha da ĩa sdaŋ ki u poi ha iun̄ ko. Ka bei wow pa ko ũ em ki ha iun̄. Em kām ki cha Shilloŋ.

Kat u poi ka Maïa wa ki lok ko ha iun̄ ka Lana, da rap em ki bru heitæ. Ki kari wa ĩeiñ chalaŋ leh da bōn. Ka Maïa wa ki lok ko da hiar na kari tæ lai ki chapoh iun̄. U Lamchwa da bek ĩa ka kari tæ pynĩeiñ u cha wymwit ki kari u lai-u wan. Da kwah liwan bha u taŋ wow ĩoh u sum toh da sma chit ka pran u, taŋwa hap ĩaŋ u hadōh wa dep libōh u ĩa ka Maïa cha iun̄. Kamtæ pynthiah u ĩa ka sit choŋ u tæ pynbait u ĩei pran u heitæ.

Ka Maïa wa ki lok da dep ē khublei sŋikha ĩa ka Lana dep tæ ē wot ki wa ki presen wa da rah ki ĩa ka. Oŋ ka Lana ĩa ki, "Ileh slem saŋ phi? I da dep ah wow cake."

Jubab ka Maïa, "Ham sñiawpher doi, ĩaleh hi i u pynsmat taŋwa u leh kāmmon. Da slem chwa na iun̄."

Rap ktien wot ka Lana, "To, ũpher, læ. Dih chwa da ka cha."

NAIT O...

Kat nanlai ki cha ka kāmra wa da pynkhreh cha, kylli ka Maïa ïa ka, "Tæ cheiwon ki? Ka bei wow pa phi?"

"Bōn kām ki cha Shillon," jubab ka Lana. "To pha yiw krum pho ki. Ha wym em wot ki sæ, ïoh i'u enjoy phull...næ!" klam ko dei sōhrkhai. ïarkhai lan wot ki heitæ.

I por da lai i. U Lamchwa da sñiaw ptai u ïan heitæ wei da sñiaw thjan u tæ mih wot u neitæ da ka kari ïow li dih cha ha dukan wa em charōd surok heh. Neitæ i daw, u bru u wa phah ka Lana ïow khut bamja ō u Lamchwa ū chem u ō. Pait u heitæ i thaw ïeiñ kari, tæ ū ïō u ïa ka kari ka Maïa leh. Kamtæ li- uiñ bian u chapoh iun.

Hapoh iun ka Lana dan chonchit katae ka khawai. Toh wa bōn ki khynrō khyllod wa wan heitæ, da ïatem ïachād. Kitu kiwa ïawan chijur, da chād ki deilan. Ka Maïa chon khana parom heh ko wa ki lok ha kawi ka kyndon deiwa pait khyrnan ïa kitæ kiwa chād.

Em ki khynrō chynran wa em buit sih. Da rah ki ïei kyiad 'Rum' ar klon. Lai ki sia næ hei thaw wa da bōh umsoh ki ïow dih ki nonwan. Uwi na ki uwa pyrtuit u Soni næ chim u iwi i Pepsi ha klon wa dan dap tæ dei wa dem hapoh miaj, theh u ïa itæ i Rum heitæ.

NAIT O...

Theh u ĩeitæ i umsoh wa da dep khlæh ha ki klat plastic wa da bõhlan ki heitæ, tæ dep u u theh ha ki sō tylli ki klat, On u ĩa u lok u dei ĩa kdaw cha wa chon ka Maia, "Dieh, li ē cha kitai ki kynthai wa chon cha kdon cheitai. Na ĩa katai em jinthmu o iōm." Kdaw khyrnan u dei khlieh cha ka Maia.

Utæ u lok u da rah kitæ ki klat ha ka Trē tæ li tyrwa ha ka Maia wa ki lok ko. Ki leh dei wym jōhkhe da dih ĩeitæ i pepsi wa dep khleh kyiad.

Cha lait, u Lamchwa da wan na dukan tæ da pyniēiñ bian u ka kari heijōh i thaw. Chon u ha sit deiwa wai dwar kari. U 'nai khatsōsynñiaw chynna u na khap ki lōm kseh hajan. Pait bēij u Lamchwa ĩei wa lai u na khap ki lyoh. Ki ñian rukdon nan kieh hajan iōn ō. Itæ i kieh iōn ki da khlæhlan wa ka sawa wa wan na iun ka Lana nei wa tem sur chād ki. Rhkai u samen samen toh kitæ ki ñian rukdon wymie ki u pyniatoh wa kitæ ki sur wa sawa na iun.

Wan ka Lana hei wa chon ka Maia tæ tñ ko ka wa kiwi leh iow iachād ki. Ka Maia tan wow pynkmen heh ĩa ka Lana tæ da chād iabor heh ko. Katwa nan chād ko da san itæ i kyiad u pynchit ka tæ da sñiaw chonchit i mysien ko. U Soni leh mar syniō u wa da chād ka Maia wa ki lok ko, da sōhrkhai u tæ da tia ki cha jan iow chād lan ki.

U Lamchwa da dem khlieh u ha sterin toh wa sñiaw

NAIT O...

synthiah u. Khai khlieh u tæ pait waje u ha ka oŋthai (mobile) iōŋ ō. Klam u samen dei wa pait cheilian iūŋ ka Lana, "Ileh slem ka Maïa itæ? Oŋ ki u li bam ja heh leh, kattæ kattæ saŋ slem ki? Ka bam iōŋ raikot yi kat kattæ? Halor wa da oŋ u ma ham pynslem leh. Chish!" Kyrŋah khlieh u heitæ dei wa iō silet iei wa sep ai itæ i por u.

Heitæ wot kieh ka oŋthai now Ma Kian tæ rap wot u. "Hoi Ma," klam u.

"Pait ŋa da poi o ha Jwai kattæ. Tæ iāŋ ŋa ha iūŋ mo wa em i kām wow batai o iā me u leh mynstep" klam i sur u Ma Kian ha ka oŋthai.

"To Ma" jubab u Lamchwa. "Tæ da wan bam khawai ka Maïa kattæ?" kylli pynsmat u Ma Kian chwa wow bōh u Lamchwa.

"O-hoh, Ma" Oŋ u Lamchwa. "Kattæ leh daŋ heitæ ka. Ŋa daŋ iāŋ o ka cha lait heini ha iūŋ ka Lana."

Oŋ wot u Ma Kian, "Oŋ iā ka ham slem næ mo. Phra chiteiñ toh u poi ko ha iūŋ."

"To, Ma" Oŋ u Lamchwa tæ pyndam wot u ka oŋthai.

Ka Maïa wa daŋchād choŋchit heitæ chynraŋ wa kynthai. Da chynna iei wa da iōh ka kyiad ka. U

NAIT O...

Soni leh da nanchlur u'tia cha ka tæ ksoh u ka ha kti tæ pynchād u ka. Ki lok u leh da chim ki mar kawī ka kynthai tæ ĩa chād 'Waltz' ki.

U Lamchwa da khai bian nei wa dem ha steriŋ. Da ban ware ka synthiah ō. Da pait waje bian u tæ klam u dei wa khyrŋiat, "Chish! La khynde waje saŋ! U lithōh noh o ka ĩa chrai pathan u ma ŋa." Īēiñ wot u nei wa choŋ tæ lai u cha iuŋ ka Lana.

Mynda psiah u Lamchwa hapoh kamra wa ĩachād ki, iō u ĩa ka Maia wa da sapdoŋ markhmat iow wi u chynraŋ, u wym tipmit u, dei wa ĩa chād ki jei næ. Pait u ĩei dur ko tæ iō u kām wa da múaid. Sñiaw sarom cha ō mynda iō' u ĩei tæ. Pyrkhāt u ĩei burom u Ma Kian tæ em i sñiawdiaw wei sñiawchrai u pyn ĩa ō hi. Lai u cha wa em ka Maia tæ klam u ĩa ka, "Pi liwan i."

Wymbōh wymsñiaw ka Maia ĩa ō, chim u ka na kti timun ko tæ tāt u ka iow ĩah liwan. Ksoh wot u Soni ka na tidiaŋ tæ oŋ u iow Lamchwa, "Me u yi? Ha wym kwah ko' u lai tæ ileh tan mi ka?"

Jubab u Lamchwa ĩa ō dei wa pyn-eh, "Me ham batai stad ĩei kam iuŋ kiwi. Ŋa leh o ĩei kāmram iōŋ ŋa, me leh i iōŋ me."

"***@###***," klam saŋ u Soni iow Lamchwa dei wa bok ĩa ō da ka timun taŋwa smat u Lamchwa u

NAIT O...

chah tæ ksoh u ka kti u Soni treit næ tæ khyrwait u ka chādien. Oṅ u iow Soni dei wa pyn-eh chōh chōh, "Ham pynjronṅ kitu ki kti mi, ia dōh p'than mi ki!"

U Soni da kynjrait, da ōd, wa sñiaw u iei wa kjut itæ i khyrwait u Lamchwa ia ka kti u.

Wan ka Lana heitæ tæ oṅ ko dei chrai, "Enough! Ham iachoh heini ha iuṅ o."

Pyllait wot u Lamchwa ia ka kti u Soni. U Soni leh da sympōd heitæ wa kjut. Ū nōd dē u u pyn-eh iow Lamchwa toh wa da mad u iei bor iōṅ ō.

Oṅ u Lamchwa ia ka Lana, "Ūtoḥ ṅa wa kwah iachoh." Pait u cha ka Maia tæ Oṅ u ia ka, "Pi lai noh i wa da slem ware kattæ ia chrai u pa phi."

"La chrai ladam u leh, ileh u sñiaw cha me? Nja danṅ kwah o'u enjoy chōh kattæ. Dieh me nanlai lada teiñ ware mi iow pa" jubab ka Maia ia ō dei chonṅchit.

U Lamchwa toh wym kwah de u, u iabōn nia ne pynjronṅ nia heitæ wa sñiaw sarom u, chim bait u ka ka Maia tæ rah u ka ha tūpha tæ mih u cha lait. Ki bru wa em heitæ leh da aṅ thalæ næ khlem tip de u leh iwon iwon. U Lamchwa toh uwa khlan bor wei eh ksah, toh da myllien u hei khih chitom wei rah khia, rah u ka kam wa tawah thad tawlia heh ha

ŊAIT O...

tūpha. Ka Maïa da khyrŋiat wymtip ko kāmmon u leh, suki heh ko.

Mynda poi cha lait, wiar itæ i khyrŋiat ko tæ dat ko dei kti ha rŋkhi u, taŋwa u Lamchwa wymsŋiaw u taŋ kām wa dait u mait leh ïei tæ i dat i choh ko. Phah pynhiar ka ō leh ũ ap de u. Poi ha kari, wai u ka dwar dien tæ pynthiah u ka heitæ. Psiah u hapoh kari, pynim pynsmat u ka kari tæ lai wot u. Kat u ïoh ka Maïa u khai tæ choŋ da poi ki ha surok heh.

Ka Maïa da thnum ïa ō hadien dei pait chrai cha ō wei oŋ ko leh da'u beh khih ko ō. U Lamchwa ũ bōh u ïei wa thnum wa tyrtah ko. Ō naŋïah u ka ka kari dei wa sōhrkhai samen samen ïei wa da leh u. Pait u ka na ka ïit wa em ha khmat tæ kyrŋah khlieh u dei wa sdaŋ u bōn pyrkhat.

Da poi ki ha iun̄ ka Maia. Sñiaw wiar u, itæ i syir
mynsien u myn da iō u wa ka kari u Ma Kian̄ ũ pū
em ko heitæ. U Lamchwa da dep thāp kari hapoh
thaw kset kari. Wai u ia ka dwar dien tæ chem u wa
da lai khmat ka Maia iam næ.

Dei wa sñiaw Maia kam ka diah u, sñiaw budnōd' u
u pynkhai ka. Rah wot u ka ha ki kti iōn̄ ō tæ psiah
u chapoh iun̄. Hei por wa chim u ka ha kti u sñiaw u
iei tæ wa sma jyrhah ko tæ put khmut wot u, toh
wa sñiaw kynchiñ u iei tæ i sma (ō toh u wymjōh
myllien u dih kyiad tæ kynchiñ u leh iei wa sma
ko). Poi ha dwar iun̄, da ialeh u u wai iow tala wer
næ da'u chabi wa da ksoh chwa u ha kti u.

Da pynthiah u Lamchwa ka ka Maia ha thawthiah
iōn̄ ka hi. Wymnōd u, u lōit wot ki juti ko leh.
Pynkup heh u ka da ka thadkup wa stan̄. Mynda
dep tymplæh u ia ki lait ha kamra ko, mih u tæ
khyrdep u ka dwar ko.

Lai u Lamchwa ha kamra chon̄ke tæ chon̄ u heitæ
hajron̄ Sofa. Dem u chapoh dei wa ksoh khlieh tæ
noh mynsien u dei iōn̄heh tæ klam u samen samen,
"Dan̄ slem ma-ai u wan u Ma? Tip kāmmon u on̄ u
ia ŋa lada tip u wa jia kamni tynne." Heitæ ñiam u
iei khmat u da ki sla kti u tæ chaniah u ha sofa. Da
ban ka ŋiah wei synthiah tæ wym sñiawthōh u tan̄
wa lai khmat u leh.

Ka sni da slem wa mih, u Lamchwa dan ban thiah hajron 'Sofa'. Psiah ka Maia heitae i kamra tae io ko iei wa thiah u heitae.

Pait ka o dei khmat wei pyrkhat wa che. Kynmo ko iei wa leh ko ynnin i mieth tae sniaw sarom ko pyn daka iaka. Ladym em u Lamchwa tae, tip kammon u man o ma-ai? Kylli ko puniaka.

Kynmo ko iei wa rah iubor u Lamchwa ka tae sniawthoh ko iei bor ion o. Pait ko o na kjat cha khlieh tae wan i sniaw skem-sniaw chaniah ko ha o. Dan heini sniawthoh ko, ileh wa chaniah tylli tylla u pa ko ha o. Neibhah da em u ka maiñ ha o. Lada toh uwa em jinmut sih, da ioh u u leh ka kat wa nait heipor wa iap kyiad ko. Tanwa u Lamchwa u em u loit u tan ki juti ko leh. Hei sniaw ion ka kattae, chem ko wa o toh u wa em akor em burom bha. Sdan ko u sniaw burom ia o. Sei maia leh da sdan i u sothied ha nod ha mysien ko tanwa dan heitae, u pu em u johkhe ko iei tae.

U Lamchwa kam u wa sniaw iei wa dun i khmat ko ia o, wai u ia ki khmat u, heitae i por tae io u da ka kynthai kawa miat dur wei io luilui bha kam ka puri blai. Nan mut u hei iempho em u itae, tae klam u kam u wa beij, "Cheiwon ini, he?"

NAIT O...

Rkhai ka Maïa ïa ô tæ oŋ ko dei wa jêi næ, "Ileh wom thiah mi ha 'Guest Room' heitai. Thiah mi kāmni tæ kjut doh mi na-oŋ?"

U Lamchwa da choŋ u dei bait heitæ ha sofa tæ da che iōŋ bru u. Pait u cha ka tæ iō u wa pher sakhiat ko heitæ. Iō u, i dur ko kām ka khynnah wa lului. Kobsar toh wa daŋ dep sum wot ko tæ iō pliah bha u ka.

Oŋ u ïa ka, "Iaŋ o iōw ma, tæ ũ sñiawthōh o taŋ wa lai khmat o leh!" Pait waje u ha ka oŋthai u tæ khyrŋiat u, "Ade! La 7:30 mo!" tæ khreh iēiñ u.

Kylli ka Maïa ïa ô, "U theh cha o ïa me?"

"Ieh ũ boi," Oŋ u Lamchwa. "U lai sum chwa o cha iūŋ wut næ tæ wan kreh wan o mo. Tæ u ma katnu waje wan u?" kylli u ïa ka.

"Ũ em u wan u. Ynne i step iōh o'u puræ ïa ka sms wa phah u. Oŋ u wa jōr ware ka blok tæ da sah miet u ha Jwai. Sa chibet tæ da wan hi u sæ," jubab ko.

Da iēiñ u tæ lai wot u. Poi u ha taksaw tæ sñiaw u iei wa khut ka Maïa ô, "Ei!" tæ khyruiñ dien u cha ka dei wa neh heijōh tæ oŋ u: "Ileh ma-ai?"

Oŋ ka Maïa ïa ô dei sur wa jem: "Ham khana iōw pa mo, iei wa jia ynnin. Ũ toh wa dih khnaŋ o. Wa leh

NAIT O...

buit tōh kitu ki chynraŋ. Khlæh kyiad ki ha kitu ki umsoh wa pyndih ki i. Da khana ka Lana ĩa ŋa ynne ĩei tæ."

"To ũ khana o," kular u Lamchwa. Ka Maĩa da sōhrkhai tæ chwa u ĩoh ko u oŋ khublei da ban bian u, "Phi leh husiar bha neini cha khmat; wa dabōn ware ki bru wa em jinmut wasih kamtu."

U Lamchwa da lai u katwa ka Maĩa bōd khmat ko ō hadōh wom chynna de ō. ĩēiñ pyrkhat ko heitæ chipor dei wa daŋ neh itæ i sōhrkhai deptæ lai wot ko cha kāmra ko. Kobsar da sdaŋ ko u noh i mon cha ō.

Ha kawī ka sñi, khai i kjut ka bei u Lamchwa. Kamtæ, chwa u liwan u katae ka janmīet cha iun, pan bor u na u ma Kian iow pep kreh u mynstep iow li iah lithōh dawai u ia ka bei u.

U ma Kian leh da ky'i u dei wa sai khyrñan san hajar tyñka na kata tæ ē ha ō. "Chim kani ioh mi u pynemkām meitæ," oñ u.

U Lamchwa da chim ia katae ka poisa deiwa oñ khublei chibōn næ, deptæ lai liwan wot u da ka thuk-thuk kawa thied u ma Kian ia ō.

Ila ka step kylla, danstep, da duk u ma Kian u li pait khih da ō cha lōm. Da lai u da ka Gypsy cheitæ i thaw wa khih u cha khlō. Ilei thaw wa la-ñam ka surok, chem u da ki mō wa ki dein kiwa da khañ luti ia ō ha pyrdi surok. Pynsañeh u ia ka kari tæ hiar u, iow pynkynriah ia ki mō charōd iow lait u'u lai.

Katwa dan pynkynriah u iow wi na kitæ ki mō, iō u wa mih lē ñut ki bru napoh khap khlō harōd surok, uwi na kitæ pyniñ u da ka pistol cha ō. U ma Kian da iēiñ bait heitæ deiwa tēiñ.

NAIT O...

Myn da poi ki hajan tæ tipmit u ō u Rokki tæ oŋ u ĩa ō, "Hanpaĭa da me u nonjtōh! Da kylla nonjlute wan mi mo!"

U Rokki khlem ap ĩei wa klam u ma Kian da ksoh u ō ha kti wei pynĭan pistol ha chkōr u. Oŋ u ĩa ō: "Da slem ĩan o, ĩa kani ka kabu, wow chim tput o ĩei pynjah burom mi ŋa hakhmat u Lamchwa!"

Jubab u ma Kian: "Kammon u pynjah burom o me? Hawa taŋ ka burom mi leh ũ em?"

"O kām̄tæ sæ!" rap ktien u Rokki. "Kor utu u ksaw Lamchwa sæ ban ĩa ŋa u wa da kreh ĩa me da bōn snem!"

"Ha-o!" Oŋ u ma Kian deisur wa khor. "Kor u ksaw wa burom iow trē ban iow psēiñ u wa pōh ĩa ka kti ka wa ē dud ĩa ō!"

U Rokki da kob diñ u lep næ mynda sñiaw u ĩei tæ i kyntien. Klam u dei kyrha: "U psēiñ oŋ mi! U pseĩñ!" oŋ u sa chisien deiwa ksoh tæ pynkhih u iow ma Kian iōŋ heh. "Kattu sæ u mad mi ĩei bih iōŋ u tæ u psēiñ!" E dak u ĩa ki nonjbōd iōŋ ō dei wa oŋ ĩa ki: "Kdoh o!"

Ki nonjbōd u da tia chakhmat, uwi na kitæ uwa sin ki u Buda næ da lōit ĩa ka thad wa kdoh khlieh u tæ kdoh u ĩa ki kti u ma Kian cha dien rŋŋkhi u. Katwa

NAIT O...

naŋ leh u ĩei tæ, sow wi tawan uwa sin ki u Raju næ, naŋ ksoh u ô u ma Kian ĩow ũ ĩoh de u'u phet.

Mynda dep ki ô u kdoh, oŋ u Rokki ĩa ô dei lai khyrŋaŋ chajan u, "Kattu tæ... u pynbor o ĩa ka khon mi u ĩa choŋ wa ŋa, wym ĩohsa ko... manda ĩô ko wa u Pa ko em u, ha kti ĩoŋ ŋa" da ksoh u ô na dien tæ klam u ha chkôr u ma Kian, ".....ĩow oŋ wan o ĩa me Kipa næ.... Ha! Ha! Ha!" Rkhai u ĩoŋheh ĩoŋheh katwa u ma Kian naŋ pait chrai cha ô. Pteifñ bian u Rokki u klam, "Mynda dep ĩei tæ i kām, tæ u pynĭap wot o me wa ka khon mi ĩow sah ka spah ka phaw mi ĩa ŋa waroh! Ha! Ha!! Ha!!!" Rakhai pynchrai pyn-iñ u ĩow ma Kian.

U ma Kian leh sam chrai u ĩa ô, tæ oŋ u, "Ham ĩemphô! Wa, iwa mut wathmu mi u ĩoh mi ki; kat daŋ em daŋĭô ki khmat o, ũ ĩe mi la kammom kammon leh!"

"Ha! Ha!! Ha!!! O pli kipa... oŋ mot, em wa ĩe hi me u pyllait na kti ĩoŋ ŋa?"

Heitæ sñiaw ki ĩei wa kieh ka thuk-thuk tæ khyruiñ ki cheitæ i lian. ĩô ki wa wan ko cha ki dei her smat bha, ĩ'u wa ĩah thuk-thuk ũ tipmit ki ô, wa sap helmet u. Wan bait kataæ ka thuk-thuk tæ mut ko'u tynrah ĩow Rokki. Nei wa ĩaid u ka, tæ toh ha kti wa ksoh pistol u tæ hāp ka ô. Ô leh da pat u sbek næ ha

NAIT O...

madan dei wa takhōh i khlieh u pyn how tæ u mō
wa pynieiñ ki ha surok. Dawiar iōnbru u chipor.

U Buda wow Raju da pyllait iei wa ksoh ki iow ma
Kian tæ lai ki cha utæ u waiah thuk-thuk dei wa
mut u dat ō. Utæ u waiah thuk-thuk da pyns-uiñ ia
ka, tæ hiar u wut næ tæ mareh u cha wa em ki dei
wa pynher ki kjat cha jron iow kynjat ki. Toh ka
kjat u ha khlieh u Buda tæ sied u Buda charōd, u
Raju da sai tari iow dun ia u waiah thuk-thuk.

Kat dan iachoh ki heitæ, u ma Kian deiwa kynjrait
ki kti da lait u neitæ wa kdoh ki ō. Chim pynsmat u
iow deiñ na madan tæ li rap u iow tæ u wa iarap ia
ō. Lai u cha'u Buda tæ bom u ō da utæ u deiñ hadōh
wa pan map u Buda.

U Raju da tynrah da ka tari tanwa da iaid u tæ u
waiah thuk-thuk ō. Mynda tynrah u sa chisien da
iōh u u ksoh ka kti u tæ tynkhaiñ ka.

U Rokki da che iōn bru u tæ da khai, pait u ia ki lok
u, sa du kiwa da dawa u lai hospital kam ō. Da
sñiawthōh u wa ynne ū toh ka sji iōn ō, tæ khut u
ki, iow iut, tæ phet ki neitæ.

Utæ uwa iah thuk thuk da li chim ia katae ka pistol,
deiwa sap ka dei rumal iōn ō tæ thāp u ha kata,
deptæ lōit helmet u wa da sñiaw chit ware u heitæ i
iadat iachoh.

NAIT O...

Khyrñiat u ma Kian mynda iō u hanpaia dow Lamchwa, dei sōhrkhai u ia ō.

Oñ u ma Kian, "La dym em mi yntu tæ... tip kāmmon u jia ia ña wa ka khon o. U Blai hi wa phah me cheini."

"Toh hi Ma, iwa oñ phi," rapktien u Lamchwa. "Iō phi, ña leh wa mylliñ o u ē ki chabi dukan wa ki risit ha phi ynnin, hei iatoh wow su noñ. Da phōn o phi ynne i step tæ 'not reachable' bait. Mynda phōn o ia ka Maia tæ oñ ko wa da lai phi cheini næ tæ wan bait o cheini. Kamtæ, da phah o dow Marbōd u lai wa ka bei."

Da ky'i u Ma Kian iow Lamchwa dei wa nañ sñiawñōh chōh chōh ñei wa da lait u neini i jingma. Nañ jōr itæ i sñiaw maia, i burom, wei chaniah ha'u Lamchwa. Oñ u, "Pi meitæ lai i cha Thanat ioh u pyntip i cha ki pulit, wow ē i leh ia kani ka pistol cha ki."

U Ma Kian da bek ia ka Gypsy tæ da lai cha khmat katwa u Lamchwa wan nañ bōd nadien iōñ ō.

Ka Pynhun da hiar ko ha Lad Mō-Suwe na ka indika wa choŋ ko, kawa kamāi Shillong-Lad Rymbai. Da rah ko ha kti ko wa ka 'airbag' wahēh. Lai ko cha ka sāid u driver tæ chim ko ia ka poisa wa biah u ia ka. Ka indika da lai, ka pynhun leh da lai cha dukan ka wa em pyn hajan toh wa iō ko wa dai richaj ki. Pan ko da kawa chispah chiphaw kawa iōh 'full talktime'.

Mynda dep ki u richaj, tæ phōn ko ia ka paralok ko, ka Maia.

Ka oŋthai ka Maia da riŋ tæ du wa iō iei nambar ka Pynhun ka leh da klam marbait, "Ei Pynhun, heiwon em pho kattæ?"

Jubab ka Pynhun: "Heini ha lad Mō-Suwe em o, ha dukan PCO ini."

"Iaŋ heitu mo, iow phah lithōh o pha kattæ wot," rap ktien ka Maia tæ pyndam wot ko ka oŋthai.

U Lamchwa daŋ kheĩŋ jĩŋkheĩŋ u ha ka 'calculator' ha kāmra pdeiŋ; em wa ki kot ki sla ha jroŋ miaj. Psiah ka Maia heitæ i kāmra tæ pait u cha ka.

Oŋ ko ia ō, "Lam, dieh me li thōh ka ka paralok o na Lad Mō-Suwe, em ko ha PCO heitu. I pyrtuit ko, ka

ŊAIT O...

Pynhun næ synnæ, dieh lai kattæ wot, ieh ŋa pait heini."

Oŋ u Lamchwa: "To meitæ." Īēiñ u, tæ mih wot u neitæ.

Ka Pynhun daŋ Īēiñ ko ha lait heitæ ha dukan PCO dei wa pait chawah chaneĩ. Wan u Lamchwa heitæ da ka kari tæ saŋeh u. Du wa ĩō u ĩa ka kynthai wa Īēiñ ha lait wa ka muna 'airbag' da tikna u wa katai tæ da toh bait katae ka Pynhun næ. Mih u na kari tæ ka leh da pait ko cha ō. Da neh i ĩa pait ki para ki chipor.

Klam chwa da ō ĩa ka: "Pha katae ka Pynhun?"

Jubab pynsmat ko: "Ha-o."

Khlem ĩaŋ de, da chim u ka muna 'airbag' ko, tæ oŋ u ĩa ka: "Le choŋ noh hapoh kari."

Ka da bōd ĩa ō, dabōh u ĩa ka airbag hajroŋ sit dien tæ li choŋ noh u ha sit draibar tæ ka leh da choŋ ha sit dien. Pynim u ĩa ka kari tæ bek u ka ĩow lai noh ki cha ĩuŋ ka Maia.

Ka Maïa wa ka Pynhun dan ïadih cha ki ha kāmra bam, u ma Kian leh da em u ha iun tæ ïa dihcha lan u wa ki. Ka Maïa dep ko u theh cha ïa ka Pynhun tæ kylli ko ïa ka: "Katwon sni u chim por pho'u pyndep ki kām pho?"

Bōh ka Pynhun ïa ka khuri cha hajron piris tæ jubab ko: "Ini chuh tæ... chi taiaw tharai, watoh da'u pyllan spesimen o doi iow ioh u test ha Lab. Dan duk hi o u wan man u bnai; hadōh wa dep hi sæ ïa ka thon kāmwa da bōh."

U ma Kian wa ka Maïa nan pait cha ka katwa dan klam ko. "To pha ham awri ïei tæ, iō'u phah o dow Lamchwa u ïah pha cha ki thaw wa emkām pho," on u Ma Kian.

"Khublei chibōn Ma! Kamjōh leh iapha, Maïa. Wa em phi cheini tæ katwon suk ki kām ki jām iōn ŋa." Klam ka Pynhun dei wa sōhrkhai.

Ka Maïa leh dei wa sōhrkhai da iēiñ nei wa choŋ tæ on ko, "To pha... kam ïei tæ leh, ladm iārap i ïa pha ka lok wamaïa tæ... ïei yi thij?"

Ka Pynhun wa u Lamchwa em ki ha kawi ka wah khian. Kani ka wah kawa khut ki ka Wah Suwe mih ko na kawi ka khlō Landoh ka wom em u jñai neitæ wa em ki kattæ. Ka Pynhun dan chon dur ko da ka 'Digital Camera' ña ka Wah Suwe wa ki sōdoñ-sōkun ñoñ ka. Kjut nōd ko'u pait ñei wa jakhlia ka um.

U Lamchwa da pynhiar u ña ka muna ka Pynhun kawa keiñ u ha tūpha tæ li bōh u hajan ñoñ ka. Chim ko ña katae ka syndup tæ sai ko ña ki kloñ khian wa ki muna plastik khian neitæ. Pyndap ko ha kitæ ki kloñ khian da ka um wa toñ ko na wah tæ kset bian ko ki. Sai ko sa kiwi tawan ki tiar wa pynemkām ñow tes ña ka um wa i khyndaw tæ leh ko ñei wa toh u leh kām wa da chah sikai ko ha University.

Kat nañ bōnkām ka Pynhun hei leh ña kitæ ki eksperimen ñoñ ka, u Lamchwa nañ pait beit cha ka ñei wa leh ko; mih itæ i sñiaw silet ñoñ ō toh wom em u ñoh lad u u lai skur. Mih leh itæ i sñiaw burom u ña ka, toh wa da heh itæ i kyrdan puræ ko. Sñiaw bēij u tañ u kylli leh na ka, iyi i jñmut itu wa leh ko. Kamtæ ñeiñ u heijōh i thaw kam u dēiñ, khlem khih. Kat nañ pait u, nañ ñap bēij u.

Mynda pait u cha i dur khmat wan ko, sñiaw u wa kái chit hapoh rupai ñoñ ō. Tba u ha rupai u, ũ em kat iwa em leh, hanpaia itæ i chit wa rhem toh iwa

NAIT O...

napoh mysien u ūtoḥ na lait. Khyrñiat u heitæ toḥ wom jōḥ em ka kynthai kawa pynman ïa ō kām̄tæ kām̄ wa sñiaw u kattæ; paitsah u cha ka kam u bēij. Lada pait ïei khmat ïoṅ ō, u ïō phi ïei wa da her i jīṅmut jīṅpyrkhat u cha jñai. Da sdaṅ u'u ïemphō dei sñi. Kobsar da rwaï da chād u kām̄ chapoh phlim.

Ka Pynhun da dep ko ïei kām̄ ïoṅ ka heitæ. Pait ko cha wa em u Lamchwa tæ ïō ko ïei wa pait u cha ka kalæ næ.

"Hei! Iyi ïoh mi u pait kamtu?" klam ko ïa ō.

U Lamchwa da klam dei khyrñiat: "Eh'e!" Dem u i khlieh u chapoh dei sōhrkhai pyn ïa ō hi tæ oṅ wan u ïa ka: "Pait heh o n'oṅ, ïei wa leh pho; i kiwa bēij wa them tæ... ũ sñiawthōḥ i n'oṅ ïei kām̄ ïoṅphi kiwa stad wa jha!"

Da lai u cha ka ïow chim noḥ ka muna kawa da dep ko u pynlum pyllaṅ. Ë ka Pynhun ïa ka muna ha ō tæ ïa lai wot ki cha neiñ chōḥ ïoh'u ptēiñ ko ïa ki eksperimen ïoṅ ka.

Katwa daṅ kām̄ ki narōd narōd ka Wah Suwe, batai ko ïa ō kām̄ni ne: "Īō mi, i jīṅthmu ïoṅ ḡa te kwah o'u pait em mo itæ i jīṅiatoh ka chait ka naṅ ïoṅ ki noṅchoṅ-chnoṅ cheini wa kani ka rukom tih mar khyndaw ki."

NAIT O...

Kat nan batai ko ia o chapnan ka Bei Rym-aw wa ki spah wa-im ion ka, u Lamchwa nan pait beij cha ka. Pait u cha ki khmat, i khmut wa i ktien ko, tæ nan iap beij choh choh u ia ka. Rhem wei tyrchiah i khmat ko kat nan batai ko ia o. Mynda ap u lei wa batai ko, nan jor itæ i sniaw burom u ia ka, toh wachæ ki jinmut ion o neiwa batai ko.

Mynda poi ki ha kawi ka liar kawa noh ha Wah Suwe, tæ saneh ka Pynhun u kâb, o leh da saneh tæ pait cha ka.

"To pynhiar katu ka muna iow leh o heini wan," on ko ia o.

U Lamchwa da pynhiar ka muna tæ da iarap u ia ka, u sai ki tiar ki tar napoh muna. Hikai ko ia o u leh ki tes kiwa suk deiwa batai khyrnan kâmmon u leh. Kamtæ lut ka sni ki, hei leh ia ki tes na kawi ka thaw cha kawi dei wa chondur khyrnan ka Pynhun ha man ki thaw wa leh eksperimen ko. Mynda jan sep ka sni tæ liwan noh ki.

Ha katæ ka miet katwa daŋ iabamja laŋ ki, kylli u ma Kianj ia ka: "Kammon lai i kām pho ynne, Pynhun?"

Jubab ka Pynhun: "Bianj bha, Ma. Sei wi leh, ioh iarap bha o na'u Lamchwa toh wa smat u u tip iei kām iōŋ ŋa, da hikai o ia ō kattu katni ki tes kiwa suk, tæ da leh bait da ō tæ suk cha ŋa!"

"Da oŋ o ia pha n'oŋ?" rap ktien ka Maia, "Lai pho wa ō tæ u suk ia pha hi!"

Ka Pynhun ky'i heh ko dei sōhr'khai. Ōŋ u Ma Kianj: "U Lamchwa toh u wa chalak, hei sih bhah u pli wasmat iap u pa ki, tæ duk u'u pep skur iow pusa ia ka bei u wa ki diah u. Seiwi leh, toh u bru u wa khōid wa bait mynsien, u wom jōh thok, tæ embhah o u ioh noŋkreh kam ō."

Ka Maia wa ka Pynhun da ksoh iei wa klam u ma Kianj dei wa lai jar i pyrkhath katwa naŋ bam ja ki. Hadien chibet por kylli wan u ma Kianj ia ka Pynhun: "Tæ iyi ioh pho u chem ynne?"

"Kattæ chuh tæ... wom pu i'e'u oŋ," jubab ka Pynhun, "Daŋ hap tes o kini ki 'sample' wa da pyllaŋ o tæ u i'e o'u pynchē iaphi. Kawi heh kawa da tikna o'u oŋ, wa ka Wah Suwe tæ da iap ko."

NAIT O...

"Iyi mut pho itæ?" kylli u Ma Kian dei wom sñiawthōh ïei wa klam ko.

"Īō phi' ma..." rap ka Pynhun, "ka um ha Wah Suwe daman ko ka um 'acid'. Kamtæ, ki wa-im wapār ū ĩe de ki u im ha ka. Neitæ'i daw, wom em de iwi wot ki wasah waneh ha ka."

U Ma Kian da choh jinmut itæ wa batai ka Pynhun tæ kylli bian u, "Ileh man ko kām tæ?"

"Phi leh em bynta hi phi hei jinlon jinman ka Wah Suwe katni," jubab ka Pynhun dei wa klam jñai.

U ma Kian wa ka Maia da pait bēij cha ka, kamtæ oñ ka Pynhun, "I daw wa da ĩap ka Wah Suwe toh na ka rukom tih mōioñ wa ka rukom stok mō phi. Īō phi ma, u mōioñ em ha ō katae kawa oñ i ka 'pyrite' ne 'Iron sulphite', manda toh um u, mih ka 'acid' kawa oñ i ka 'Sulphuric Acid'. Seiwi leh, u mōioñ toh u 'Carbon', ō leh kylla u cha ka 'Carbonic acid' mynda khlæh u wa ka um, manda hāp u slap, tōid ka um na kini ki mōioñ cha ki liar ki dōid tæ pynkylla acid ki ĩa ka um heitæ. Īa kani oñ i ĩa ka, ka 'Acid Mine Drainage' næ ka 'Acid Rock Drainage'. Hawa kamtæ, pynĩap ki ĩa ki jinthaw wa-im kiwa em ha ki liar, ki dōid wa ki wah." Katwa dañ klam ko, da sō wa ki ñab ki khmat ko toh wa luñ i mynsien ko u pyrkhāt ïei wa leh beĩñ u bru ĩa ka Bei Rym-aw.

NAIT O...

Ka Maïa tæ da tip hi ko ïei ni waroh tanwa ũ jōh bōh, jōh bna ko ki. U ma Kian da pyrkhāt ïei wa oŋ ka Pynhun tæ kylli u ïa ka, "Hawa kamtæ, u dam noh i u tih mōïoŋ? U dōh khih cha i na oŋ?"

"Toh poŋ u dam phi!" jubab pynsmat ka Pynhun. "U tih tæ u tih hi sæ! U pynkylla heh ïei rukom tih wei rukom stok mō won sæ. Pait, iyi wa jia ha ka chnoŋ Chken Lakeh! Da ōr da twa ki iuŋ ki sem iōŋ ki na-oŋ! Neiwa tih kulmar ki, wat hapoh chnoŋ hapoh thaw leh!"

"Pynche mot ïa ŋa, Pynhun, ŋa tæ ũ sñiawthōh de o ïei jiqmut pho," oŋ u ma Kian.

Ka Pynhun daŋ kjap doh ko heitæ i por tæ ïaŋ ko hadōh wa dep ŋōid ko ïeitæ tæ klam ko, "Iō phi ma... ka rukom stok mō phi katni toh kawa bakla bha, neibhah, bōh heh phi cha madan. Kamtæ, mynda hāp u slap, tæ tōid ka um neitæ cha ki liar ki wah, neitæ pynsih ko tēr la patēr. Ileh ma, ũ chna phi da ki trep iow stok phi ïa ka mō iōŋ phi?" Oŋ bian ka Pynhun, "Katnu hi eh u lut phi? Ūtoŋ na oŋ iwow lut ware? Neibhah emkām u tymmoh hi eh nei ioh u slap. Lada waroh kiwa em stok mōïoŋ u leh ki kamtæ, da lait kini ki jait acid u mih wow tōid na ki stok mōïoŋ! Phi leh, toh u chim phi ïa kani kam ka sukylliaŋ ïei wa da ē sñiawbha ka Bei Rymaw ïa phi ïa ka spah iōŋ ka. Seiwi wan leh, hawa man acid ki umbam umdih, ktah ko ïei chait i naŋ

NAIT O...

ïon i, ïonphi hi ki nonchon chnon, mih ki jait kjut wabōnjait bōnskær, khamtam ktah ko ïow kpoh wa ki snier. Pait tan ha phi leh, man ka por jōh ōd tyrha phi ha kpoh ha rupai, boi da leh ka um acid phi na-on?" Klam ka Pynhun dei chonchit.

U Ma Kian dan kjap ja wei pyrkhat khyrnan ïei wa on ka Pynhun tæ on u ïa ka, "Du wa da pynche pho kamtæ, na pyn mynstep u phah chna trep noh o ha ki stok mōion ïon na waroh. Daw on o leh ïa ki lok ïon na u leh ki kamjōh, lada nait ki sæ."

Ka Pynhun da phōh dei kmen wei sōhr'khai tæ on ko ïa ō, "Sñiawsuk o wa pdian phi ïeiwa na thran sakhiat o, wa dapiah u nōd i mynsien o, wow iō ïeiman i lon wajæt wapa ka Rym-aw Rymchi. Lada waroh ki malik mōion u em ki itæ i mynsien kam wa em phi tæ..." Da bam pyndep ko ïei ja ko tæ ïeifn ko ïow li sait kti.

Ka Maia leh da ïeifn ïow sait kti. Mynda dep ki u sait kti, lai ki cha kamra pdēifn tæ pait tibi ki. U ma Kian, deiwa chim khia, pyrkhat u ïei wa klam ka Pynhun tæ slem u, u bam ja.

Waroh ki wa ha iun da iohthiah ki. U Lamchwa wan samen dan pait. Thiah u hajron chylliah wa da sian u ha madan ha chynkōh. Pisa i mynsien u, womtip u ileh wa mih chit i doh i pran u ha katae ka miet. Sñiaw u leh iei wa sōh i rupai ion o kam wa em wa kshih ia u tor ion o. Hei jinmut ion o mut u wa em i kjut wa ioh o, tanwa u tip wan u i kjut yi.

Toh wom kwah u'u pynwit ia ka bei ne ki diah ion o hei por thiah ki, khai u neiwa thiah tae lai u cha kamra chet. Thoh u ia i dawai in-doh na ka beg plastik wa wah ki ha kajar ha chram tae dih u uwi tae lai thiah bian u.

Da ialeh u'u thiah, tanwa u lai khmat u. I jinmut u her bait ki cha ka Pynhun. U sñiawthoh de u ileh wa lai i pyrkhut u du cha ka. Em ki kynthai para chnon u kiwa joh e lain ia o tanwa u joh boh johbna u ki, toh wa da raikut u samen samen toh wom bien u'u chonkha chonkurim kat wom pu ioh khih ki diah ion o. Kamtae, da hun bait u'u im samen han la ki para r'ta ion o da ioh ki wa ki khon ki nat.

Kynmo u leh ia kawi kawa jia hei jinim ion o dan arsnem nachwa. Lai em kam u cha iun u Wahch Chnon, manda poi u heitae, chem u wa u em u heitae. Em katae wot ka khon wasdiah u Wahch Chnon ha iun du samen. Katae leh kawa em jinmut

NAIT O...

ĭa ō taŋwa u Lamchwa ũ em u bna u ĭei tæ. Mynda psiah u ha ĭuŋ ĭō u du ka heh. Ka leh kmen bha ko wa wan u.

Mynda kylli u ĭow pa ko, tæ oŋ ko wa da lai kreh u, tæ mut u Lamchwa u mih noh neitæ, tæ ksoh wot ko ō deiwa oŋ ĭa ō, "Alæ na-oŋ, choŋ, thiah wa ŋa, kam kani ka lād, cheiwon de u ĭoh i ki?"

U Lamchwa da khyrŋiat, toh wom em u, kam itæ i jĭŋmut ĭa ka. Kamtæ, oŋ u ĭa ka, "Pait cheini, ŋa wom em u wan o cheini nei bhah ĭoŋpha, wan o neibhah i kām ĭoŋ ŋa hi. Sñiawbha pyllait ĭa ŋa toh wom em jĭŋmut o ĭa pha kamni." Pyllait jubor u ĭei wa ksoh ka ō tæ ĭut pynsmat u neitæ.

"Ish! Nuwa bien o ka tæ, da suk bha o katni!" klam u samen samen hapoh mynsien. "Taŋwa, bian hi wa lait o na ka. I jĭŋloŋ ko leh kam ka kusbi!" klam pynhun u pun ĭa ō.

Wan bian itæ i pyrkhāt u cha ka Pynhun, kynmō u ĭei rukom phalaŋ ki khmat ko katwa daŋ batai ko ĭa ō chaphaŋ ka Bei Rym-aw wa ki kām ĭoŋ ka. Ō leh sñiaw ĭatoh bha u ĭei wa oŋ ko ĭa ō.

Em itæ i jĭŋmut u kawa oŋ ĭa ō, "Phōn cha ka næ, khana ĭei wa sñiaw mi!" Taŋwa, ka budia ĭoŋ ō oŋ ko, "Mut mi u bien ko kam me? Uwa bēij waklæ? Uwa tymbuiñ wa duna?"

NAIT O...

Kamtæ, kulmar jinmut u samen samen. Syrpe u ïei
rupai ïonj ò deiwa sōhr'khai u samen samen. Kat
heitæ sñiaw u da wiar itæ i sōh rupai u, da wiar itæ
i iñ doh u, tæ da sdaŋ u u lai khmat.

Ka Pynhun da lai ko hapoh um deiwa rah ha kti ko ïa kawi ka tiar ka wa mut ko u pynnam ha um, ïoh ko u leh ïa kawi ka tes ïon ka. Ha khriaŋ ka um wa kiñ bha ha pyrdi thwai tæ nam ko heitæ. U Lamchwa wa em haröd wah da ïö ïei tæ, tæ kbaï u ïonheh, "Pynhun!" Heitæ khyrŋiat u khrij næ tæ khai u na wa thiah.

Pait u ïa ka waje wa em ha chram chynkôh tæ nan khyrŋiat chôh chôh u. "Ari! La khynde waje san! Tip kammon u on ka Pynhun ïa na ma-ai?"

Khai wot u neitæ tæ li sait khamat u cha lait. ïö u ïa ka bei u wa dan lum surö ko ïei dwar i pchem, kylli u ïa ka, "Ka Salan wow Marböd da lai ki bei?"

"Ha-o," jubab ka bei u. "Wom kwah ki'u pynwit ïei thiah mi tæ lai ki khlem klañ ïa me. Kopsar niah bha mi ynnin, yndæ khon?" kylli ka bei u deiwa sñiaw awri ha mynsien.

"Û-em dei bei, wa slem o'u laikmat tæ slem o'u khai," jubab u Lamchwa.

Ka bei u pait hi eh ko cha ö tæ chynna ko ïei wa ïellu ki khmat u tæ syir i mynsien ko tanwa ù bien ko u kylli takit ware toh wa ïö ko wa da jhan u khon ko.

NAIT O...

Mynda dep sait khmat kyrchut lamēiñ u, tæ kyllian sula wot u tæ mih u na iun iow lai noh u. Poi u ha pchem tæ kylli ka bei u, "Ileh, ũ bam ja mi khon?"

"O-hoh bei," jubab u Lamchwa deiwa kap khyrnan cha wa em ka thuk thuk u, "Ieh, bam wan ka chibet cha dukan leh, wa da slem o kattæ, ka Pynhun ũ dam de ko u sñiawchrai iana katæ."

"Tip kayi katæ ka Pynhun ma-ai? Ynne leh sñiaw o kam wa kbai u ia ka nawa thiah. Dam u khon o tan u khai bēij! A Blai! Ham ieh ham chah u man u khon o kamtæ." klam ka bei hapoh mysien ko deiwa pait iei wa 'start' thuk thuk u, tæ lai wot u.



Ka Pynhun da dail ko ïa ka nambar u Lamchwa. Da sñiaw ko ïei wa riñ ka oñthai u tañwa ù em wa rap. Dail bian ko sa chisien, hadien neitæ da em wa rap tæ klam, "Hello!"

Ka Pynhun da khyrñiat ko u sñiaw dei sur ïoñ kynthai u rap ha ka phōn u Lamchwa tæ chim por ko u jubab, toh wa em leh itæ i sñiaw ko kammon tahi ha mynsien ko kawa pynwit ïa ka.

"Hello!" klam bian kataæ ka sur ha phōn ïoñ ka.

"O, hello... pait ña ka Pynhun wa klam, mo, mut o'u klam iow Lamchwa," klam ka Pynhun ha phōn.

Ka bei u Lamchwa du wa sñiaw wa oñ ko wa toh ka Pynhun tæ da sōhr'khai, tæ oñ ko, "O... u Lamchwa da mih u na ïuñ, da oñ u leh 'wa da'u çhrai pho ò, tæ.. kopsar, hei jhan waræu, tæ mylliñ u ça phōn u ha ïuñ. Ña ka bei u wa klám."

Ka Pynhun mynda sñiaw ko ïei tæ, da wiar itæ i sñiaw wit ha mynsien ko tæ klam ko dei wa kmen, "O... kamtæ mo paia! To, leh ïañ baiṭ o ò meitæ! Mo!"

"To..." jubab ka bei u Lamchwa tæ bōh wat ko ïa ka phōn tæ klam ko hapoh mynsien ko, "Tañ nei sur

ŊAIT O...

**ko leh mutdur o kani ka Pynhun toh kawa jemnōd.
Boi katæ sæ ka Pynhun kawa kyrsu thiah ĩa ō ynne
hei ĩemphō u. A ne khon, embhah ĩow pynhun
sakhiat kani ka Pynhun me."**

U Lamchwa da poi hakhmat iun u ma Kian, da chynna u ia ka Pynhun ha balkoni armala wa da ian ko ia o. Em i sniawtein ha mysien u, boi pyrkhat sih ko ia o.

Ka leh da io koiei wa wan u tæ hiar ko na armala tæ iachem ki ha pchem.

Da pyniein u ia ka thuk thuk ion o harod tæ kap u cha wa em ka kari Bolero u ma Kian. Khlem klam ia o tan chi kyntien leh, e ko ha o iow chabi ka Bolero u ma Kian kawa da pyllait u neibhah u pynemkamiei kam ka Pynhun. O leh chim u ia ka muna ion ka, wa u chabi tæ wai u ia ka dwar iow psiah ko.

Katwa nan lai ka kari, ka Pynhun dan io bon pyrkhat bha ka. Ka leh, u em u ioh thiah bha ko toh wa pyrkhat ware koiei bhah u Lamchwa. Da kylli ko leh na ka Maia Chapman ion o wa ka iun ka sem u katwa dan ia parom ki ynne i miet chwa u thiah ki. Iyi iwa taniei mysien ko cha o tohiei jinlon khynnah i mysien u.

Kynmo ko, wa ynnin kammon i rukom pait u ia ka, utoh kamwa pait kiwi tawan ki khyllod chynran ia ka. I rukom pait u Lamchwa ia ka che ki ha ki khmat ion o, chynna koiei mysien wakhoid wa suba ion o; chynna koiei wa em i sniaw u ia ka,

NAIT O...

taŋwa ũ tikna ko toh neiwa burom u ĩa ka næ... em sakhiat itæ i sñiaw u deiwi tawan mo. Ũ nōd de ko taŋ u pait cha ō leh toh wa tēiñ ko ĩa chynna u ĩei wa sñiaw kyrbeh ko du wa em u hajan iōŋ ka.

Chaniah ko ha sit tæ ak ko kam wa lai khmat taŋwa i jingmut iōŋ ka wan dap ki sa du'i dur khmat u Lamchwa. Ũ nōd ko taŋ u pait cha ō leh toh wa tēiñsar ko, i'm ĩe ko u kabu ĩei sñiaw iōŋ ka.

U Lamchwa leh da sñiaw lyŋ-a itæ i mynsien u toh wom em u klam ka Pynhun ĩa ō taŋ chi kyntien leh. Kulmar itæ i jingmut jingpyrkhat u kat naŋ ĩaleh u'u thōh ki ki daw wa man ko kamtæ. "*Tōh wa slem o ma-ai wa kon ko ĩa ŋa?*" kylli u hapoh mynsien.

Pait u cha ka tæ luŋ i mynsien u mynda iō u ĩei dur iōŋ ka, wa r'ŋip i khmat ko tæ chim kabu u ĩei tæ iōh u u pait sæh cha ka. Duŋ itæ i dur miat kynthai iōŋ ka chadōh tre i mynsien u, pynneh u ĩei tæ i dur iōŋ ka ha mynsien wei jabein iōŋ ō. Katwon sñiawhun u'u pait ĩei dur iōŋ ka heitæ i por. "*A Blai!... Kani mo katæ kawow pynhun wow pyntŋen ĩa ŋa?*" klam u Lamchwa ha mynsien deiwa pait chajroŋ, "*Ē, u man ka mon iōŋ Me!*" klam u deiwa noh mynsien chapoh deiwa dem.

Ka Pynhun heitæ da pait cha ō tæ kylli ko, "Ileh wa slem mi u wan?"

NAIT O...

Pait u cha ka tæ deiwa sñiaw em jingkyrmen jubab u ïa ka, "Īō pho wa khai rih o ynne i miet, tæ ũ em u ïoh thiah o, neitæ i daw slem o'u khai thiah."

Ka Pynhun da sñiaw man pap ko ïei wa kylli ko leh mynda ap ko ïei wa jubab u. Mih itæ i sñiaw wyr-ai kylla ko ïa ō, kamtæ oŋ ko ïa ō, "Tæ ileh ũ khana mi kat tynne, ïow dam i'u lai cheini i'u lithōh dawai ïa me?"

U Lamchwa da pait cha ka dei wa sōhr'khai tæ jubab u, "To, doi, ũpher ïei tæ, dadep dih dawai o ynne i miet tæ da sñiaw chait hi o, pha ham awri ïei tæ."

Han la oŋ u kamtæ leh, ka Pynhun da sñiaw wit itæ i mynsien ko, pait ko cha ō tæ chynna hi ko ïei wa ïellu ki khmat u tæ luŋ itæ i mynsien ko. Em hi i sñiaw ha ka kawa ka leh ũ em u sñiawthōh ko ileh man ïa ka kamtæ.

Da poi ki ha ka Wah Saphai, da pynñēiñ ki ïa ka kari ïoŋ ki harōd ka yinŋkēiñ kawa em heitæ. Em ki bru wa sait kari heitæ kiwa pait cha ki, ka Pynhun da hiar tæ u Lamchwa leh da hiar na ka kari. Chim u ïa ka muna ïoŋ ka Pynhun tæ lok u ïa ka kari deptæ bōd u ïa ka Pynhun kawa da lai cha wah.

Poi ha wah da sdaŋ ka Pynhun u chon dur, u Lamchwa leh da sai ïa ki tiar ïoŋ ka na ka muna ïoŋ ka tæ da sdaŋ u'u leh ïei tæ iwa da tip u. Ka leh mynda dep ko u chondur tæ chim ko ki tiar na muna tæ ptēiñ ko ïei wa mut ko'u leh.

Da poi ki hei thaw wa laŋam, ini ithaw toh iwa em harōd ïoŋ ka khlō laŋdoh. Kamtæ, oŋ u Lamchwa ïa ka, "Pait kani toh ka khlō laŋdoh, ũ hoi u psiah kulmar i khlem da ïoh bor i na ki tre."

Oŋ ka Pynhun ïa ō, "To, ham awri ïei tæ, ŋa da dep pan bor o na u Laŋdoh tæ ũ psiah hi ō sæ chapoh leh myntu chōh. Ŋa emkām o chabar heh kani ka khlō laŋdoh."

Kamtæ ka Pynhun da sai ïa ki tiar ïoŋ ka katwa u Lamchwa naŋ bōd nadien ïoŋ ka. Heipor wa iōh kjat ko ha uwi u mō ha katæ ka wah, tlær ka kjat ko tæ pat ko chadien. U Lamchwa wa bōd nadien ko da iō u ïei tæ, tæ rap u ka deiwa ksoh ïa ka ha kti tæ

NAIT O...

chah u dei rupai u ïa i ryŋkhi ïoŋ ka. I kti u da ksoh ïa ka ha kpoh ïoŋ ka. Neh ki kām̄tæ kām̄wa arphaw sekōn waroh. Ha kitæ ki sekōn, u Lamchwa sñiaw u kam wa hiar i bneiñ ha khyndaw toh wa ïoh u'u ksoh ïa ka Pynhun ha rupai ïoŋ ō. Ũ kwah de u pyllait ïa ka næ u kut itæ i por.

Ka Pynhun leh da her itæ i r'ŋu ïoŋ ka du wa pat ko. Da noh ko ïei kti chadien. Mynda rap u Lamchwa ïa ka da sñiaw ko kam wa da poi ko cha bneiñ. Ũ kwah de ko u kut itæ i sñiawkmen ïoŋ ka.

Ka Pynhun da khyr'uiñ tæ pait cha ō. Ō leh da pait cha ki khmat ïoŋ ka. I khmat ïoŋ ki da ïaksoh ki markhmat chipor. Khyrñiat ka Pynhun tæ ïeiñ ko dei wa bait. U Lamchwa leh da pyllait u ïei kti ïoŋ ō na ka tæ klam u ïa ka dei wa sōhr'khai, "Lai deimiat na-oŋ, ïa lait p'than ki kjat pho."

Ka wān jubab ko ïa ō dei wa sōhr'khai, "Iyi u tēiñ o, hawa em o chirrup wa me?"

U Lamchwa da jŋai i pyrkhāt u mynda jubab ko kam̄tæ. Sñiaw u kam̄wa da wai lād wai luti ko ïa ō. Han la kattæ leh, ũ nōd wan u'u pynsñiaw ïei jŋmut ïoŋ ō toh wa daŋ tēiñ burom u ïa ka. Kam̄tæ da lai ki cha khmat dei wa bōn pyrkhāt jar i jŋmut. Mynda poi ki ha i thaw wa mut ka Pynhun u leh ïei eksperimen ïoŋ ka tæ da saŋeh ki, da leh ki ïei kām̄ ïoŋ ka.

Ka Maïa danj mih ko na iun iow lai bian ko cha dukan. Wan bam ja sni ko cha iun tæ da dep ko. Pait waje ko ha ka onthai ion ka tæ iō ko la 2 waje kattæ. Kynmō ko ia ka Pynhun tæ on ko'u phōn cha ka. Dail khyrnan ko kamwa lai tæ da pynap ia ka mobail ha chkōr.

Da palat ko ia ka gate, heitæ ksoh syndet ar nut ki bru ia ka nadien, uwi na ki, u Buda, da kset iei ktien ko. Hap ka mobail ko na kti cha madan tæ pra ko phrai næ.

Da ialeh ka Maïa u ksāid u kynjrait heitæ, tæ da sai pistol uwi na kitæ, u Raju, tæ pynian u ha khlieh ko deiwa on u ia ka, "lada kwah pho'u im, tæ leh kamwa on i."

Em ka maruti wen kawa bōd nadien ia ki ha surok; tăn iabor ki ka hapoh katæ ka wen tæ her pynsmat katæ ka wen cha surok heh.

Ka wen da poi ko cha luti khlō kawa kut ha kawi ka iun bildiŋ kawa da rim bha, kawa da jæt da pra wei da kli lut ki ñiut ki ñier ki iermāi ki khlō. I tæ i iun iwa da ieh ki tre la 15 snem haroh, toh wa oŋ ki, wa choŋ i ksuid næ. Wom em iun hi leh harōd hajan toh wa em i ha pyrdi khlō.

Saŋeh ka wen ha khmat itæ i bildiŋ tæ ia mih kitæ ki kaŋ deiwa patah ia ka Maia kawa daŋ ialeh u ksāid na ki kti iōŋ ki. U draibar ka wen leh da hiar u na kari tæ psiah laŋ u wa ki chapoh itæ i bildiŋ. Ka dwar itæ i iun leh da pyut da jæt; sah sei nam dwar hi eh.

U Rokki em u hapoh kawi ka kamra kawa pynman u kam ka ktem iei kām sih i iōŋ ō. Da choŋ bha u ha ka chuki dei wa chaniah chadien. Ha kti u em ka klat kyiad kawa da dep dih u chiteiñ. Hakhmat iōŋ ō em ka miaj kawa dap da ki kloŋ kiad wa ki kot khutia mutia. Em leh ki chuki wa jæt 4 tylli chakhmat katwa cha rōd kataæ ka kāmra wan em ka palon thiah kawa da siaŋ that wei em haroh wa ki that kup kiwa khlem pynlum pyllaŋ.

Daŋ hawa dih kyiad u Rokki, psiah u Buda wa u Raju dei wa patah ia ka Maia. Pyniēiñ ki ka hakhmat ka miaj tæ iēiñ ki harōd iōŋ ka.

NAIT O...

Du wa iō u Rokki iei wa psiah ki da bōh u ia ka klat ha jron miaj tæ iēiñ u dei wa sōhrkhai wei klam khyrñaj, "Welcome! Welcome!! Maia... Chon, chon heitu," kdaw u cha ka chuki kawa em hakhmat miaj.

Ka Maia da pait chrai cha ō tæ on ko, "Ham iō luti wow ieh u pa me!"

On wan u Rokki, "O... ki Pa! Iañ iow phone o ki kattæ wot!" Sai u ia ka onthai na kata tæ dail u i nombar u ma Kian.

U ma Kian dan iah Bolero u iow liwan cha iun. Wan pait kreh u na lōm toh wom lait u Lamchwa u li pait khih du nei daw wa iah thaw u ka ka Pynhun. Dan hawa psiah u ha ka lād kawow poi cha iun ki tæ kieh ka phōn u. Ō nan mut u ka Maia wa phōn ō tæ ũ em u rap u dei wa klam u samen samen heitæ, *"To, khon da poi iun hi o katæ."*

Da kieh bian ka phōn u sa chisien. Sai u ia ka phōn na kata kut tæ iō u dow nambar wom tipmit u tæ klam u ha phōn, "Hello!"

Jubab ka sur ia ō ha phōn: "Hello, Father-in-law!"

U ma Kian deiwa khyrñiat kylli u, "Kiyi ki itæ?"

Da klam bian ka sur ha phōn ia ō, "Oh! Da mylliñ phi iei sur ion ña? Chim meitæ klam ia kani ka khon

NAIT O...

phi." U Rokki dep u klam ïei tæ da pynap u ïa ka phôn ha chkôr ka Maïa tæ klam ko "Pa!"

U ma Kian da brêk syndet ïa ka kari hadôh wa kiad wa ki brêk laiñiñ mynda sñiaw u dei sur ka Maïa. "Khon! Cheiwon em pho itæ?" Kylli u.

Tañwa, ù ïoh ka Maïa u ap ïei wa klam u pa ko, toh da pynap bian u Rokki ïa ka phôn ha ô tæ jubab da ô, "Da tip phi na oñ kipa kattæ!"

Kop diñ u ma Kian heitæ lep næ mynda sñiawthôh u ïei sur u Rokki, tæ klam u ha phôn, "Rokki, lada jia iyi iyi ïa ka khon o tæ ù ieh o me! Han lada rieh mi chapoh krem ki psēiñ leh, u klah o me na radañ tæ u pyndep o!"

U Rokki da r'khai, "Ha! Ha! Ha! O pli ki Pa... to... ham choñchit ware! Pait kani ka khon phi em ko wa ña. Lada kwah phi u lait i mysien ko, tæ ap ïei wa oñ o."

"Iyi kwah mi?" kylli u ma Kian.

"Bôn...jait, ki Pa, bônjait!" jubab u Rokki; "Number 1. Kwah o'w kam pyrsa noh phi ña."

"Never!" rap pynsmat u ma Kian, "ha wa ïap o leh ù bien o!"

NAIT O...

On wan u Rokki, "İaŋ, iaŋ... ki Pa... ham pu rai kattæ. Daŋ em chōh! Number 2. Ki khih ki kræh phi waroh u pynlai noh da ŋa u wow man ki pyrsa phi. And Number 3, u beh kreh noh phi ō u Lamchwa."

U ma Kiaŋ naŋ kop diñ katwa daŋ ap u ĩei wa dawa u Rokki tæ on u ĩa ō, "Haram khōr! Ham mutdur u ĩoh mi ĩei wa kwah mi!"

R'khai biaŋ u Rokki, "Ha! Ha! Ha! Hawa ka khon phi, em ko wa ŋa, iyi u pyrwa? To... ē por o ĩa phi chi sŋi ar sŋi. Mynda tliaŋ khon phi tæ phone wan ĩa ŋa."

Klam u ma Kiaŋ daŋ dei chrai, "Rokki! Kynmō bha.. lada jia iyi iyi ĩa ka khon o tæ..."

"O... ki Pa!" rap pynsmat u Rokki. "Ham khuslai ham awri ĩei bhah ĩon ka. Ŋa u pynbiaŋ o ĩa ka, kam wa pynbiaŋ ki ĩa ki khon syiem. Taŋwa, ham pyntip cha ki pulit... ĩa..." Pyndam wot u Rokki ĩa ka phōn khlem pynkut ĩei klam u.

U ma Kiaŋ heitæ da khlæh itæ i sñiaw u. Deiwa khlæh laŋ itæ i sñiaw pisa laŋ-a ĩa ka khon u wei sñiaw chrai ĩow Rokki klam u ha mynsien, "Chish! Kammon u leh o itæ?" Choŋ pyrkhath u chipor heitæ deiwa dem u ha steriŋ.

Hadien kattu katni, da khai khlieh u tæ klam u

NAIT O...

**samen samen, "Ieh, lai pyntip bait o cha ki pulit
Man katwa man leh, hap pyntip hi o cha ki." Start
bian u ïa ka kari tæ bek u iow lai cha Thanat.**

U Lamchwa wa ka Pynhun da poi ki ha iun̄. Da bōh said u iā ka Bolero ha pchem tæ hiar u iow sai ki tiar ka Pynhun wa da thap ki ha sit diendooh. Ka Pynhun leh da hiar ko tæ li rap ko ō. Katwa dan̄ mut ki u psiah hapoh iun̄, sñiaw ki iei wa wan ka kari u ma Kian̄. Ka Pynhun da psiah bait chapoh iun̄ dei wa kbai iā ka Maia katwa u Lamchwa dan̄ ian̄ ha khmat dwar.

U ma Kian̄ da pyniēiñ iā ka kari ha pchem tæ hiar u wut næ. Khan̄ dwar u leh khram ne la kam wa chrai. Lai u leh wut wut ne. U Lamchwa nan̄ pait phylla iei dur u ma Kian̄ wa iō than̄ ion̄ u ki.

Mynda poi u ma Kian̄ hajan u, tæ' mut u'u klam, tan̄wa da ioh ktien chwa da'u ma Kian̄ u klam. "Læ chapoh iun̄ iow iaklam i" On̄ u iow Lamchwa dei wa psiah khyrnan̄ chapoh iun̄.

U Lamchwa leh dan̄ dei sñiaw phylla bōd u iow ma Kian̄. Pyrkhat u hapoh mynsien u, "*Tip, ileh o u Ma ma-ai? Ũ jōh iō o iei dur chrai ion̄ ō kamtu. Em ma-ai i wa leh bakla o iā ō?*" Bōd u wēr ne nadien u ma Kian̄ dei wa sñiaw syir ha mynsien u, la kam u khynnah skur uwa chah khut ha kamra u Principal.

Ha kamra pdeiñ, u ma Kian̄ da lai wah-wah neiñ-neiñ deiwa dem i khlieh wei kli kti cha dien. U

NAIT O...

Lamchwa mar syn iō u kamtæ nanjōr itæ i sñiaw syir u. Bōh u ki tiar ka Pynhun ha jronj mīaj heitæ dep tæ iēiñ heh u kam wa iāj iow ma Kianj u klam. Ū nōd de u tanj u choŋ leh.

Psiah ka Pynhun heitæ deiwa mut u kylli na'u ma Kianj iā ka Maia tæ saŋeh ko u klam mynda iō ko iei dur u deiwa thaŋ iōŋ sa itæ i lai wah-wah neiñ-neiñ. Tēiñ i mynsien ko heitæ.

Mynda iō u ma Kianj wa ka Pynhun leh da em ko heitæ, saŋeh u i lai tæ kawæh kti u iā ki pyn arŋut kam wa e siknal iow choŋ ki ha *sofa*. Ō leh da li choŋ noh u ha kawi ka *sofa*. Ka Pynhun wa u Lamchwa, khlem klam, li choŋ ki ha ki *sofa* mar pyrchah iōŋ ō.

Noh mynsien u ma Kianj tæ pait u cha ki argnut tæ klam u dei wa khia, "Lamchwa, Pynhun... ka Maia da chah kitnap ko ha u Rokki."

Pyn ar ŋut ki da ran ki chadien deiwa khyrŋiat tæ iā pait ki para ki, tæ pait bianj ki cha'u ma Kianj.

U Lamchwa da wiar itæ i sñiaw syir u, tanjwa kataæ ka khubor wa daŋ ioh u daŋ pyn khyrŋiat ko iā ō. Kamtæ kylli u dei wa jēi næ, "Kammon itæ Ma oŋ phi? Ū sñiaw nait o ki!"

Jubab u ma Kianj, "Kamtæ wot stæ! Da dawa u wow

NAIT O...

pynbia ĩa ka Maĭa wa ō wow beh kreh o ĩa phi leh
ĭoh u pynlai da ō ĩēi nī waroh."

U Lamchwa leh heitæ da sñiaw chrai ĩa'u Rokki wei
sñiaw wyr-ai ĩa'u ma Kiaŋ. Ka Pynhun leh da sōh
ĭām heitæ. Dem ko ha tūpha u Lamchwa dei wa
ksoh ha kti u.

Sō ki chkōr ki ŋap u Lamchwa hem næ toh wa
sñiaw u kammon tahi itæ heitæ ĩei wa leh ka
Pynhun. U ma Kiaŋ khlem johkhe ĩei tæ da pteĩñ
bian u, "Da wan pyntip o cha ki pulit itu wot. Da
sdaŋ ki u takit. Ĭō luti o, u chem dien ki ō pyn
myntu."

U Lamchwa leh heitæ da sdaŋ u'u pyrkhat kammon
u leh ĭow pyllait ka ka Maĭa na ki kti u Rokki. Ĭaleh
u u kynmō ĩa ki thaw wa jōh main bha u Rokki u lai
u jōh. Pait u cha'u ma Kiaŋ tæ klam u dei wa raikut,
"To ma, phi ham awri ham khuslai, ieh ŋa leh u
thōh trē o ki. U thōh o ĩa u tu u psēĩñ hadōh wa
chem a ō"

U ma Kiaŋ da pait cha ō tæ oŋ u, "Lamchwa, ieh ĭoh
u leh ki pulit ĩei kamram ĭoŋ ki. Da tip hi mi, u
Rokki ũ toh u bru wa hoi u kheinke mynda poi cha
ki kāmsih. Wei ũ toh leh u wa kheĩñ kor ĩei jĩjim
kiwi. Da ĭō hi mi pun da ki khmat mi daŋ ha katu ka
sien wa mut u u pynĭap ŋa."

NAIT O...

U Lamchwa leh ũ hun u, tæ on u, "O-hoh, ma, ɲa mut o da ioh jɲsneiñ u neini wa da dep lait jamin u. Tanwa myntu tæ... ũ ieh de'a ô!"

İeiñ wot u jor næ tæ khyrɲiat ka Pynhun, kawa daɲ chaniah ha ô, dajan ko wow pat ha *sofa*.

U ma Kian leh da ieiñ u iow khan ô u Lamchwa, tanwa kat u ieiñ u, u Lamchwa da poi u ha dwar. Kamtæ ia pait heh ki iei wa lai u.

Mynda palat u tæ lai ka Pynhun hajan u ma Kian tæ pait ka cha ô. Ksoh ko leh ia ka kti u wei ha tũpha u tæ klam pyntɲen ko ia ô, "To, ma, iöluti o, chibet da poi iun ka Maia." I khmat ko daɲ dap da ki umkhmat.

U ma Kian da ialeh u, u söhrkhai ia ka, tanwa ũ mih ki. Choɲ bian u ha *sofa*. Ka Pynhun leh da choɲ lan heitæ.

Klam u ma Kian ia ka, "Tip, kammon u man ka khon o kattæ? Ish! Wypoi pyrkhat o wa u Rokki u leh u hadôh kat deini i kām! Em i mynsien o iwa kwah u li ksih ô na radaɲ hadôh wa iap u, tanwa i ion bru wan o, ũ chah i! U choɲ kli kti ha iun leh ũ sñiaw neh chah o. Tæ ɲa u lai o cha Thanat iow tip o hadôh katnu da li takit ki. Pha choɲ ha iun tæ khan iun deimiat næ. Ham wai iun iow won u won leh, lait na ɲa wow Lamchwa, mo."

ŊAIT O...

Da khreh u u iēiñ taŋwa ka Pynhun ksoh ko ō tæ oŋ ko, "Ŋa leh ū neh chah o u choŋ ha iūŋ, tæ ŋa leh u lai laŋ o wa phi cheitæ mo."

U ma Kiaŋ leh sñiaw chŋain u iow ioh lok, kamtæ oŋ u ia ka, "Dieh khreh pho meitæ iow lai noh i kattæ wot."

Ka Pynhun da iēiñ tæ lai ko cha kamra ko iow li chim ia ka jaket ioŋ ka. U ma Kiaŋ da lai dih um u ha kamra chet dep neitæ mih u na kamra dei wa kbai ia ka, "Ŋa u iaŋ o pha ha kari mo! Khaŋ tala da pha i iūŋ!"

U ma Kian du wa iō u wa da mih ka Pynhun na iun
tæ da stat u ia ka Bolero. Poi ko hajan tæ on u ia ka,
"Pha ku mynda dep khan pho ia ka khyrdep mo."

Kamtæ da ialai ki khlem klam chipor hapoh kari. Da
pyrkhat ki jar i pyrkhat. Ka Pynhun da wiar itæ i
iām tæ da sdaŋ ko u pyrkhat iei bhah u Lamchwa
wa ka Maia. Pait ko cha'u ma Kian tæ iō ko wa daŋ
bōn pyrkhat, daŋ khuslai u. Kamtæ, iow pynstiñ iei
wa pyrkhat u, kylli ko ia ō, "Ma, yi ioh u Rokki u
chōn saŋ ia phi hadōh katni katni?"

Pait u ma Kian cha ka, tæ sōhrkhai u ia ka khajiak.
Cheiñ u iow *gear* kari tæ kamwa daŋ lai ka kari,
khana u ia ka waroh chaphaŋ i jinlon jinman u
Rokki nadōh wa sdaŋ u u kreh wa ō hadōh i por wa
beh kreh u ō nei daw wa leh tōh u.

Khana u leh iei wa pyllait u Lamchwa ia ō na ki kti u
Rokki ha katu ka sien wa mut u u li pait kreh cha
lōm. Pynkut u iei khanataŋ iōŋ ō deiwa on, "Ha
katae ka sni, lada'm em sakhiat u Lamchwa tæ da
sep! Na hadōh katni leh ũ ie dē o u sukylliaŋ iow
Lamchwa iei wa leh u ia i."

Katwa daŋ klam u chaphaŋ u Rokki iō ka Pynhun
iei wa chrai i dur u taŋwa mynda klam u chaphaŋ u
Lamchwa wan kylla i dur khmat u dei wa sñiaw

ŊAIT O...

saroŋ. Ka Pynhun leh kmen i mynsien ko u sñiaw
iei wa iaroh u ma Kian iow Lamchwa. Ka leh da
sōhrkhai ko khajiak.

Khana wan u ma Kian ia ka chaphaŋ u Lamchwa
wei jinlon ka iun ka sem ion o. Sñiawlun i mynsien
ka Pynhun u tip iei dōh i duk, wei khiih chitom u
Lamchwa nadōh daŋ khynnah u. Ap ko iei tæ wa
parom u ma Kian kam ka khynnah wa bēij parom.

Hawa kut, oŋ u ma Kian kamni næ, "Ŋa leh,
sñiawhun sñiawkmen o chibōn, wa ioh bru o kam u
Lamchwa uwa man kam ka kti timun ion ŋa. Wa roi
i khiih i kreh o leh toh wa khiih hok wei khiih chitom
u. Ŋa ũ tip sap dē o kammon u sukylliaŋ o ia o. U ē
burom o ia o da ka poisa leh ũ rap bien u, lait hei
por wa emkām u ha iun ha sem. Taŋ katu ka baik
wa iah u katni leh, dei pynbor o tæ bien u u chim
ka. Han la kattæ leh da em hi ka bhah wa da bynta o
ia o iow lait u u khuslai nei bynta ki diah u. Ham pu
khana ia o mo. Daŋ du ka Maia wa tip iei tæ."

Ka Pynhun da ky'i ia o, heitæ poi ki ha khyrdep
thanat. Psiah u ma Kian chapoh kompon ka thanat
tæ pyniēiñ u ia ka kari charōd. Heitæ ia hiar ki pyn-
ar tæ psiah ki chapoh cha wa em ka ophis u O.C.

U Lamchwa da lai u da ka thuk thuk ha surok heh. Daŋ mih wot u neiwi i dukan ja wa em harōd surok iwa jōh maiñ bha u Rokki u diŋ u bam heitæ. Dep kylli u ha ka trē dukan iow Rokki wa ki lok u, tæ oŋ ko la çhi taïaw ũ em u wan mih ki heitæ. Da dep kylli u leh cheitu cheini, wa na ki bru wa mut u kiwa tipmit iow Rokki wa ki lok u. Du ki wa oŋ wa ũ em u iō ki ō.

Katwa daŋ lai u, sñiaw dōmbuit u kammon u chem thaw ō u Rokki. Ka sŋi da sep ko, da sdaŋ u miet u dōm. Da poi u kattæ ha i dukan ja wa chem u iow Rokki wa murieh poisa u. Hapoh dukan da pynchē ki iā ki lait. Halait wan em uwi heh u bol lait u wa chē. Da saŋeh u wei wa da dep pynīēiñ u iā ka thuk thuk harōd, heithaw wa em r'ŋu, hakhmat itæ i dukan.

Heipor wa mut u u psiah tæ iō u liak na jɪŋkhaŋ-īt iow Buda wa daŋ su poisa u iā ka trē dukan. Ran dien pynsmat u, tæ li dem u ha ka thuk thuk u, tæ ak u kam wa pynchna iā ka.

Hadien kattu katni por, da mih u Buda na dukan deiwa rah ha kti iōŋ ō ka muna plastik. Pynlai u Lamchwa iā ki khmat u cha ō khlem pynkhih iēi khlieh. U Buda pait hi eh u liak cha wa em u Lamchwa taŋwa ũ em u tipmit u ō toh wa dei dien.

NAIT O...

Mut u kitu hi kiwa jōh wan bam wan dih næ.
Kamtæ lai bait u chakhmat.

U Lamchwa da iēiñ tæ ak kam wa li psiah u chapoh dukan taŋwa poi u ha taksaw, saŋeh u tæ pait siar u iow Buda. Iō u, wa manda poi u ha kawī ka lad kawow lai chapoh khlō, kawa khut ki ka 'khlō pamdnjem', da lai u Buda neitæ. Da mut u Lamchwa u bōd da ka thuk thuk tæ u kem iow Buda iow pynbor u iā ō u khana cheiwon em u Rokki. Mynda pyrkhat u wan deiwi, dam noh u iēitæ tæ li bōd bait u dei kjat.

Klam u Lamchwa hapoh mynsien, "*Du wa lai u Buda dei kjat, itæ mut em ki pyn chajan cheini.*" Da bōd u deiwa syndon u u lai iā sñiaw næ iō u Buda ō. Taŋwa toh ka luti chapoh khlō rap saja ko iā ō u chynna iow Buda. Kamtæ par u dei par dei wa rieh khyrŋaŋ hadien ki dēiñ.

Hapoh Control Room hapoh thanat, u OC dan klam u ia uwi u pulit lanrut u wa dan dep ē ia kawi ka kot ha ō. U ma Kian wa ka Pynhun dan choŋ ki ha ki chuki wa em hakhmat dei wa pait cha ka *Whiteboard* kawa heh 8 prōh la 10. Ha kataē ka *Whiteboard* em ka map kawa da dro ki dei kti. Em leh kattu katni ki dak ki chin kam ki khlō, ki liar ki wah, ki surok ki luti wa ki *mobile tower* kiwa da bōh dak ki dow khulom marka.

Ha ka lian tidian kataē ka kamra, em ki machin wa da pynchoŋ hajroŋ ka mīaj kawa jroŋ. Em leh ar ŋut ki oparetor, kiwa pyndait hedphōn ha chkōr ki, kiwa choŋ hakhmat kitā ki machin kiwa leh jār i kām ki. Ha ka lian timun wan, em ki komputor 3 tylli, kitā leh kiwa da pynchoŋ hajroŋ ka mīaj wa jroŋ. Ha kawi na kitā, em u pulit uwa khlem riam sula pulit dan choŋ kreh u heitā.

U lanrut uwa iaklam u OC da oŋ, "O.K. Sir!" tā salut u ia u OC tā mih wot u na kataē ka kamra.

U OC leh lai wot u cha wa em u ma Kian wa ka Pynhun tā klam u ia ō, "Tā... ma Kian, iō phi..." kdaw kti u cha ka map wa em hakhmat tā pteĩn u, "dei wa pynemkām i da ka '*mobile phone tracking system*', deiwa kreh lan wa ki kompeni mobail, da iē i u antād heiwon rynkhat em u Rokki kattā; tanwa,

NAIT O...

ũ pu em u ĩe i u oŋ tikna heiwon em sakhiat u."

U ma Kian wa ka Pynhun da aŋ kalæ næ khlem sñiawthōh ĩei wa mut u OC u oŋ. Hawa iō u OC kām̄tæ, tæ chim u ĩa u skēl kawa jroŋ kawa em hajroŋ m̄iaj tæ kdaw u cha ka *Whiteboard*.

Batai u ĩa ki dei wa kdaw khyrŋaŋ, "iō phi... heipor wa phōn u Rokki ĩa phi, da iōh siknal na ka phōn u na kini ki lē tylli ki *tower*." Kdaw u da u skēl ha kitæ ki lē tylli ki chin wa da dro ki ha ka map.

"Kani kawi ka tower, em ko na ka lian mihsŋi iōŋ ka chnoŋ Mukloŋ. Kani wan..." kdaw u cha katæ ha map, "em ko harōd National Highway ha chnoŋ Mō-Suwe." Kdaw u cha ka tower wa lē tæ oŋ u, "kani wan em ko hajroŋ Lōm Suwe. Lada iōh siknal i na sa uwi u tower, da iē i u kheiñ tikna heitæ em u næ. Taŋwa duna ki tower cheitu i lian wei wa ĩajŋai ki na uwi cha uwi, kamtæ chem jīŋeh i ka u '*triangulate*' ĩa ka '*position*' iōŋ ō."

U OC da bōh bian u ĩa u skēl hajroŋ m̄iaj tæ pait u cha ki. Du wa iō u wa da ĩa ky'i ki tæ mut u da sñiawthōh hi ki katu. Kamtæ pteiñ bian u u klam, "Kamtæ da tip i wa u Rokki em u ha kawi ka thaw kawa hāp hapoh ka eria kawa em sōdoŋ ĩa kini ki tower. Kamtæ da pynkhreh i ĩa ki *Team* iōŋ i u em ki cha jan kini ki thaw. Toh wa duna paid i, ũ ĩe i u lai cha waroh ki thaw, tæ daŋ ĩaŋ i u iōh sa kawi ka

NAIT O...

report na ka C-Tel, ka kompani kawa pynemkām Sim Card u Rokki."

Choŋ u OC hajan u ma Kianj tæ klam pyntŋen u ia ō, "Ham khuslai, ma Kianj, pyn myntu da chem bait i iei thawrieh u Rokki. Tæ, phi ham awri dē, pyn myntu da poi iuŋ ka khon phi."

U ma Kianj da pait cha ō tæ oŋ u, "Ŋa da chaniah lut o hei bor i iŋphi. Iō luti o u jop hi phi, iow dap bianj ka iuŋ ka sem o dei kmen dei suk. Seiwi leh mut o'u oŋ iaphi wa tēiŋsar o leh iei bhah u Lamchwa."

Hei por wa mut u OC u kylli bniah iei wa klam u ma Kianj, da psiah 2 ŋut ki pulit Inspektor wa 3 ŋut ki pulit laŋrut heitæ. Uwi na kitæ ki laŋrut da rah u kawi ka kot li ē u cha u OC deiwa oŋ, "Sir!" tæ salut u.

U OC leh da chim ia ka, tæ puræ u ka. Waroh kiwa em heitæ da pait ia ō dei wa ian iow klam u. Dadep u OC u puræ tæ chim bianj u ia u skēl tæ klam u dei wa kdaw bianj cha ka māp, "Katkam kani ka report na ka C-Tel, ka siknal phōn u Rokki kawa khlan dōh na kini ki *tower* toh kawa wan na ka *tower* hajroŋ Lōm Suwe."

Iēiŋ u neitæ dei wa chim bianj ia u skēl tæ pteiŋ u, "Seiwi leh iwa iē u iarap ia ka kām iŋ i toh, katkam

NAIT O...

kani ka report, ki '*signal strength*' na ka phōn u Rokki neh ki kamjōh la 4 kynta kattu. Ini, kdaw ko wa u Rokki da neh u ha kawī don ka thaw la 4 kynta. Itæ mut, em ka kynja ktem næ ka thaw rieh u hapoh kani ka eria."

Ki pulit wa em heitæ da iō stiñ itæ i jinmut jinpyrkhat ki. Heitæ da kdaw u OC ha map ia ka tower Lōm Suwe tæ klam u, "Kamtæ, ka thawrieh u Rokki iē ko u em hapoh kani ka eria."

Da pynlai u ia u skēl sōdon ka chin iōn ka tower Lōm Suwe. "Ha ka lian mīhsji kani ka tower em ka Khlō Lan̄doh, ha ka lian sepsji, em ka Lōm Suwe, ha lian neiñ wan em ka Khlō pamdnjem kat ha lian wah wan em ka Wah Suwe. Kamtæ, u lai i ha sō tylli ki kari."

Pait u cha u Inspector wa em hajan u tæ on u ia ō, "Sub-Inspektor, Sonde, me u pait heini ha thanat kat wom pu em u wan o na kani ka *operation*. Me u pyntip noh mi wut wut cha *Headquarter* chaphañ kani ka operation wow phah mi leh kawī ka *Ambulance* u iañ ko ha surok hajan kani ka tower."

Khut u sa ia uwi u Inspektor tæ on u ia ō, "Inspector Marak, me u iah mi ka ka Team mi cha Wah Suwe; on ia u Inspector Markus wa ka Team u u lai u na Khlō Pamdnjem, iow Inspector Dango wan na Khlō Lan̄doh, ña wan u iah o ka Team o na Lōm Suwe.

NAIT O...

Get ready, fast! Go! Go! Go!"

Ki pulit da ĩa khih ĩa kdet heitæ. Pait bian u OC cha'u ma Kian tæ on u, "Phi u ĩan phi heini mo u lai phi cha ĩun mo?"

U ma Kian jubab u, "Chah ĩa i u lai lan wa phi. Na ũ neh chah o u chonkli kti heini ne ha ĩun leh."

Pyrkhat u OC chipor tæ on u ĩa o, "Īē phi u wan lan wa i tanwa u kular phi u ĩan ha surok bah katwa i nan psiah i ĩow talasi chapoh lōm chapoh khlō."

U ma Kian leh da ky'i u deiwa on, "To, sahep."

Da em chiteiñ kynta haroh wa da ialai kjat ki. U bnai wa chiteiñ, iō kam wa ialeh u u pait siar, nakhap ki sla dēiñ, ia kitæ ki bru wa lai luti hapoh khlō. U Lamchwa da sdaŋ u u artatien ha mynsien boi da iō u Buda ō tæ ialam bakla u ō næ.

Taŋwa hadien chibet da chynna u nakhāp ki dēiñ ia iwi i iuŋ iwa em ha syrŋu ki dēiñ khlō. Chynna u leh ia i rŋu ka kari kawa iēiñ charōd ha liaŋ timun itæ i iuŋ. Heitæ da kynthih da kyndæh i mynsien u. Klam u hapoh mynsien, "*Kopsar kani kataæ ka krem utu u psaiñ iōŋ. A Blai! Em laŋ chirup wa ŋa myntu ka miet.*"

U Buda da psiah u chapoh itæ i iuŋ. U Lamchwa leh da lai u, nei liaŋ tidiaŋ, narōd narōd tæ tia u chajan, cha wa chynna u wa chē na kawi ka jŋkhaŋ-īt ka wym em it dē.

Ap siar u, tæ sñiaw u iei sur u Rokki wa wan napoh kataæ ka kamra, "Ileh slem mi u wan Buda? Kopsar dih, bam mi hawa dap u snier mi tæ mylliñ mi i kiwa chah thŋan heini, mo!"

Du wa sñiaw u Lamchwa iei sur u Rokki da tikna u wa ka Maia leh u em ko heitæ. Tia chōh u chajan tæ r'ah u iei khlieh u cha jronŋ iow chynna u chapoh iuŋ. Dei wa rieh u hei r'ŋu, jŋieh u chapoh tæ iō u ia ka

NAIT O...

Maia wa chon ko hajron kawi ka chuki hakhmat ka miaj, katwa chē i mombati heitæ. I kti ion ka dei kdoh chadien. I kjat leh da kdoh lan ki ha kjat chuki. Da chynna u leh iei wa sō i khmat ko. Ha ktien ko da kset ki da ka *Brown tape*.

Mar syniō u Lamchwa ia ka kamtæ, da dap dei wyr-ai i mynsien u ia ka, da mut u u kbai ia ka, tanwa...chē ion bru u, tæ ũ em u kbai u. Kamtæ pynlai u ki khmat u chei wa em hapoh katae ka karma.

Nei thaw wa iēiñ u, chynna u leh ia u Rokki dei dien wa da iēiñ u tæ chim u ia kawi ki plastik wa ē u Buda ia ō. Hakhmat u Rokki, hajron miaj, em kawi ka pistol. Chynna u leh ia ki kjat ar tylli ha jron ka palon thiah kawa em charōd tanwa ia u trē kitæ ki kjat ũ iō ũ chynna dē u toh wa chah katae ka jinphañ-īt. U tia chakhmat chōh leh ũ nōd dē u ia sñiaw ia chynna pathan ki ō.

İō u leh sa uwi u bru, uwa kēiñ da ki dakar ha pynarliñ ka tympon u, uwa li rap sa kawi ka plastik na kti u Buda. Dem bian u chapoh tæ ran u chadien dei wa pār hadōh wa poi u ha khap ki deiñ.

Sai u ia ka onthai u, tæ heitæ kynmō u thret kamwa khyrñiat tæ klam u hapoh mynsien, "*Ish! embhah sakhiat o ynne! Lada jia wa kieh ka phōn o kat tynne tæ da sep*" Heitæ, dei warieh u hadien uwi u dēiñ

ŊAIT O...

wa rap heh, dail u ka nambar u ma Kianj.

Hadien 6 rinj da em wa rap tæ klam pynsmat u Lamchwa kamwa klamsiaw khlem saŋeh, "Ma! Da chem o ki i thaw rieh u Rokki; ka Maïa leh em ko heitæ! Phi pyntip cha ki pulit kattæ wot, oŋ ïa ki i thaw toh ha ini i iun rim iwa em hapoh Khlō Pamdnjem."

"Ŋa em o wa ki pulit kattæ, danbōd o pun nadien ka kari u OC. Danj ïa lai i cha Lōm Suwe. To, ieh iow khana o ïa ki kattæ wot. Ŋa leh tip hi o ïa itæ i thaw, tanjwa da slem ū em u lai o cheitu. To bōh chwa meitæ iow phōn wan o me iow klam mi wow OC."

Da pyndam u Lamchwa ïa ka phōn tæ bōh *Silent Mode* pynsmat u ka. Chaniah u ha utæ u dēiñ tæ choŋ pyrkhat u dei wa ksoh ïa ka oŋthai ha kti kam wa ïaŋ ïa ka phōn u ma Kianj.

Heitæ sñiaw u ïei sur wa wan napoh ka kamra wa danj dep pait u wa oŋ, "Cheers!" Bōd wei sur wa ïa r'khai ki. "*Kopsar, da sdan ki u iadih kattæ,*" klam u ha mynsien u.

Hadien chibet, dail bianj u sa kawi ka nambar tæ da em kiwa rap.

"Pun!" Klam ka sur ïa ō ha phōn.

NAIT O...

Klam siaw u Lamchwa ha phōn, "Marbōd, oŋ ĩa ka bei ũ wan iuŋ o myntu. Khana wan o ĩa phi mynstēp ĩei daw, bōh noh kattæ. Ham phōn de ŋa myntu, mo."

Pyndam wot u Lamchwa ĩa ka phōn tæ choŋ pyrkhāt bian u. Da mut u u phōn cha ka Pynhun, tæ dam wan u, oŋ u boi ĩa toh phōn u ma Kian ō heiwon iwōn i por kattæ.

Pyrkhāt u ĩa ka, tæ sñiaw kmen u. Riñ dur bian u ĩei walai ki por ha pyrdi iōŋ ki ynne ka sñi. Kynmō u leh ĩei wa dem ko ha ō tæ tba u hei bynta wa chaniah ko ha ō dei wa khyruiñ cheitæ tæ pait. Sñiaw u ĩei wa daŋbih i sen ko ha ka jaket u, tæ riñ mysien u neitæ. *"Tip iyi krum ko kattæ ma-ai samēn samēn ha iuŋ?"* Ō daŋmut u wa ka em bait ko ha iuŋ u ma Kian kattæ.

Daŋ hawa baŋ itæ i pyrkhāt u cha ka Pynhun, kyrbeh ka phōn iōŋ ō ha kti u tæ rap pynsmat u. "Hello!" klam u ha phōn.

"Lamchwa, ŋa u OC wa klam," oŋ itæ i sur ĩa ō ha phōn. "Pait cheini, me ham leh iwōn iwōn iwa iē u pynsñiaw ĩa ki wa em mi heitu. Pait siar pait sylli heh tæ pyntip cha i iwōn iwōn. Pait ĩa li ak *hero* mi, tæ ĩa sep ai pathan: Katnu ŋut ki wa em heitu? Em suloi, em tiar em tar ki?" Kylli u OC ĩa ō.

ŊAIT O...

"Katkam wa iō o tæ 4 ŋut hi eh ki." Jubab u Lamchwa, "taŋ ũ tip tikna bha o, toh wa dōm wa laŋoh hapoh ini i iuŋ wa em ki. Iē ki'u em chōh leh. Em hi ki ki pistol ki dakar. Lait neitæ ũ iē dē o'u oŋ. To, daw pyrchan o u paitsiar tæ khana wan o iā phi."

"To, meitæ, ŋa daŋ iāŋ o heini wow Inspector Markus wa ka Team iōŋ ō, iow wan ki Team iōŋ ŋa waroh tæ iow ker kut i tæ i iuŋ. Ki SOT leh da em laŋ ki wa i heini."

Da pyndam u OC iā ka phōn tæ u Lamchwa leh da thap iā ka phōn iōŋ ō ha kata tæ iēiñ u wer næ.

Da poi bian u Lamchwa ha trē kataē ka jīṅkhanjīt. Da rah u wow wi u deiñ lyṅkhot wa chem u hajan wa choṅ u kat tynne. Sñiaw u ĩei wa ĩaklam ki taṅ ũ sñiawthōh u iyi wa klam ki. Rah u ĩei khlieh u cha jroṅ wēr næ tæ jnieh u.

Īō u wa u Rokki daṅ dih kyiad dei wa choṅ hajroṅ chuki. Utæ u bru wa kēiñ dakar wow Raju leh ĩa choṅ ki mar kawi ka chuki dei wa bōh kti hajroṅ mīaj. Da ksoh ki leh mar kawi ka klat kyiad ha kti ki. Ka Maïa dei dem khlich kamwa da laikhmat. U Buda da thiah hajroṅ palon da chynna sa du ki kjat don hi u.

Hadien chibet da ĩēiñ utæ wa kēiñ dakar tæ mih u na kataē ka kamra. U Lamchwa da dem khnup ha madan tæ ap u ĩa ki chkōr tæ pait u cha ka dwar itæ i iuṅ. Chibet da sñiaw u ĩei wa kieh i kâp utæ u wa kēiñ dakar tæ da thiah u ha madan khlem khih. Utæ wa kēiñ dakar da mih na dwar tæ lai u dei muaid cha wa em ka kari. Īēiñ u hajan ka kari tæ khreh u u mih lait heitæ.

U Lamchwa da pār suki næ cha wa em u, tæ mynda poi u hajan da ĩēiñ u khlem kieh dei wa rah ĩa ka deiñ lyṅkhot cha jroṅ iow sṅoh ĩa ō. Hawa mut utæ u kaṅ u khaṅ iow chēiñ u, dat u Lamchwa ō ha khlieh u phak næ, tæ pat u khnup heitæ.

NAIT O...

Pait u Lamchwa cha khmat u tæ iō u wa da iāplær u. Kamtæ lōit u Lamchwa iā ka jaket u tæ kdoh u iā ki kti u chadien. Kdoh u wan iā ki kjat u pyn da ka patlun jronj iōnj utæ wa da iāplær. Chim u iā ki dakar wa ki snop tæ noh u ki chapoh khlō.

Lai bianj u Lamchwa wēr næ deiwa apsiar khyrñan. Kat u poi u ha dwar, sñiaw u iēi sur kiad ka Maïa wa wan neitæ i kamra tæ sanjeh u kloñsnam u chipor. Deiwa tēiñsār u nei bynta í jinim ka Maïa, bōh noh u ki charōd iēi wa oñ u OC iā ō tæ psiah u chapoh iun.

Lai u wer næ dei wa pynbi doh ha chram. Ha kti timun u da ksoh u iōw deiñ lynkhot. Mynda poi u hajan tæ da sñiaw u wa klam u Rokki iā ka Maïa, "Ileh ũ bien pho u bam ja dei wa pyntun o leh? Kwah pho u doh o pha dei doh chwa mo? "

Dadep lōit u Rokki iēi wa kset ha ktien ko heipor wa mut u u ē ja iā ka. Kamtæ da lait ko u klam tæ oñ ko dei wa mynthu ko ō, "Phuit ka ksaw !"

Heitæ da chrai u Rokki tæ da ksoh u ka ha sñiuh tæ oñ u iā ka, "Myntu sakhiat tæ, u leh o deibor, u pyndep o iēiman sati iōñpha, iōw thñad pho. Heitæ sæ, u tip pho u burom iā ña kam u ckhaw pho!"

U Lamchwa da psiah syndet hapoh kataē ka kamra dei wa thaw u tied dow dēiñ ha khlieh u Rokki. Ka

NAIT O...

Maïa da kiad bian ko dei wa khyrñiat, u Rokki dachah da ka kti u tæ toh salit heh u ha khlieh tanwa ha kti u tæ da toh skit.

U Raju da mut u kynjoh ïa ka pistol kawa em hajron mïaj. Da poi ka kti u ha ka khmut pistol tanwa dat u Lamchwa chi kynjat ïonheh ïa ô ha rynkhi tæ siêd u cha chram tæ toh u heithña how nar jin Khan-ït tæ pat u ha madan. I thña u da mih snam, ka pistol leh da hâp charôd hapoh mïaj.

U Buda dei wa khyrñiat da khai na wa thiah tæ hei wom chē i buid i budia mut u da wan ki pulit næ tæ mih u bloit na kamra tæ phet u cha lait.

U Rokki da psiah chapoh mïaj ïow kynjoh ïa ka pistol wa hâp tæ ïoh u Lamchwa u kynjat ô ha kpoh u. Rah i bor kynjat u Lamchwa ïei doh u Rokki hadôh wa kynthih thuiñ tæ takhōh i rynkhi u napoh mïaj tæ hâp u ha madan.

U Lamchwa da bōh ïow deiñ ha madan tæ lōit u ïa ki tyllē wa kdoh ïa ka Maïa. Dañ du wa lait ki kti wa ki kjat ko da kdop ko ô u Lamchwa dei wa ïām.

Pait u cha ka tæ pait wan u cha madan wa da sdañ u Rokki u khai bian tæ oñ u ïa ka, "Dieh nañ lai pho. Ki pulit leh da jan wan hi ki kattæ." Pyllait u ïei kti ko na ô tæ oñ bian u "Dieh, lai!"

NAIT O...

Ka Maïa lai ko wēr næ tæ saŋeh ko ha dwar, kam ka wom kwah u ieh ō samen heitæ.

U Lamchwa da dem u tæ ksoh u ïa ki kjat u Rokki tæ tan u ō chabar ka mīaj. U Rokki da kyrthai tæ kynjat u ō u Lamchwa ha rupai tæ hāp u ha madan.

Khynjoh bian u Lamchwa ïow deiñ tæ bom u ha ka kjat timun u Rokki ïoŋheh. Da sñiaw ka Maïa ïei wa khaiñ ka chyēiñ kjat u Rokki tæ tymmoh ko ïei khmat ko dei kti ïoŋ ka.

U Rokki leh da kiad da ōd heitæ tæ da ksoh u ïa ka kjat u pyn ar-kti u. Da ktiēh ki kti u sui snam ïoŋ ō. U Lamchwa ïēiñ eh u deiwa ksoh ïow dēiñ ha kti tæ pait u cha u Rokki dei wa da jem i chrai.

Wom em u jōhkhe u u pait wa u Raju da khai u wēr næ tæ daïoh u u chim ka pistol tæ da ïēiñ u. Damut u'u siat ïow Lamchwa.

Heitæ da pyllait ka Maïa ïei kti ko tæ ïō ko ïeitæ tæ kiad ko, "Lamchwa!"

Taŋwa, ka suloi da pduŋ.

U Lamchwa da pait cha u Raju, tæ ïō u wa tia u chakhmat tæ pat u hajroŋ mīaj. Ka pistol da lait na ka kti u tæ da hāp ha madan. ïō u leh ïei wa kai i snam na rygkhi u hei watoh kuli u na ka suloi ki

NAIT O...

pulit kiwa da iō īci wa īcīñ u Raju heipor wa mut u u siat iōw Lamchwa. Heitæ iō u wa chē ki lait chabar iūŋ wei wa sñiaw u wa phet ki bru cheitæ.

Lai u cha ka Maïa, heitæ ka danoh mynsien, sñiaw ko, wada em itæ i kyrmen iwa skem deiwi tawan, heitæ da bi ko how Lamchwa deiwa dem khlieh ko ha rupai u. Ō leh dei womtip kammon u leh iēiñ heh u kam u chrot. U OC wa ki pāid iōŋ ō da poi heitæ tæ phah u ia ki laŋrut u u kdoh wei wow rah iōw Rokki.

U Lamchwa daïah u ia ka Maïa cha lait tæ chem ki ia u ma Kian wa ka Pynhun wa da poi heitæ. Phet ka Maïa cha u pa ko, tæ pyn arŋut ki da ia kduŋ da iām wa ki umkhmat kmen. Ka Pynhun leh kwah-bha i mynsien ko u likdup ia u Lamchwa, taŋwa ū nōd ko. Kamtæ ia pait heh ki, u wi ia kawi kām ki wa thlun u klam. Heitæ, u ma Kian da lai chajan u Lamchwa tæ kdup u ō, khlem klam iyi iyi leh.

Ar ŋut ki SOT da wan heitæ deiwa patah ia u Buda uwi chilian kti samen. U OC leh da mih na dwar tæ oŋ uwi na ki ia ō, "Pait uni wa chem i uwa rieh ha khlō heitai."

Oŋ u Lamchwa ia u OC, "Uni leh uwa em kti laŋ wa u Rokki. Daŋ em sa uwi uwa da kdoh o heitai hajan ka kari iōŋ ki hi."

ŊAIT O...

Da pait phylla u OC ĩa ō tæ phah u ĩa ki bru ĩon ō u li
pait ki ĩow tæ.

Da poi ki ha iun. Chilynter luti katwa dan lai ka kari, ia choŋ ki khlem iaklam sakhiat. Dan sñiaw dap ware i rupai ki da ki jār jār ki pyrkhat wei sñiaw, wa iakhlæh bōnjait iwa kset ia ki chy-oh ki.

U ma Kian da dap dei kmen wa da ioh bian u ia ka khon samen u dei wom em i ktah, i takha tamon ia i doh i pran, i rynieiñ ion ka. Dap u leh dei sñiawŋoh iwa khrō hadōh kattæ kattæ ia u Lamchwa ū tip de u kāmmon u ē khublei ia ō. Sñiaw u, wa lada bōh u waroh ka spah ka phaw, ka lak ka putit ion ō ha ka chilian pyrla, wow thaw ietæ; wom ia rynkatdor ko næ womkhia ko kat i sñiaw dapram u, iow Lamchwa.

Ka Maia leh dap ko dei kmen kam wa dapoi cha bnēiñ wa da lait ko na ki tyrsim u ksuid. Dap ko dei sñiawŋoh wei burom dei wom iē dē ko u sukyllian ia u Lamchwa, uwa khlem pyrwa iei ion ō-da-hi i jinim, da ialeh pyrchah u ia ki kan iow pyllait ia ka. Kynmō ko ieiwa lōid u nei chahkdoh ko, wa ialeh pyrchah haroh u ia ki bru u Rokki. Heitæ i por sñiaw ko da wiar lut i artatien i tēiñ ion ka waroh. Sñiaw chñain ko'u em hapoh ki kti ion ō, kyrsu leh i sñiaw maia kynthai ko ia ō cha wa palat. Pait siar ko ō chādien tæ iō ko wa rnip ki khmat u deiwa chaniah ha sit. Pait ko ia ō dei khmat wa chlai da i maia.

ŊAIT O...

Ka Pynhun leh dap ko dei pyrkhat wa i sñiaw bōn jait. Sñiawkmen ko wa da lait ka paralok ko na i jįnma wa khrō tam. Sñiawkmen ko leh u iō wa u ma Kiaŋ da lait u nei khuslai. Iwa khlan dōh i sñiaw i pyrkhat ko toh ia u Lamchwa.

Nadōh wa mih u na iuŋ u ma Kiaŋ, da dap i mynsien ko dei sñiaw syir ia ō. Teiñsar ko boi em iwa jia iwon iwon ia ō. Em i pyrkhat iōŋ ka, iwa kylli ileh wa kitkhia u u li pyllait ia ka Maia na kti ki kaŋ? Iyi i sñiaw u ia ka? Boi maia u ia ka ma-ai? Kini ki jįnkylli pynwit ki iei sñiaw maia iōŋ ka ia ō. Pait ko cha ō tæ iō ko kam wom em u bna u ia ka. Ō nanthiah u heitæ. Kwah ko u jan cha ō taŋwa teiñsar ko ia pyrkhat sih u ia ka. Kamtæ, ka leh da rŋip ki khmat, tæ pyndem ko ia ka khlich ha sit.

U Lamchwa leh, sñiawkmen u wa daioh u u pyllait ia ka Maia na ki kti u Rokki. Sñiaw kmen wei hun u, iei wa iē u u pynsakhiat, iei wa maia burom u iow ma Kiaŋ. Deiwa sñiawŋiah sñiawjrem, da chaniah u ha sit tæ rŋip u ki khmat u, iow thiah u heitæ, taŋwa, ki jįnmut jįnpyrkhat u, ū chah ki ō u lai khmat. Sciwi leh, sñiaw u kām wa khai iñ doh bian u itæ; kamtæ, pān um u now ma Kiaŋ tæ dih u i dawai kuli wa sai u na kata u, dep neitæ, da chaniah khlich bian u ha sit, tæ rŋip u.

Em i mynsien wa kwah u u jan cha ka Pynhun, weiwa kwah u leh u tawah ha ka, taŋwa tēiñsar u ia

NAIT O...

pyrkhat sih ko ō. Kamtæ, neh u heijōh i thaw, deiwa khlem khieh cheiwon cheiwon leh. Kynmō u ïeiwa ka Maïa dem khlieh ko hā ō, tæ sñiaw wit u, wei wom em u ksoh u ka leh, wa tēiñ u ïa sñiawthōh bakla ko ō. Neibhah i maïa burom u ïa ka, man i, kam wa maïa burom u ïow ma Kian. Sñiaw u ïa ki kam ki wa ha iun ha sem u, toh du ki donhi kiwa maïa ïa ō, wei iarap ïa ō wa ïa ka iun ka sem u.

Da ïa hiar lut ki na kari tæ on u ma Kian ïa ō, "Me thiah noh ha *Guest Room* myntu mo, ka baik mi leh iow phah lithōh wan o ka ha ki nonkreh mynstep."

U Lamchwa leh on u "to næ", tæ da bōd u ïa ki iow psiah chapoh iun.

Ha katae ka miet ha kattae ka iun, u em ki wa lai khmat u thiah. Dadep ki u sum u sait, dadep ki u bam u dih, u iachonke chipor, tae da ialai ki jar jer i thawthiah. Ka Maia wa ka Pynhun iathiahlan ki ha kajoh ka kamra, kat wom em u laikhmat ki u thiah, ia parom ki chapan iwa jia ynne ka snj wei miet. U ma Kian leh heibon pyrkhat samem samem, u lai khmat u katwa thiah u leh.

U Lamchwa leh da thiah u ha thawthiah hapoh ka *Guest Room*. Da wiar itae i sniaw indoh u, tanwa u lai khmat u u thiah. Mut u u phon cha iun tae dam wan u, mynda pait u iei por hanpaia la pyrdi synniaw. Kamtae khmied u cha sad tae lai i pyrkhat u, cha ki diah wa ka bei u chibet cha ka Maia wa ka Pynhun. Kat nan lai i por u sniawthoh de u tan wa lai ki khmat u leh.

Mih u Lamchwa na iun u ma Kian hei step mynda dep u u dih cha. Chwa u mih u, klam u ma Kian ia o, "Lam, na u on bian o ia me, chihajarnoh ieiwa daleh mi nei bynta ion na wa ka Maia. Dei yi u su kyllian o ia me leh u sniaw tipsap de o. Kamtae, me, mynda emkam mi iyi iyi hei lian ka poisa poilain nae iyi iyi leh, ham murieh ia na, mo."

"To, phi... ma," jubab u Lamchwa, "ka burom ka iun ka sem phi, man ko, ka burom ka iun ka sem ion na

NAIT O...

hi, hawa kamtæ, iwa leh o, u iada ia ka iun ka sem ionphi, man ki i bynta u iada ia ka burom ka iun ka sem ion na hi. Tæ kammon u bōh dor o ki?"

U Ma Kian ũ tip dē u u jubab. Kamtæ pait hi eh u cha u Lamchwa dep tæ dem u chapoh kam uwa bōn pyrkhat.

Hadien neitæ, on u Ma Kian ia ō, "U lai mi cha iun kattæ tæ, chim rah da ka Bolero mo. Ka baik mi, u phah lithōh o ka ha u Richan chibet, tæ ieh u chabi baik mi ha iun, mo. U lai lan wan i chibet cha thanat mynda wan mi na iun."

U Lamchwa danɗep kyllian sula-patlun u ha iun tæ iachonɗ khana parom u wa ka bei u wa ki diah u.

Danɗ chonɗ ki ha chynkōh waroh ki, ka bei u danɗ onɗ ko iā ō, "Ŋa da teiŋsar bha o ynnin i miet mynda khana u Marbōd iei rukom phōn mi, ũ tip dē o u thiah u chonɗ, wa pyrkhat o, ũ lai khmat o leh u thiah. Ŋōh o iow Blai waroh chimiet iow emlanɗ wei wow iarap u iā me iā ki kām waleh mi, neibhah ũ tip o iyi, wei cheiwon. Embhah mi wa danɗ em u Blai chirup, heijōh ipor ŋait o, wa u Pa phi leh ũ ieh u i, emlanɗ u chirup heiwon iwon i kām, wei wow ksan nia u na womiōh u iō."

Klam pynkut ka bei u Lamchwa iā ō tæ ē ko iow kwai wa da sonɗ ko iā ō. Heitæ, lunɗ u nōd, i mynsien u Lamchwa ũ tip dē u wow onɗ leh. Ha mynsien u onɗ u, *"Ka Bei, tæ kat ka Bei, t'm emdē ha pyrthai, kawa kdup wa lana iā ŋa, wei her-r'ŋu wei syndonɗ iā ŋa."*

Ũ iōhsa dē u khlem khana waroh iwa jia. Noh mynsien ka Bei u heitæ 'hæ' næ; hun i mynsien ko iā ki kām u khon ko, weiwa iō ko iā ō kamwa jōh iō hi ko, ũ em u phēr u iwon iwon leh.

Onɗ ko iā ō: "ha wa leh ieiwon iwon i kām wabha, neibynta ibha, u Blai ũ jōh ieh u; kamjōh i leh, waroh chi-iunɗ chisem, emlanɗ i chirrup."

NAIT O...

U Lamchwa da bam iowtæ u kwai tæ pait u cha ki diah u tæ oŋ u ia ki, "Kamwa ioh chuti phi ynne tæ, pi, iow ia kē o phi cha iuŋ u ma Kian iow pyntŋen phi ia ka Maia." Da iō kmen i dur ki heitæ tæ da iēiñ ki iow khreh lai.

U Lamchwa da sai poisa 12 hajar na kata tæ ē u ha ka bei iow bōh ko. Ka bei u da chim ko ia ka poisa tæ dalai cha kamra thiah. U Lamchwa heitæ kbai u deiwa pait cha kāmra u diah u: "Marbōd, lam kitu ki juti o heini."

Da wan u Marbōd deiwa rah ki juti ha kti tæ bōh u ha jan trē kjat u pun u. U Lamchwa heitæ da pait cha u Marbōd dei sōhrkhai tæ oŋ u, "Adē... ynne tæ riam mi kam u wow lai ke khyllōd mo."

Sohrkhai u Marbōd tæ oŋ u, "Æ... u pun leh klām danda ware u ia ŋa man ki por. Cheiwon u ioh por u lai kē khyllōd, taŋ ia ka kot leh ū pu dep por u khreh, wabōn saŋ ki; wei dajan ka *Selection Exam* i kattu."

U Lamchwa daŋ kdoh tyllē juti u tæ oŋ u ia ō, "To, næ me...klam kē hi eh o ia me leh, sñiaw kam wa em sakhiat!"

Da dep u u kdoh juti tæ iēiñ u dei wa klām bian iow Marbōd, "Ileh ka Salan slem saŋ ko u khreh. Iyi de ioh ko u khleh itæ? Ka leh u lai kē khynrō ko mo?"

NAIT O...

Klam u dei sōhr'khai. U Marbōd leh da r'khai pyntōh.

Heitæ da mih ka Salan na kāmra ko tæ oŋ ko iow pun ko, "Iyi ioh phi u oŋ ia ŋa pun?"

"Wom em doi, pi lai i," jubab u Lamchwa ia ka dei r'khai, tæ klam u ia ka bei u, ka leh dawan ko heitæ, "Mo bei, u lai noh i kattæ."

"To, khon, dieh. Lai dei miat." Oŋ ka bei ki.

Ka Salan wow Marbōd leh da klam ia ka bei ki tæ da iāmih laŋ ki na iuŋ.

Mynda poi ki ha kari, da iaknieh ki u iachon hakmat wow sanpun ki. Kamtæ oŋ u Lamchwa ia ki, "Marbōd me chon noh ha pyrdi, ieh ynchon da ka Salan ha said."

Ha luti, katwa dan lai ka kari, iaknieh ktien ki, u Marbōd wa ka Salan, u khana parom iow Lamchwa chaphan i kām puræ ion ki wa chaphan ki paralok ion ki. U Lamchwa dap u dei kmen wa ioh u u emlan wa ki ynne. Kamtæ dap i dur u dei sōhr'khai.

Mynda psiah u Lamchwa ha khyrdep, da chynna u ia ka baik ion̄ ō wa da em ko ha pchem iun̄. U ma Kian̄ dan̄ klam u iow non̄kreh ion̄ ō wa dan̄ sait ia ka kari Olto ion̄ ki. Pait u ma Kian̄ cha ka Bolero wa da psiah hapoh pchem tæ iēiñ u charōd iow pyn̄iēiñ u Lamchwa ia ka heitæ.

Ka Salan da hiar chwa tæ li ē khublei ko iow ma Kian̄, u Marbōd leh, leh u kamjōh tæ kylli u ma Kian̄ ia ki ia ka bei ki, wei chaphan̄ i puræ puthi ion̄ ki. Jubab ki ia ō deiwa em burom tæ on̄ u ia ki, "Dieh psiah chapoh iun̄, ka Maia wa ka Pynhun da ian̄ ki ia phi."

Da lai ki, katwa u Lamchwa dan̄ iēiñ hajan u ma Kian̄.

On̄ u ma Kian̄ ia ō, "Myntu tæ ū boi li pait kreh mo, manda wan i na thanat, u lai kē i cha Park iow sñiawsuk ka Maia, iow smat mylliñ ko iei wa jia ynnin."

U Lamchwa leh ky'i u iei wa on̄ u ma Kian̄ tæ on̄ u ia ō, "Toh hi iwa on̄ phi, tæ... hoihi na on̄ u iah lan̄ wa ki diah o?"

"Miat ware pathan sæ..." jubab u ma Kian̄, "Nan̄ ioh lok chōh chōh ko na on̄! Pi psiah i cha iun̄ iow

NAIT O...

bamja i. Na sñiaw o ũ hoi dæ wa thŋan o!"

Pait u cha u nonkreh wa sait kari tæ oŋ u ĩa ō, "Sait wa kani mo mynda dep mi katu." U nonkreh da ky'i u tæ u ma Kian wow Lamchwa da psiah chapoh ĩuŋ.

U OC pait u cha u Lamchwa tæ pait wan u cha ki kot wa em ha jronj mīaj iōŋ ō tæ pynlanj u ĩa kitæ ki kot ki sla. U Lamchwa leh pait u cha u OC tæ dem u. U ma Kianj wa ka Maĩa da mih ki na itæ i kamra u OC. Dadep ki u saiñ ĩei stētmen iōŋ ki. Ō leh da dep u u saiñ tanjwa phah ĩanj u OC ĩa ō toh wa danj em i wow klam u ĩa ō.

Ha mynsien u da teiñsar u boi ō leh daw chah kset u ma-ai? Pait u cha i dur khmat u OC tæ ũ chynna u iyi wa em hei pyrkhat iōŋ ō, kamtæ dem bianj u.

Pyrkhat u ĩei wa dadep khana u OC ĩa ki. U Rokki wow draibar katu ka maruti wen danj chah sumar ki ha Civil Hospital. U Raju da ĩap u kat u poi cha hospital kamtæ danj pynsah ki ka met ĩap u ha hospital iow leh *post mortem* ki. U Buda won uwa lait nei mynsō tæ da kset ki ō ha patok.

U OC dadep u pyllanj ĩa ki kot wei dadep leh u thap ki hapoh ka *File* tæ klam u iow Lamchwa, "Me tæ... kāmmon u oŋ o ĩa me khynrō."

U Lamchwa da ap ĩei wa klam u OC.

"I sñiaw suk leh em hi, i wom sñiawsuk leh em hi."

U Lamchwa da pait kam wom sñiawthōh.

NAIT O...

Pteiñ bian u OC, "İō mi, da oñ o ĩa me ham ak *Ilero* leh, da leh tam mi; embhah mi wa dañ em u Blai wa me tæ lait mi nei takha nei mynsō, wat nei ĩap leh."

U Lamchwa da rap ktien: "Kammon u leh o Sar? Hawa sñiaw o wa kiad ka Maia tæ mut o jan da mut ki u leh sih næ pyniāp ĩa ka. Dei wom neh chah u choñ apkē, tæ tur bait o man katwa man leh."

"Toh hi iwa oñ mi," oñ u OC, "tañwa, mynda chlōr, ũ jōh hoi u leh bēij ĩa poi chei ĩap. To, du wa da lait mi nei yi iyi, weiwa, ka Maia leh ũ em iwōn iwōn ĩa ka, tæ, kat iwa da dep jia du i wa da bian hi. Sñiawsuk o leh, wa kani toh ka *Fastest Case* kawa *solve* i du hapoh 12 kynta. Kamtæ, ē khublei o ĩa me ĩei ĩarap mi ĩa i."

Ē u OC ĩa ka kti u, tæ u Lamchwa leh chim u ĩa ka kti u OC tæ ĩa khublei ki dei wa sōhr'khai.

"Dieh, da bian u lai mi kattu. Lai chakhmat khynrō, ha ki kām wabha ĩoñ me." Klam pynkut u OC ĩa ō.

U ma Kian, deilan wa ka Maia, ka Pynhun wa ki diah u Lamchwa, da sya wa ĩañ hapoh kari, heipor wa khyruiñ u ma Kian cha dwar thanat, tæ iō u wa damih u Lamchwa.

Manda poi u Lamchwa ha kari, kylli u ma Kian ĩa ō, "Iyi ĩoh u OC u oñ ĩa me?"

ŊAIT O...

"O... ē khublei hi eh u ĩa ŋa," jubab u Lamchwa.

Heitæ ky'i u ma Kiaŋ deiwa sōhr'khai tæ oŋ u ĩow Lamchwa dei wa ē u chabi Bolero ha ō, "Chim ĩah da me kattu ĩow lai noh i cha park kattæ wot."

Waroh da ĩapāit hi eh chow Lamchwa, tæ suki ki kiaw næ, heitæ psiah ki hapoh kari, wa ō wow ma Kiaŋ, tæ ĩalai wot ki.

Mynda poi ki cha surok heh, tæ oŋ ka Salan ĩow Lamchwa, "Pun, tem sur næ!"

Kiwa choŋ chadien waroh da ĩa oŋ laŋ ijōh. Khyr-
uiñ u Lamchwa cha ki, tæ sōhr'khai u cha ki, tæ tem
wot u ĩei sur ĩow hun ki.

U Ma Kianj wow Lamchwa danj choŋ ki ha kawi ka ben kawa em ha trē u dēiñ Chyrŋan hapoh Park. Nanj pait kē ki ĩeiwa ĩabeh kyndeh ka Maia, ka Pynhun, u Marbōd wa ka Salan ha khāp ki dēiñ, dei kmen wei sōhr'khai waroh waroh.

Kattæ da ĩaknieh kyndeh ki u choŋ doidit.

Pait u ma Kianj ĩeitæ tæ oŋ u ĩow Lamchwa, "Manda ĩō ĩei wa kmen wa sōhr'khai ka Maia tæ ĩō kam wa da mylliñ ko ĩei wa jia ynnin, ũ toh næ Lam?"

Pait u Lamchwa cha ki tæ ĩō u ĩei wa ĩakmen ĩa r'khai ki tæ jubab u deiwa sōhrkhai, "Toh hi ma."

Ha mynsien u kwah bha u u ĩachonj wa ka Pynhun ha ka ben wa em charōd kam wa ĩachonj ki khynrō khyllōd chijur kattæ heitæ.

"Ū toh dahoi u lai dih cha i?" Kylli u ma Kianj ĩa ō. "Ha!" Khyrŋiat u Lamchwa nei wa mutdur u. "O... dahoi hi sæ, ma. To, ŋa li khut o ki mo," oŋ u Lamchwa tæ lai u cha wa em ki tæ li khut u ki ĩow lai dihcha ki.

Ha katae ka miet chwa u thiah u Lamchwa, kynmō bian u ïeiwa dadep ynne ka sni. Sñiaw dap u dei kmen wa ïoh u u emlan wa kiwa maïa ïon ò waroh chisni. Kynmō u ïei wa ïakmen ïarkhai ki diah u wa ka Pynhun wa ka Maïa heipor wa dan lehkē ki ha *park*. Katwon sñiawhun u u pait ïa ki kamtæ.

Pynbor u ma Kian u lai bait cha iun ïon ki da ka Bolero manda mih ki na *park*. Ka sni leh dan kat u sep wot ko, kat u poi ki ha iun ïon ki.

Ka bei ki dan hei khreh u chet u tu, sñiaw ko ïei wa wan ki, tæ sanjeh ko ïeitæ. Ìachonkē ko wa ki tæ tyrwa cha ko ïa ki, tanwa ū bien ki, deiwa on, wa danjep dih wot ki ha *park*.

Pyntipmit u Lamchwa ïa ka Pynhun ha ka bei u tæ dei wa sñiaw sarom ak u kam wa emkām tæ mih u cha lait.

Hadien chibet, da ïamih u ma Kian, ka Maïa wa ka Pynhun iow liwan noh tæ on u iow ma Kian: "Ileh, u lai noh phi?"

"Ha-o," jubab u ma Kian ïa ò tæ pteĩn bian u, "smat wan mynstep mo, wa em ki kām wa mut o'u ïaklam wa me."

ŊAIT O...

"To, ma." Jubab u Lamchwa tæ pait u cha ki katwa dan lai ki.

Ka Pynhun khyr-uiñ dien ko iow pait ia õ chwa u lai tæ õ leh da pait cha ka, tæ da ia sōhr'khai ki para ki.

Ka Maia leh khyruiñ ko tæ iō ko iei wa sōhr'khai u Lamchwa tæ mut ko ia ka næ, tæ ka leh kmen i mynsien ko heitæ tæ sōhr'khai ko ia õ dei wa khrip khmat ia õ.

Ŋaiñtharu u Lamchwa. Da kulmar khlieh cha õ.

Kat hei step, u Lamchwa da li pait khih pait kreh
chalōm wa cha thaw stok mō.

Ka Maïa da lai laŋ wa ka Pynhun chapoh chnoŋ.
Kwah ka Pynhun u psiah ha man ki thlu iuŋ iow
kylli jinŋkylli ïa ki tre iuŋ hei iatoh wa ki kām
Research iouŋ ka.

U Lamchwa da liwan bait u cha iuŋ toh wa slem u u
pyndep kām ha kani ka sŋi. Kat mynstep leh da lai
biaŋ u cha lōm daŋ step iow pait kreh. Kwah hi u u
lai chwa cha iuŋ u ma Kiaŋ taŋ iow ioh u pait ka ka
Pynhun taŋwa i mynsien khih-hok iouŋ ō ũ chah ko
u slem u u poi cha thawkhih. Kamtæ ũ bna u ïeiwa
da lai Shillong ka Pynhun ynne ka sŋi.

Kat hei miet, katwa daŋ khreh thiah u, kynmō u ïa
ka tæ da mut u u phōn ïa ka taŋwa daŋ em i sñiaw
wit u, tæ dam noh u.

Heitæ i por kieh ka phōn u tæ kmen i mynsien u u
iō dei nambar ka Pynhun tæ klam u jai næ ha phōn
toh ũ kwah u u sñiaw ka bei u næ ki diah u.

"Hei!" Klam u Lamchwa ha phōn deiwa tymmoh ïa
ka phōn dei sla kti.

Ka leh jubab ko: "Hei!"

ŊAIT O...

Pyn-ar ŋut ki, da ĩa suki kam kiwa tēiñ u klam, næ kiwa artatien iyi u oŋ, boi toh lait i ktien i thylliej.

Hadien chibet, oŋ ka Pynhun: "Tæ, ileh suki mi? Klam na-oŋ?"

"Ŋa pathan ĩaŋ o ĩow klam pho. Pha wa phōn cha ŋa tæ-n'oŋ?" jubab u Lamchwa ĩa ka.

"O... wa phōn hi eh o cha me toh wom em u ĩoh o'u klam ĩa me chwa u lai Shillong o ynne, tæ phōn o me kattæ."

Heitæ khyrŋiat u Lamchwa wei sñiaw u leh kam wa em iwa duŋ ha rupai ĩoŋ ō. Syndet syndet dait thah i mynsien, du wa tip u wa da em ko cha jŋai. Han la kamtæ leh, klam u dei sur wa ũ em i sñiaw kamtæ ĩa ka, "Hanpaĩa la cha Shillong pho kattæ? Kiyi wa li bōh pha?"

"Lai o da ka kari pasenjar næ. Wom kwah o' u pynsaja ĩa ka Maĩa næ ĩow ma Kiaŋ kat ĩeitæ heh." jubab ko ĩa ō.

"Ŋa leh hei bōn ware ki kām wa sahteiñ tæ ũ em u ĩoh o'u wan mih cheitu ha kini ki ar-sŋi. Daŋ mut o'u wan mynstep næ toh wa em kām haroh o ĩow ma Kiaŋ." Ē daw u Lamchwa.

"To, daw wan bianŋ hi o hadien chibnai, tharai. Lada

NAIT O...

smat o'u pyndep kini ki *experiment* iōŋ ŋa cheini tæ da smat wan hi o, neibhah, hāp leh bian o kijōh ki test cheitu man u bnai, hadōh wa dap snem pura. Seiwi leh, ki jīŋkylli cha ki iūŋ ki sem cheitu leh ũ pu em u dep o ki. Daŋ 15 iūŋ heh wadep o; daw emkām hi o iei iārap iōŋ me wa ka Maia."

Da wiar itæ i sōh ha rupai u mynda sñiaw u ieiwa oŋ ko, tæ oŋ u ia ka, "İeitæ tæ, lada bien u ma Kian taŋ u pyllait ia ŋa, tæ kat cha wa oŋ pho leh u lai bait o."

"Khublei chibōn iei wasbun mi u iārap ia ŋa, ũ iē dē o, u su kylliaŋ ia me," oŋ ko ia ō.

"To... pha, kām iei tæ leh..." rap ktien pynsmat u Lamchwa ia ka, taŋwa ũ tip de u kammon u pteĩñ iei klam u, tæ kyoh u dei kyoh.

"İleh me? Ũ em u chait mi mo?" Kylli ka Pynhun dei sur wa sñiaw teiñsar iei bynta u.

"Ũ em, doi; tharai, wa da ŋiah ware ka pran o ynne tæ chrai ko ŋa deiwa pynkhai-kyoh ia ŋa," klam u iei sakhiat dei danda.

"O... kamtæ sæ!" oŋ ko ia ō. "Thiah noh dei thaih meitæ, iow wiar i ŋiah mi." Daŋneh hi itæ i sur teiñsar iōŋ ka.

NAIT O...

"Ha thawthiah hi em o kattæ," oŋ u Lamchwa. "Da mut hi o u thiah noh, tæ wan ka phôn phi."

"To, meitæ, thiah suk mo, tæ phôn wan sæ cha ɲa teiñ-teiñ mo! Ham khāpnaw ware" Klam ko ïei tæ i kyntien khatdōh dei wa klam pynjaw heh ïa ō.

Ō leh, dei wa sñiawthōh ïei jinmut ko jubab u ïa ka, "To, pha leh thiah suk, daw phôn sakhiat o chimiet chimiet iow dōh pho u thiah." Rkhai khyrɲaŋ u katwa daŋ klam u ïeitæ.

Ka leh da rkhai ko tæ oŋ ko ïa ō, "Lada phôn mi chimiet chimiet tæ, me leh da dōh thiah mi na-oŋ?"

"O sakhiat mo! To, ich dam o'u phôn meitæ mo!" klam kyndeh u ïa ka.

Ka leh da klam kyndeh ïa ō. "Lada dam mi u phôn ɲa, tæ ũ bien de o u klam ïa me!"

"Kamtæ!" jubab u ïa ka, tæ deiwa kwah u pynchrai kyndeh ïa ka, oŋ u, "Lada kamtæ, da lait o na-oŋ u ap ïei sur khroh-syrdup iōŋ pha!"

Heitæ, ka leh da ak kam wa chrai tæ oŋ ko: "Ka sur ki khroh-syrdup daŋ em kiwa sñiawsuk u ap, wa kyn-oi thiah ki ïa ki. Taŋwa ka sur mi wan la kam ka kyoh ksaw. Taŋ u ap leh da sñiaw taroi saŋ!"

NAIT O...

Da wyrñia ki hei klam kyndeh dei ãa-r'khai wei pynchrai para ki khlem sñiawthōh de ãei wa lai i por.

Khatdōh, oñ ka Pynhun, "Ūtoñ oñ mi da ñiah mi næ? Thiah noh mo. Ìa phōn wan i. *Good Night.*" Klam ko ãei ktien phareñ dei wa pynjlān.

U Lamchwa, ũ kwah dē u u kut itāe i ãa klam toh wa dap u dei kmen katwa dañ ãaklam ki. Tanwa i tipchē ãoñ ō, oñ ko da palat ka por thiah u, toh wa dañ hāp khai u dañstep. Kamtāe oñ u ãa ka, "To meitāe, du wa da ñiah pho u klam, tē pha leh thiah suk mo." Sñiawsuk u leh, u klam kyndeh ãa ka.

Bōh u ãa ka phōn tē pynwan biañ u hei kynmō ãei wa dañdep ãaklam ki kam wa riwaiñ biañ ãa ka *tape*. Sñiaw em jingkyrmen u, mynda pyrkhat bha u ãei rukom klam ãoñ ka. Laikhmat u dei wa neh i sōhr'kai ha i durkhmat ãoñ ō.

Ka Pynhun leh, du wa bōh ãa ka phōn hapoh syñkhien ãoñ ka, kup ko ãa ka thatkup tē pyrkhat ko cha u Lamchwa. Chwa u mih ko na ãuñ u ma Kiañ ynne i step, ãō luti ko u ãachem wa ō. Tanwa ũ em u wan u. Ma ãoh ko deisa, ũ em u kwah ko u lai khlem klam ãa ō, tēinsār ko ãa oñ pathan u kawa saroñ næ. Kamtāe, dei wa kwah nadōh mynsien u klam ãa ō, phōn ko cha ō chwa u thiah ko.

ŊAIT O...

Sñiawhun ko wei sñiawkmen ko leh, wa daïoh ko'u
ïaklam wa ô. Ka leh pynwan bian ko hei kynmō ko
ïei wa da ïaklam ki ynne tæ pyrkhat ko ïei tæ chi
slem ne. Kat hei che step, ũ kynmō de ko katwon
waje wa laikhmat ko.

Ki sji ki taiaw da lai ki khlem sñiawthōh ki, hei ïaleh ki u pyndep jar i kām ki wa man ka sji.

Ka Maïa leh da em i jingylla hei rukom klam ko ïow Lamchwa taŋwa ō wan ũ em u bna u ki.

Ha kawi ka sji, katwa daŋ choŋ ko ha chuki u Menejar ha dukan *hardware* ïoŋ ki, poi u Lamchwa heitæ. Ka da ïēiñ nei wa choŋ deiwa oŋ ïa ō u choŋ hei thaw ïoŋ ka, taŋwa ō wan, hei wa jhan u u pyndep ïei kām da klam kat ïei kām wot, tæ da mih neitæ.

Silet ko wa smat mih u, toh wa daŋ kwah ko'u choŋ chōh u heitæ ïoh ko'u klam u parom ïa ō. I sñiaw ïoŋ ka ïa ō dadap dei warom wei maïa wapura. Kamtæ, kwah ko u pynche ki ha ō, taŋwa ũ ïoh lad ko. Kamtæ, kun ko ha mysien ïoŋ ka ïēini waroh.

Bōnsien kwah ko u phōn ïa ō. Taŋwa, em i sñiaw wit ko ha mysien, tæ dam ko. Ha kawi ka sji, deiwa pynchlōr ïei mysien phōn ko ïa ō.

U Lamchwa daŋ heipor wa su noŋ ïa ki wakreh rap u ïa ka phōn tæ oŋ ka ïa ō, "Ei... daw wan mi cha iuŋ na-oŋ, chwa u liwan mi?"

Ō leh dei wa sñiaw wit hei pyrdi i kām, jubab u,

NAIT O...

"Daw pait o sæ, lada smat dep kām o neini. Ileh? Emkām?"

"Ū em... " jubab ka Maïa dei pynjlan ïei klam, "wa... kwah heh o'u kylli."

"To meitæ, bōh chwa o mo, wa da jhan o u pyndep ïei kām heini." Dep u, u klam, pyndam wot u ka phōn.

Ka Maïa dei pisa mynsien choŋ pyrkhāt ko heitæ chislem næ. Kynmō ko ïa kitu ki por wa jia ha iuŋ ka Lana tæ sñiaw sarom ko wow kynmō ïei wa muaid kyiad ko hadōh wa duk u Lamchwa u rah ka deirah iabor. Wom iē ko leh u mutdur kammon u jia ïa ka, lada ū em u Lamchwa heitæ i por. Tip boi da dōh ko ïei jinlon sati ko leh, ū iē u oŋ.

Kynmō bian ko ïa kitu ki por wa pyllait u ïa ka na ki tyrsim u Rokki tæ wan bian itæ i sñiaw maïa ko ïa ō. Thraŋ bha i mynsien ko u khana ïa ō ïei sñiaw i iōŋ ka taŋwa ū nōd ko. Kamtæ, kun ko ïei maïa iōŋ ka hadōh wa sñiaw ko la kam wow chlai i rupai iōŋ ka.

Ha katae ka miet wa phōn ka Pynhun iow Lamchwa,
 ō daŋ ha thawthiah, wa pisa laŋa u toh wa khai bian
 ka rih u. Kamtæ, dadih dawai rih u tæ mut u u thiah
 leh ũ em u laikhmat u toh wa kjut sei khlieh u leh.
 Toh ũ em u kwah u u khana ia ka, wa chitom u næ
 tæ, klam u ia ka kām u wa da baŋ thiah bha tæ smat
 bōh u ka phōn dei wa oŋ ia ka wa daw phōn u ia ka
 mynstep.

Kitæ ki ar sñi, lai kreh u Lamchwa dei wa sñiaw chitom i doh i pran u. Ha ka janmiet sñi wa lē, poi u ha iuŋ u ma Kian deiwa mut u ē ki poisa bai mō tæ chem u da ka Pynhun ha kamra chet. Kyndeh i mynsien u du wa iō u iei dien iōŋ ka katwa daŋ tu cha ko.

Sñiaw ko iei wa em bru tæ khyr-uiñ ko.

“Ari! Da me mo!” klam khyrŋiat ko u iō da ō hadōh wa hāp wa ka siaŋcha wa ksoh ko ha kti.

Ō leh dei sōhrkhai lai u hajan iōŋ ka tæ jiēd u ia ka siaŋcha wa hāp ha madan.

“Ileh khyrŋiat pho? Iō la kām kawa iōh tdoŋ pseĩñ?” Kylli u ia ka katwa daŋ chim ko ia ka siaŋcha na ki kti iōŋ ō.

“Wom poi pyrkhath o’u iō da me na-oŋ.” Jubab ko ia ō dei dur khmat wa sōhrkhai. Taŋwa hapoh mynsien wan klam ko: *“Wa da thraŋ ware o u pait ia me tæ kyndæh i mynsien o dei kmen u iō ia me kattæ.”*

“To meitæ, ŋa u mih o neini, ia wit pathan pho manda wan utæ u wa iō luti pho u wan.” Klam danda u ia ka dei wa ak kam wow lai sakhiat.

NAIT O...

Ksoh pynsmat ko ò ha kti u tæ on ko, "Ileh me leh kwah pynjaw saṅ mi ṇa? Choṅ na-on ṇow dihcha i!" Tān ko ò hajan ka chuki tæ pynchoṅ ko ò.

Katwa daṅ choṅ u heitæ, pait u ïei wa pynkhreh chā ko. Kat naṅ pait u ïa ka, naṅ kyndæh i mynsien u. Katwon wa kwah u, u khana ïa ka, ïei sñiaw i ṇoṅ ò, taṅwa, ũ nōd u. Kamtæ, choṅ u heitæ kam u wa dōh lyer.

Katwa daṅ dihcha ki, wan u ma Kian tæ theh cha laṅ ka Pynhun ïa ò. ïa parom kām ki ò wow Lamchwa katwa ka Pynhun naṅ pait cha ki.

Manda dep ki u ïa dihcha tæ ē u Lamchwa ka poisa bai mō ha u ma Kian.

Katwa daṅ mut u ma Kian u psiah cha kamra thiah, on ka Pynhun ïa ò, "O ma, pyllait ò u Lamchwa mynstep mo, ṇow lai u cha lōm wa ṇa."

Manda dep ky'i u ma Kian ïa ka, pait u Lamchwa cha ka, tæ on u ïa ka deiwa sōhrkhai khyrṇaṅ, "Kammon pyn ky'i chwa pho ṇow ma, ha wa taṅ ṇa leh ũ pu em u ky'i ïa pha?"

"Ladym bien mi u lai tæ on na-on, ṇow khut o da kiwi." Ka leh klam ko dei sōhrkhai ïa ò.

"Ileh u dam o'u bien doi, hawa kat pha saṅ u khut?"

NAIT O...

jubab u Lamchwa ĩa ka. "Na u lai chwa o cha dukan kattæ mo, wa phah wan ka Maĩa ȝa. Tæ, ĩachem wan i mynstep, mo!"

"To, wan daȝ 8 waje i step mo! İow smat dep kām o," oȝ ko ĩa ō katwa daȝlai u.

Ō leh khyruiñ u cha ka tæ jubab u, "To, Memsāb!" Rkhai khyrȝaȝ u tæ mih pynsmat u neitæ.

U Lamchwa naŋ kâp hakhmat hakhmat deiwa kêiñ
ki tiar ka Pynhun, katwa ka wan naŋ bôd nadien
nadien iŋ ō. Da pyndep ka Pynhun iei kām iŋ ka
ynne ka sŋi ha Wah Um-blōh. Kattæ, daŋ ku ki iow
Riat Mōjem iow poi ki cha ka surok wa bōh kari ki.

Mynda poi ha pyrdi riat, ka ũ hoi de itæ i sñiaw
ŋiah itæ i lâi kjat tæ oŋ ko ia ō, “To, næ, choŋ ŋiah
chwa i heini ha tre dēiñ.”

Sanġeh u u kap heitæ tæ khyruiñ u cha ka. İō u wa da
sō kyr-aŋ i ŋāp ko weiwa da mih chit ko. Sōhrkhai u
ia ka tæ pait heh u cha ka katwa daŋ choŋ ko ha tre
dēiñ deiwa pynhiar mysien iŋ heh. Ō leh da choŋ
mar pyrchah iŋ ka.

“İleh rkhai mi?” kylli ko ia ō mynda rap wiar itæ i
ŋiah ko.

Klam danda u ia ka deiwa oŋ, “Wa iō o kat tynne i
dur pho tæ la kam u tŋō.”

Heitæ chim ko dow mō khian na madan tæ panaŋ
ko ha khlieh u. Ō leh ak u kam wa kjut tæ tba u cha
khlieh u heiwa toh utæ u mō.

“Pha tæ... iāmrem saŋ pho mo!” oŋ u ia ka. “Klam
kyndæh o leh, chrai sakhiat pho.”

NAIT O...

"Tip hi o wa klam kyndæh mi tæ ɲa leh dat kyndæh o na-oŋ." Jubab ko ïa ò. "Lada chrai sakhiat o tæ, dow tai u mō heh n'oŋ u tyndaŋ o ha khlieh mi!" Klam ko dei sōhrkhai.

"Taŋ u rah ũ iō ïe, tæ kōp pho u tyndaŋ ɲa da'u tai u mō? Dieh rah tæ tyndaŋ na-oŋ!" Klam kōp u ïa ka.

"Pait mo! Ham mut wa tlot bor o ne! ïa rah pathan o da me tæ panaŋ o me cha wah!"

Kamtæ lai ka por hei klam danda klam kē ki, deiwa ïa rkhai ïa kmen. Pyn-ar ɲut ki, kwah ki, u ïa khlai ïei sñiaw iōŋ ki uwi ïa kawī, taŋwa ũ sñiaw tip sap ki kammon u sdaŋ. Ha mysien ki da tip ki wa em hi i sñiaw ki.

U Lamchwa leh ũ sñiaw tipsap u kammon u tyrwa ïei maïa iōŋ ò ïa ka, wei wa sñiaw tēiñ haroh u boi kynteit ko ò.

Ka Pynhun leh sñiaw sarom ko kam ka kynthai u tyrwa da ka. Kwah bha ko u ïajan wei mysien u, kwah ko leh u tip u chaphaŋ iōŋ ka, iow sñiaw jan u cha ka. Kamtæ, khana ko ïa ò chaphaŋ iōŋ ka.

"Da jōh poi mi cha thaiñ iōŋ i cheitai cha Kmawan?" Kylli ko ïa ò kam wa waiphaŋ ïei wa mut ko u oŋ.

"O-hoh." Jubab u. "Lai luti hi o chisien cheitu, por

NAIT O...

wa lai kē i cha Jakrem wa em ka umchit, tanwa cha Kmawan tæ ũ em u poi i."

"Chwa u poi phi ha Jakrem, em ka chnoŋ Poŋkuŋ pyn harōd surok, lada psiah phi chapoh surok chnoŋ Poŋkuŋ, lait phi na Poŋkuŋ tæ da poi wot ha Kmawan."

"Wom pu em u ia tipmit i na-oŋ, meitæ da psiah bait i sæ. Daŋ wow ioh u phah chet ja ha pha iow lait u soŋ ja na iuŋ," oŋ u Lamchwa ia ka dei sōhrkhai.

Ka leh sōhrkhai ko, tæ oŋ ko, "Cha i tæ, ũ em mōiŋ kam cheini. Im ki bru ha ka rep hi wot. U pa iŋŋ ŋa leh u wa rep. Ka bei khlad ko hei por wa daŋ 11 snem o, ka leh iap ko nei kjut hi. Kat heitæ i por, ŋa da lai skur o cha Sawsympet, pyn hajan chnoŋ i. U pa bait wa pynheh pynsan ŋa, wa pynlai skur ia ŋa. Ha ka snem wa *join* MSc o, khlad syndet u pa hadien wa ioh kjut u. Ki doctor leh oŋ ki ũ iē dē ki u sumar ia ō. Embhah wa ioh chuti puja i heipor wa kjut u tæ ioh o'u lum u laŋ ō, hadōh ka sŋi wa lai u. I leh, sah i du arŋut don hi cha chnoŋ."

Rap ktien u Lamchwa, "Ileh, ũ em wa ha iuŋ ha sem phi mo?"

"Ka bei wow pa ũ toh ki trē chnoŋ neitu. Wa wan mylla ki cha Kmawan tæ choŋ chnoŋ noh ki heitæ.

NAIT O...

Ki, i tre iōŋ ki toh na Mawraŋlaŋ. Daŋ em hi ki ma ki kha cheitæ taŋwa cheiwon u iē ki u rap kat cheitæ. Seiwi leh, wa dōh ki pli, tæ cheiwon u ioh ki u wan pait ia i man ki por. I heh, wa daŋ rap lai cha ki.”

“O...” oŋ u Lamchwa, dei wa sñiaw wyr-ai ia ka katwa daŋ ap u iei khana ko. Sñiaw u nanjōr itæ i maia u ia ka, kat nan̄tip u chaphaŋ iōŋ ka.

Ka Pynhun nan̄pteiñ ko, “Khyndē sñi khyndē iaw, choŋ o wa ō khlem mih na iūŋ. Wa em hi eh ki lok parachnoŋ o, kiwa pyniōhlok wa ŋa heitæ i por. Em hi ki paralok u pa wa wan pait ia ō chibet chipor. Taŋwa, chwa u khlad u neini na pyrthai, khana u ia ŋa wa thraŋ bha u iōw pyndep o iei puræ iōŋ ŋa hadōh wa kut. Da em leh ka poisa wa da bōh bhah u ia ŋa ha *bank* iōw pynemkām o. Neitæ i daw, lait o u thōh kreh katwa daŋ puræ o.”

“Hadien wa iap u pa, sñiaw la-ŋam saŋ o. Wan hi ki ma wa ki kha, khut ki ŋa u sah wa ki, taŋwa ū kwah o u pynsep-ai iei kwah u pa. Kamtæ, raikut o wow pyndep bait iei puræ o, iōw pynhun iei wa thraŋ u pa. Wa em ka Maia tæ ioh lok o cha Shilloŋ. Ka wa ŋa da iatipmit i nadōh wa sdaŋ i u lai klas ha Shilloŋ. Wa tip o’u klam pnaŋ leh toh na ka; ka toh, ka paralok wa maia tam o. Sñiaw o ia ka kam ka paü hi wot.”

“*Ŋa leh kamjōh hi.*” oŋ u Lamchwa ha mynsien u.

NAIT O...

Pait ka Pynhun cha ò tæ kylli ko, "Em wa onj mi?"

"Ũ em," jubab u Lamchwa. "I tæ... da iō hi pho ia ka iunj ka sem i, toh dep wan pho chisien. Na tæ, kwah o sa'u pass bha ki diah o, iow hoi bru ki mynried. U Marbōd tæ da jan ioh khih u, ka Salan leh, sa'u lai puræ nos ko tæ, da hoi hi ko."

"Sñiawsuk o'u tip iëitæ, iëibhah ionj phi tæ, da bōn hi wa tip o, neiwa khana u ma Kianj ia na."

"Da onj u ia pha ma-ai, wa da beh ka kurim o na?" onj u iëitæ deirkhai, tæ sñiawthōh hi ka Pynhun wa klam kyndæh u næ, tæ rkhai lanj ko wa ò.

Hadien neitæ, onj u Lamchwa ia ka, "Ei, onj ka bei u khut bam ja pha, chwa wow lai Shillonj pho. Tæ ham dam u wan mynstep mo. Seiwi leh, kwah ka donj u wan kē pho."

Pait ka Pynhun cha ò tæ onj ko, "Lada bien mi u lithōh-libōh na, tæ bien hi o."

"Pha iëitæ tæ da sñiawthōh hi o na-onj. Ladym bien pho u chonj ha ka baik, tæ dei bah leh bien bait o."

"Iō hi o, u iē mi u bah la kat na!" onj ko ia ò.

"Kwah pho u tes kattæ? Kam pha tæ chillianj kti u rah leh ũ dap o!" Klam kop u ia ka.

NAIT O...

“To ieh, ũ boi tes ai to, da iō hi o, i bor mi la kat u t’khu, pi pi ia lai noh i, wa da sep ka sñi.”

“Ari! Sakhiat! Ileh smat sañ ko u sep ynne?” Klam khyrñiat u Lamchwa deiwa iēiñ khyrñañ tæ chim ki tiar iow lai.

Pait heh ka Pynhun cha ō, sñiaw ky’it ko iēiwa klam u. Ka leh pait ko cha ka sñi tæ kylli ko, “Ileh smat sañ pho u sep ynne?”

Katwa dan pynlai kari u, pait pait u cha ka, tæ iō u kam wa bōn pyrkhat ko. Mut mut u, u khana ia ka, iei sñiaw iōng ō, tanwa sahkut ki ha rupai u.

Ka leh, pait siar ko cha ō tæ chynna ko iei wa pisa mysien u. Da sñiawthōh ko leh wa chem jingeh u u khlai iei sñiaw u ha ka.

Kamtæ, deiwa mut u pynjem ia ō, oŋ ko ia ō, "Lamchwa, ileh kwah ka bei mi u li bam ja o cha iōngphi, næ?"

"Wa kwah ko u tipmit bha ia pha na-oŋ. Seiwi leh, ka, wa ka doŋ, iōsuk bha ki pha." Jubab u Lamchwa.

"Tæ...phi wan ?" Kylli ko ia ō dei wa pait cha ō.

Sō u Lamchwa la hiam næ, manda kylli ko kamtæ. "Heini tæ da tne ko ŋa, kammon u jubab o ia ka?" Klam u ha mysien u.

Kylli ko ia ō: "Ileh, ũ jubab mi? Mo..."

"Pynhun..." smat u u jubab chwa u pynkut ko tanwa sahkut bian i klam u heitæ. Klam bian u hapoh mysien u: "*Lada oŋ o ia pha, wa pyrkhat o sa du ia pha nadōh wa khai thiah o hadōh wa lai khmat o i miet, kammon u pyrkhat pho ia ŋa? U pdian pho mo*

NAIT O...

*kam ia ɲa u wa biej wa them? Cheiwon u iaryŋkat
wei kyrdan iŋ pha?"*

"Tæ, ɲɔ wot na-ɲɔ, iyi wa mut mi u klam. Lada iŋ
kynchiñ mi ɲa leh, ɲɔ, ham tēiñ, ũ dait o me." ɲɔ ka
ia ō dei wa sōhrkhai.

Sanɛh syndet u ka kari heitæ tæ pait u cha ka. Ka
Pynhun da sdaŋ ko u tēiñ boi da chrai sakhiat u ia
ka næ. Neh i iapait ki uwi ia kawɪ markhmat chipor.

"Pynhun..." klam u dei sur wa jem. "Lada ɲɔ o ia
pha wa iŋsuk o pha da kut, u ɲait pho? Lada ɲɔ o ia
pha wadap i mynsien o deikmen, hawa em o wa
pha, ɲait hi pho? Lada ɲɔ o leh wa kwah o'u emlaŋ
chirup wa pha ianom rta, u ɲait pho? ɲɔ mot..."

Ka Pynhun da sñiaw kmen u ap iei wa klam u, chim
ko ia ka kti iŋ ō ha ki kti iŋ ka tæ klam ko: "Ha-o,
ɲait hi o, da chynna hi o, iei mynsien mi, hawa pait
o ia ki khmat iŋ me. ɲait skhem o nadōh mynsien,
wa me ũ iei mi u thok u chukor ia ɲa næ iei iei
leh. Kamwa sñiaw mi ia ɲa, ha ɲa leh sñiaw o
kamjōh."

"Pynhun... ũ iē dē o'u batai, katwon wa sñiaw kmen-
sñiawhun o, wa ɲɔ pho ia ɲa kamtæ. Wiar lut i
duna i tymbuiñ o hawa sñiaw o iei kyntien iŋpha.
ɲɔ mot ia ɲa, ũ toh na ɲɔ ha iemphō ini?"

NAIT O...

Heitæ, bōh ka Pynhun ĩa ka kti ĩon ka ha tūpha ĩon
ō tæ dem ko i khlieh ha rupai u. Ō leh da kdup u ĩa
ka dei wa r'ņip ki khmat, deiwa mut wa lada toh
sakhiat ha ĩemphō ini, tæ ũ kwah de u u khyrņiat
thiah.

Neh ki kamtæ chislem' næ khlem bna ĩa ki kari wa
lai cha surok næ ĩa ki kattu katni ki draibar wa siaw
ĩa ki.

Hadien chipor, khai khlieh ka Pynhun tæ on ko ĩa ō.
“Pi ynlai i, ĩa awri pathan u ma Kiaņ wa slem i.”

Ka Maïa em ko ha kamra chet. Daŋ itu wot ih i ja i jhur ko.

“Ileh slem ki u wan ma-ai?” Kylli ko pyn ïa ka samen samen. Ha mynsien ko, dathraŋ bha ko’u ïachem wow Lamchwa.

Dep thoh ko kawi ka chithi khynrō ka wow mut ko u ē ha ō myntu. Sōhrkhai ko samen samen hawa kynmō ko ïei wa thoh ko heitæ. Tēiñsar ko leh boi ũ bien u Lamchwa u pdiaŋ ïa ka. *“Tip... kammon u pyrkhat u ïa ŋa ma-ai?”* Kylli ko ha mynsien.

Sñiaw ko ïei wa wan ka kari tæ lai pait ko ha jĩŋkhaŋyit. Duŋ syndet u khnam ha nōd ïoŋ ka, manda iō ko wa ïalai ka Pynhun wow Lamchwa dei ïa ksoh kti wei ïarkhai khyrŋaŋ kam ki wa ïajan bha.

Ban-ko ïei rupai ïoŋ ka da ka kti timun ïoŋ ka tæ ran ko chadien. Heitæ i por, dōm ka pyrthai ïa ka, la kam wa kah ki lyoh wa ïoŋ ïei bneiñ. Womïe dē ko u kun ïei umkhmat ïoŋ ka, kiwa kai la kam ka wah, na waroh arliaŋ ki khmat ïoŋ ka.

Khyrŋiat ko mynda sñiaw ko ïei kich i kăp ïoŋ ki ha rana tæ ku pynsmat ko cha kamra ïoŋ ka chaneiñ tæ khaŋ dwar wot ko. Li choŋ ko ha thawthiah tæ

ŊAIT O...

ĩām ko.

Klam ko ha mynsien, "Kopsar, ū tqh hi u bhah iōŋ ŋa. A Blai! Da pynchitom mi ŋa ĩei wa leh saroŋ o ha kini ki por wa dadep. A ka ru ka Pynhun, embhah cha pha. To, kam ka paralok iōŋpha, ŋa kmen o nei bynta iōŋpha toh wa pynĩachem u Blai ĩa pha wow Lamchwa."

Sai ko ĩa ka chithi wa mut ko'u ē ĩa ō, tæ pynjæt ko ka, tæ dep ko u li noh ha painkhana, theh um wot ko. ŋiam ko ki umkhmat ko da i tana tæ pait ko ha ka ĩit. ĩō ko wa da sō ki khmat ko, sait ko ki da ka um tæ ŋiam bianŋ ko ki da i tana iōŋ ka.

Ka Pynhun wow Lamchwa dan̄ ã dihcha ki kat wow psiah bian̄ ka Maia ha kamra chet. Mar ã psiah ko, da iapait ki cha ka.

Ka leh dei wa murieh ãei sñiaw ion̄ ka, on̄ ko ã ki, “Ũ sñiaw o tan̄ wa wan phi leh! Tæ, kammon i kām ion̄pha ynne, Pynhun? Lai bait hi na on̄?”

“Lai bait hi syndoi, wa slem i’u wan iun̄ toh wa khlaiñ i cha lōm na-on̄!” Jubab ka Pynhun ã ka.

“Kopsar, iarwai iachād phi chalōm, yndæ? La kam ki aktor aktres Hindi!” Klam pharchi ka Maia ã ka.

Ka Pynhun da sōhrkhai, katwa u Lamchwa wan da sō latran̄ næ i n̄ap u tæ dem u chapoh.

“Ma iō pho ãei miat ki thaw ki bhaw, ka marian̄ tæ da pha leh, ũ dam de pho u chād,” on̄ ka Pynhun ã ka. “Tan̄wa da sdan̄ ki u tih mōion̄ ha Lōm Mōjem, tæ, ũ slem de da sih dur ka thaw cheitu leh.”

“U pa tæ da sdan̄ u u thun̄ dēiñ ha kitu ki lōm wa da dep tih mō u. Weiwa da bōn hi ki dēiñ wa da dep thun̄ leh. Chiphaw snem neini tæ da chynna hi wa da em bian̄ ki khlō cheitu.” On̄ ka Maia ã ka.

“Sñiawsuk wa em kam phi kiwa su kyllian̄ cha ka

NAIT O...

bei ram-aw. Lam kamtæ tæ, ũ slem dē u kylla ri chyiap kani ka thaw cheini.” Klam ka Pynhun dei wa iēiñ khyrṇaṇ tæ pynlaṇ ko ki khuri cha iōṇ ka wa ka iōṇ u Lamchwa.

ĭēiñ u Lamchwa tæ oṇ u ĩa ki, “Ṇa u lai noh o mo, wa da miet o itæ.”

“Tæ, liwan manda dep u bam ja na-oṇ.” oṇ ka Maïa ĩa ō, ka Pynhun leh da ē siknal ĩa ō da ki khmat wow choṇ chwa u.

“leh, ũ boi myntu, daṇ hap li ē bai phniaṇ bai luti o ĩa kitu ki trok ki wow lai Kohati chibet. Tæ, mo meitæ, thiah suk.” Dep u u klam ĩeitæ, mih wot u.

Mynda palat u Lamchwa na dwar, tæ oṇ ka Maïa ĩa ka Pynhun, “Ĭa ka yi oṇ u ‘thiah suk’ næ? Ĭa pha mo, ĩa ṇa mo?”

“Ĭa pyn-ar ṇut i hi na-oṇ.” Jubab ka Pynhun dei wa sōhrkhai. Sñiawthōh hi ko wa siat pharchi ka Maïa ĩa ka.

Ha katae ka mēt, katwa dan thiah ki ha thawthiah, khana ka Pynhun ia ka Maia iei wa jia ynne ha pyrdi u Lamchwa wa ka. Ka Maia, han lada dan em itae i sahnōd ko leh, ialeh ko u pyniō iei kmen ion ka nei bynta ka paralok.

On ko ia ka, “Na te, ū chah o mo, u rah pho ō neini. Ki yi wan u iarap iow pa cheini?”

“To, pha leh, ū boi batai, dow ion na tae leh o katwa nait o na-on!” Klam pynjaw ka Pynhun ia ka Maia. “Mo, u pynbia i ō wa pha mo, iow sah neh u wa pha.”

Hadien chibet tae on ko, “To doi, klam kyndæh o ia pha, na leh sniawthōh hi o ietitae. Seiwi leh, na ka kynthai sahwiar, ka wom em bei, em pa dē; ka wom em paū para. Cheiwon u rah o ō? Chirup wa ō hi na-on u sah o. Tae da ioh bait i’u iachem man ki por iow neh i maia lok wa na wa pha chi r’ta.”

Ia suki ki chipor la jār i pyrkhat. Khatdōh, on ka Maia ia ka, “Tip pho, mynchwa, da mut hi u pa u pynbia ia na wa ō, tanwa ū bien o.”

“Embhah cha na na-on, wom bien pho!” Jubab ka Pynhun. Heitae ia rkhai ki pyn-ar nut ki.

ŊAIT O...

**Ka Maïa wei rkhai wei mih umkhmat da dem hapoh
tæ tymmoh ko ïei khlich da ka thad kup. Heitæ da
ïa suki ki kiaw ne deiwa her jār jer i pyrkhat.**

U Lamchwa danj chonj u harōd tpaī, ō wa ka bei u, ki diah u pyn-ar da thiah ki. U Marbōd danj wan chuti u la ar sni. Da dep u ĩa ka eksam *Chartered Accountant* tæ da em leh kiwa khut kreh ĩa ō ha Shillonj.

Ka Salan leh danj wan Shillong ko ynne wa lai su bai puræ nos ko ha Nazareth Hospital. Hadien chi taĭaw, da hap li sah noh ko cha Shillong ĩow sdanj ko ĩei puræ nos.

Khana u Lamchwa ĩa ka bei u wa da ĩia maĭa u wa ka Pynhun.

Ka bei u danjbiah pathi-kwai ko ĩa ō tæ mynda dep ko u e ĩa ō tæ onj ko, "Da jia hi kam wa mut o, nadōh katu ka miet wa kbaī mi ĩei pyrtuit ko ha ĩemphō mi leh, da sñiawthōh hi o wa em jinmut mi ĩa ka. To, iyi de u ĩoh o'ū onj, hawa da ĩa monlanj hi phi, ŋa kam ka bei mi, u kyrkhu khyrdoh o ĩa phi ĩow neh i maĭa phi hadōh wa kut ka sni ka rata phi. U pa phi leh, ŋait o, na sanja u kyrkhu u ĩa phi. Ini heh wa kwah o, wa u ĩapoi phi dei wa smai chwa phi hakhmat ka duwan dupat, hakhmat u Blai u bru khnanj wow neh i burom ka ĩunj ka sem."

"Khublei chibōn bei, wa pdianj pho ĩa i; ŋa leh, kular o u pynhun ĩei wa kwah pho." Jubab u Lamchwa ĩa

NAIT O...

ka.

"Ileh u oŋ mi khublei?" Oŋ ka bei u ĩa ō, "da toh hi i por wow thōh bru mi. Me wa slem pathan mi u thōh; pait ki lok para-rta mi du kiwa da lē sō ŋut ki khon bait! U Dame pathan la ynru ŋut!" Klam ka bei u dei wa sōhrkhai khyrŋaŋ.

"Sñiaw ĩei klam pho bei tæ kam ka wajhan heh u ĩoh ksu! Kammon u ieh o ĩa pha wa ki diah o?"

"Tip hi o khon ĩei tæ waroh. Ŋa sñiawŋōh o ĩow Blai wa ĩoh o u khon kam me. U ŋōh Blai o leh ĩow ĩoh phi ki khon kiwa ŋaitsneiñ kiwa kitkhia kam me."

Hadien neitæ, kylli ka bei u ĩa ō, "Da oŋ mi ĩa ka na-oŋ ĩow wan bam ja ko chcini mynstep? Ehe, toh u oŋ noh o 'ki pyrsa' næ, yndæ?"

Ĭarkhai ki pyn-ar ŋut heitæ. "Ha-o, bei. Tæ ka syiar leh dep phah bōh o wa dep ē poisa o leh ha ka koŋ Lytiŋ; phah chim wan da u Marbōd næ da ka Salan kat kiwa lait mynstep."

"To, khon." Oŋ ka bei u. Ĭachonŋ ki suki ne chibet chipor tæ oŋ ka bei u ĩa ō: "Ĭō mi khon, ũ em u khana o ĩa me ini. Daŋ kini ki bnai wa da dep, hadien wa pyllait mi ĩa ka Maĩa na u Rokki, wan psiah kē u ma Kianŋ ha iuŋ i chisien, hei por wa wan emkam u cheini i chnoŋ i. Em, ŋa hi eh samen ha

ŊAIT O...

ĩuŋ. Katwa daŋ ĩa dih cha laŋ i, ĩa parom khyrŋaŋ i. Heitæ tyrwa u ĩa ŋa wow pynbia ĩa me wa ka Maĩa. Khyrŋiat o heitæ i por kam cheiwon, sŋiaw burom saŋ o ĩa ō wa khēĩŋ u me u wa ĩatoh kyrdan wa ka Maĩa. Hei kmen ware o, da mut o u ky'i ĩa ō heitæ i por, taŋwa, ũ nōd o u ky'i khlem pan jĩŋmut na me. Kamtæ, oŋ o ĩa ō ieh ĩow oŋ wan o ka rai manda ĩoh o'u ĩaklam wa me. Ō leh, oŋ u ĩa ŋa wa ũ pu em u jhan u, toh wa daŋ puræ ka Maĩa."

U Lamchwa, pait heh u cha ka bei u deiwa ĩō phylla.

Pteiŋ ka bei u u klam, "Da mut hi o, u khana ĩa me daŋ ha kitæ ki por, taŋwa da chynna o wa em jĩŋmut mi ĩa ka Pynhun. Kamtæ, ũ kwah o'u pynwit ĩei sŋiaw i ĩoŋ me. Kattæ wan sŋiaw o, wa u Blai hi wa khaŋ ĩa ŋa u ky'i ĩow ma Kiaŋ heitæ i por."

Oŋ wan u Lamchwa, "Biaŋ hi, wom em u khana phi ĩa ŋa. Wa ha ŋa hi samen, sŋiaw o ĩa ka Maĩa kam ka diah ĩoŋ ŋa hi. Kamwa burom o ĩow ma Kiaŋ, ĩa ka leh kamjōh. Wōm jōh em hi u mutdur o ĩa ka deiwi tawan."

Ĩa suki ki chipor ne tæ oŋ ka bei u ĩa ō dei wa ĩēĩŋ, "Ŋa u lai thiah noh o kattæ. Me wan?"

"Ŋa daŋ em i jĩŋkheiŋ wow leh o chibet, dep itæ tæ thiah wot o. Thiah suk mo bei." oŋ u ĩa ka.

ŊAIT O...

Ka leh oŋ ko, "To, me leh thiah suk khon." Lai wot ka bei u.

Ō leh da iēin u neitæ tæ li choŋ u ha chynkōh.

Khai u Lamchwa danstep tæ li beh u cha wa khih wa kreh dei wa jhan u u sep ka sñi. Ka Maïa da lai Shillong ko ïow ïachem wow *Sir* ïonj ka ha University, wei onj ko leh daw sah ko chi taiaw waroh nei daw wa daw leh '*Practical*' ko ha University. Kamtæ, ka Pynhun chonj ko ha ïun waroh chi sñi. Mut ko u pyndep ïei jinthoh ïonj ka hei ïatoh wei Research ïonj ka, tanwa her i jinmut ko cha u Lamchwa bait. Kamtæ, hei por chiteiñ sñi, phôn ko cha ka Salan ïow wan pynïohlok wa ka ha ïun u ma Kianj. Onj wan ka Salan ïa ka, "Wan cheini na onj, ïow ïah uin kē o pha ha chnonj ïonj i."

"Û sñiaw tipsap o doi u wan samen cheitu. Tanj i thaw ku kari hiar kari leh ù tip o." Onj ka Pynhun ïa ka.

"Ïan meitæ, ïow phôn o cha utu u draibar wa kamai cheini ïow lithôh u pha na ïun u ma Kianj mo. Na danj ïarap kām o wa ka bei kattæ, tæ ù tanar o u lithôh pha." Onj ka Salan.

"To meitæ." Jubab ka Pynhun tæ bôh phôn wot ko.

Ha katae ka janmiet, chonchit bha ka iun u Lamchwa. Waroh waroh ki ialeh ki u pynbian pyntoh ia ka Pynhun. Ka Pynhun leh sniaw ko la kam ha iun ha sem ion ka hi manda io koiei wa maia burom ka bei wa ki diah u Lamchwa ia ka:

Da dep on u Lamchwa ia ki diah u chwa u lai kreh u ynne i step wa daw wan bam ja ka Pynhun chibet te iow khut ki ka leh 'ki kon' nae. Ki leh sniawkmen ki u tipiei te, te phoh i khmat i khmut ki deisohrkhai iwa nadoh mysien.

On ka Salan ia o, "Ari sanpun, na da slem kwah kon o, tan u nod o'u on ia me."

"A don, kammon u tip o u pyrkhat cheite katwa dan pyrkhat oiei bhah ionpha wow Marbod? Kattu da ia chkah hi phi, te, da sniaw stin hi o. Pha leh chi dep phoiei purae nos te da ioh khih hi pho heitu. U Marbod leh su li join kreh noh u, te katwon sniaw noh o iow Blai wa kyrkhu u ia i. Lada chim U ia na kattae leh da hun o." Pait u cha ki pynar nut te dun u ki.

"Ham on kamte, Sanpun." On u Marbod, "dadep U Uchim iow pa i na i, u kwah i u doh sa ia me leh." O wa ka Salan heite da sohiam.

ŊAIT O...

Dap i khmat u Lamchwa dei umkhmat wa da kmen wara u nei bynta wa da ĩahoi bru ki diah u kattu. Pait u cha jronj kam wa kynmō u ĩow pa ki.

Poi ka bei ki heitæ, tæ ĩō ko ĩa ki kiwa ĩakduŋ pynlē. Sñiawhun sñiawkmen ko u pait wa ĩa maĩa ki chipaiũ. Onj wot ko, “Danj em thaw hi sa ĩa ŋa leh heitu ma ai?”

Waroh ki da pait cha ka bei tæ ĩarkhai ki dei kmen. Da ĩa pyllaĩt ki na wa ĩakduŋ, tæ onj u Lamchwa, “Ŋa u lai noh o mo, wa da slem o itæ.”

Waroh ki onj ki ĩa ō, “To.”

Kattæ, danj khana ka Pynhun ïa ki wa kammon jan hap ko ha thlu um por wa li rah um ko wa ka Salan ynne.

“Ŋa danj pait bēij o ïa ki sim munia wa danj her ha khap ranem, tæ ũ em u iō o ïei wa tlær ka luti. Toh iōh o heitæ wot i wa tlær tæ syntōid o hadōh poi jan thlu um!”

“To, embhah hi pho u syntōid. I cheini ũ em *park* i tæ, lamjia kamtæ leh ũ iōh hi pho syndoi u syntōid.” Klam danda u Lamchwa ïa ka.

Waroh ki da iarkhai ïei tæ wa klam chutia u Lamchwa.

Wom pu em u slem wa danj dep wot ki u bamja tæ danj iachonj kē ki ha chynkōh. Kat u poi ko ha chnoŋ iōŋ ki ynne, da dep kām ka Salan. Sah su rah um eh ko. Dep ko u iarah um wa ka Salan, da iah uiñkē ka Salan ka chapoh chnoŋ.

Īaroh ka Pynhun ïei wa iōsuk ki thaw ha chnoŋ ki. “Katu ka khlō wa em ha neiñ chnoŋ phi kawa iō khōid saŋ. Īō suk leh wa danj em ki dēiñ wa heh wa ki dōid wa khōid hapoh katu ka khlō.”

“Katu tæ toh ka khlō iōŋ ki kur Khynda.” Oŋ ka bei

ŊAIT O...

u Lamchwa, “daŋ im ka tynde ka Snur·Khynda tæ jōh lai thōh tit, khait syut, khait saphai i, ŋa wa ka heitu i khlō. Katni leh daŋ bōn hi ki soh ki jhur heitæ, taŋ ũ iē dē o u lai jŋai katni wa chitom kini ki chyēin o ha mat.”

“O, sakhiat!” Oŋ u Lamchwa, “daŋ em hi kitu ki dawai pho na-oŋ bei? Boi da toh por u lithōh bian.”

“Daŋ em hi, taŋwa ha katai ka taiaw te daw hap lithōh hi mi.” Oŋ ka bei u ia ō.

“Ieh, lithōh da ŋa leh mynstep, kamni daŋ lait por o.” Oŋ u Marbōd ia ka.

“Neiwon lithōh dawai phi bei?” Kylli ka Pynhun.

“Na wār.... Sñiaw o nadōh wa dih o kitu ki dawai tæ iarap bha ko ŋa.” Oŋ ka bei u Lamchwa.

Ka Salan da rah ko ia ka elbom dur iōŋ ka tæ da pyniō ia ka Pynhun. Katwa daŋ pait ki ia kitæ ki dur, u Lamchwa da mih u neitæ iow lai cha kamra chet iow dih um u.

Chibet næ, da lai sa’u Marbōd cha kamra chet.

Kitæ wa choŋ ha chynkōh daŋ muja ĩa rkhai khyrŋaŋ katwa daŋ pait ki ĩa ki dur ha elbom. Khyrŋiat syndet ki mynda sñiaw ki ĩei sur kbai wa wan na kamra chet: "Sanpun!" tæ waroh ki da ĩa pait ki chei lianŋ ka kamra chet.

U Lamchwa dei choŋ ha trē rachot (chrot) wei ksoh rupai. I khmat wan dei rŋip iōŋheh kam u wa ĩaleh u kun ĩei kjut. I chit da kâi na kapar wa ha radaŋ u. U Marbōd da ksoh iōw sanpun u tæ kylli u, "Ileh me sanpun?"

U Lamchwa heitæ da pait cha ō tæ oŋ u, "Da khai bianŋ ini i sōh o. To, chibet da wiar hi ki."

Heitæ da poi sa ka bei u, ka Salan wa ka Pynhun. Pun-lē ŋut ki da chynna i tēiñ i dur khmat iōŋ ki. Phet pynsmat ki tæ kli ki ō. Pait u Lamchwa cha ki tæ oŋ u, "To, ham tēiñ, da wiar hi kattæ."

"Ŋa da her wei r'ŋu, wa sñiaw o ĩei wa kiat u Marbōd. Pait khon, ham ieh u choŋ ka kjut hapoh. Da oŋ o ĩa me bōnsien u lithōh dawai ĩa me leh, ũ bien mi."

"Da bōnsien mo wa jia ĩa ō kamni?" Kylli ka Pynhun ĩa ka bei u.

ŊAIT O...

“Ha-o, koŋ.” Jubab da ka Salan. “Mut u jan ũ tip i, ŋa jōh sñiaw hi o wa jōh ōd u ha thawthiah u la lē sien kattu.”

Heitæ da iēiñ u Lamchwa taŋwa daŋ chynna hi wa kjut u. Ksoh u Marbōd ō tæ ialai ki cha thawthiah u. Waroh ki da iabōd laŋ.

Waroh ki da plæh itæ i kmen i r'khai manda iō ki ïei dur u Lamchwa katwa daŋ thiah u ha thawthiah. Ō daŋ ïaleh u u murieh ïei tæ i kjut u, taŋwa chynna ki ha thŋa wa ha i durkhmat iōŋ ō.

Phah, libōh u ka ka Pynhun how Marbōd, taŋwa ũ bēn ko u liwan cha iuŋ u ma Kiaŋ. Oŋ ko, u thiah laŋ ko wa ka Salan myntu.

Dadep ka bei u u sympōd ïei rupai u dei phniaŋ dawai. Ka Pynhun naŋ ŋiam i chit u wa mih ha thŋa u katwa ka Salan wan naŋ khem ki kjat iōŋ ō. U Marbōd daŋ phōn iow ma Kiaŋ iow pyntip wa ka Pynhun da sah ko cha ki.

Khana u leh ïei wa khai kjut u sanpun u, tæ oŋ u ma Kiaŋ, "Tæ, oŋ ïa ō u lithōh dawai na Shilloŋ mynstep mo. Oŋ ham dam næ, oŋ ïa ō leh ham syntā ïa ki kām cheini. Na wow tip ïei tæ waroh. Lada emkām pisa u leh, me wanthōh na ŋa mynstep, mo."

Katwa daŋ klam u ma Kiaŋ, u Marbōd naŋ ky'i. Khāt dōh, oŋ u, "To, ma" tæ bōh wot u ka oŋthai.

Lai u cha u sanpun u tæ oŋ u ïei wa klam u ma Kiaŋ ha ō.

NAIT O...

Ka Pynhun leh rap ko, "O, mynstep, ṇa u ĩah me cha
ka Doktor wa tipmit o ha Shilloṇ. Ham oṇ dē o-hoh
næ"

Kiwa em heitæ da sñiawkmen sñiawṇōh ki ĩei
kitkhia iōṇ ka.

Waroh ki da ïa khreh thiah ki. Ka Pynhun dan̄ choŋ ko ha thawthiah u Lamchwa. Da oŋ ko ïa ki: "Ieh, ŋa wow ïaŋ ō katwa dan̄ pait u, dieh, phi nan̄ thiah." Deiwa kwah u ē lad ïa ki u ïa parom, ŋait ki ïei wa oŋ ko.

Pait u Lamchwa cha ka chislem, tæ chim u ïa ka kti tidiaŋ iöŋ ka ha kti iöŋ ō tæ sōhrkhai u cha ka.

Ka leh sōhrkhai ko ïa ō tæ kylli ko, "Ileh r'khai mi?"

"Wa sñiaw danda o na-oŋ." Jubab u. "Khut i pha cheini iöw bam ja sñiawbha, kat u iö chem wan pho dei sñiawsih. Pieh i ïa pha dei doh, taŋwa mih da ka chyēin ha pliaŋ! Chish! Sihbhah saŋ i ka, yndæ?"

"Ileh u oŋ mi kamtæ?" oŋ ko ïa ō, "Iwa toh u jia, jia bait i. Ladam toh myntu leh, mynstep mynkawi da jia bait ki. Ileh u oŋ mi sihbhah? ïa ka bhah, ũ em i sih i bha. Choŋ hei rukom pait i ïa ka sæ. Lada pait i cheiŋiaŋ mihsŋi heipor mih ka sŋi, ũ chynna bha i u pait neiwa chēphalaŋ ka sŋi. Lada pait wan i chei wa choh ka sŋi, u chynna i ïa ka pyrthai myndær wa che wa miat."

"I klam pho na ai tæ la kam ka tymmen." Oŋ u ïa ka dei wa sōhrkhai wei wa ksil ïa ka kti ko.

NAIT O...

Taṇwa ka wan, ũ em dē u sōhrkhai ko. Kylli takit ko chaphaṇ i kjut u deiwa oṇ ia ō, "To, khana mot ia ṇa kammon sdaṇ ini i kjut mi?"

Heitæ khana u ia ka nadōh wa sdaṇ u u khai rih khai sōh. Mynda dep u tæ oṇ ko ia ō, "Wa leh stiñ hi mi ieiini. Ileh u pyrkhat mi sa du iei kām? I chait i khiah leh iwa emkām bha na-oṇ?"

Ksoh cjkur u Lamchwa chiliaṇ tæ oṇ u ia ka, "*Sorry, Madam*. Nadōh myntu ũ myllien dē o." Sōhrkhai khyrṇaṇ u.

Ka leh da sōhrkhai ia ō, tæ tia chōh ko hajan u. Kynriah u Lamchwa rap charōd thawthiah tæ oṇ u ia ka, "Pynbait chwa heini na-oṇ, kamwa parom kē i chibet chipor."

Ka leh ṇait ko ieiwa oṇ u, tæ thiah ko hajan u deiwa syṇkhien ha kti timun iōṇ ō.

Oṇ u ia ka, "Ṇa, nadōh daṇ khian o, lai mylla laṇ o wow pa. Jōh oṇ u pa ia ṇa, wa i bām toh iwa emkām bha, iwa man dawai ia i doh i pran. U pa, lada kjut u kat wa kjut leh, iei bām ũ jōh dam u u bām. Ṇa leh da bōd o iei pyniō u pa. Kini ki bnai wa da dep, khai rih o chibnai chibnai. I sōh na-ai, daṇ chisien arsien hi eh. I kyoh leh em hi tēiñ tēiñ. Dih hi o iei dawai, tæ wiar hi ka rih. Taṇwa iei bām tæ ialeh bait o'u bām han la sñiaw kynroi o leh. Neitæ i daw, ũ jōh lai doktor o."

NAIT O...

Ka wan oŋ ko, "Miat tæ, dei lai doktor hi wot, khamtam mynda khai bōnsien ijōh i kjut. Ki na-oŋ wa tip ware u sumar ïei kjut, ban ïa i?"

"Toh hi, iwa oŋ pho. To, mynstep, da lai bait o."

"Ladam lai mi leh, u kdoh i me dei kdoh tæ kit i cha hospital!" Sōhrkhai khyrŋaŋ ko katwa daŋ klam ko ïei ni.

Ō leh sohhrkhai u ïa ka tæ oŋ u ïa ka, "Hadōh kattæ mo khor pho?"

"Daw iō mi sæ! Chakhmat pathan, naŋ khor chōh chōh!" Ka leh dei pait cha ō markhmat tæ rkhai ko.

Īō suk u u pait ïei dur ko heitæ i por. Chim u ïa ka kti timun ko ha ka kti tidiaŋ iōŋ ō tæ oŋ u ïa ka, "Sñiaw hun o ynne wa kmen ka bei wa ki diah o nei wa wan phi cheini."

Ka leh oŋ ko, "Ŋa leh, sñiaw kmen hi o, u iōh ïei maïa iōŋ ki. Sñiaw o la kām ha iūŋ iōŋ ŋa hi."

Īa suki ki kiaw næ, jar jær i pyrkhāt. Haden chibet, pait ka Pynhun cha ō. Īō ko wa da r'ŋip i khmat u tæ mut ko da lai khmat u næ, tæ ka leh hiar ko na thawthiah. Pynkup thad ko ō dei toh rukom tæ ŋiam ko i chit u na thŋa wa na radaŋ tæ bōh ko ka thad ŋiam charōd. Mut ko u lai thiah noh, tæ

NAIT O...

khyruiñ bian ko tæ doh ka ò ha thŋa.

“Doh heini leh.”

Sñiaw ko ïei sur u tæ khyrŋiat ko. Thap maïa ko ïa ò tæ oŋ ko, “Heit! Nŋa mut o da ïohthiah mi næ! Thiah noh kattu!”

U Lamchwa sōhrkhai hi eh u, tæ oŋ u ïa ka, “To, thiahsuk mo.” Chim u ïa ka kti ko tæ doh u ka.

Ka leh oŋ ko, “To, thiah suk, *darliŋ*.” Pyllait ko ïei kti ko na ò tæ lai ko cha thawthiah ka Salan.

Em ki ha pchem iöŋ ka hospital NEIGRIHMS. Ar sni hachwa, da dep ka Doktor Wannian, ka paralok iöŋ ka Pynhun kawa man leh ka Chest Specialist, u eksamin ò tæ dep phah X-RAY ko ïei rupai u. I snam leh da dep ki u chim iöw tes. Ynnin da wan bian ki cha ka tæ mynda dep ko u pait ïa ka report iöŋ ka X-RAY iöŋ ò, deiwa iö khia i jinmut, oŋ ko ïa ki, "Katkam kani ka X-RAY report, tæ em i kjut wa suba o wa em ha rupai u Lamchwa. Tæ, khnan wow pynthikna ïei tæ, hap leh i sa kani kawi ka tes cha NEIGRIHMS. ïachem wan wa ŋa mynda iöŋ phi ïa ka report."

Da dep ki u leh ïa katae ka tes wa oŋ ki doctor ka FNAC næ. Siam u doktor heitæ ïa ò da u thyrnia na tympon tæ sai u khajiak i bynta na ka tor u tæ thap u ha i kloŋ khian iöw tes ki ki.

Ka Pynhun wa u Marböd wa wan laŋ wa ò ynne. ïa ksoh kti ki ò, iwi chilian katwa daŋ lai ki cha ka kari iöw liwan. Lai ki khlem ïaklam hadöh wa da dep psiah ki hapoh kari. U Marböd waïah ïa ka kari. Ka Pynhun choŋ laŋ ko wa u Lamchwa hadien.

Stat u Marböd ïa ka kari tæ kylli u dei wa khyruiñ cha u sanpun u, "U liwan i bait bait mo, daw lai chwa i cha sor mo, sanpun?"

ŊAIT O...

Pait u Lamchwa cha ka Pynhun tæ kylli u ïa ka, "Ū toh daw emkām pho cha *University*?"

"Em kām hi o. Taŋwa kwah o'u lai laŋ wa phi cha chnoŋ." Jubab ko.

"To, naŋ pyndep ïei kām ïoŋphi. Ū man u thut i puræ pho." oŋ u Lamchwa ïa ka tæ pait u cha u Marbōd tæ oŋ wan u ïa ō, "Pi, libōh chwa i ïa ka cha NEHU."

Da dep ki u dih chā ha Mōryŋkneŋ. Katwa daŋ lai ki, u Lamchwa r'ŋip u ki khmat la kām wa thiah, taŋwa i pyrkhāt u lai ki cha ka Pynhun.

Kynmō u ĩei dur khmat ko hei por wa hiar ko na kari ha NEHU. Chynna u ĩei wa diaw i mynsien ko. Chwa u lai ki, oŋ ko ĩa ō, “Ŋa u ĩaŋ o phi ha NEIGRIHMS, mynkawi, mo, lai suk lai damiat næ dieh.”

Ō leh da tliaw u ka. Sñiaw sy'ir u leh mynda pyrkhāt u ĩei kjut ĩoŋ ō. Ka doktor leh ũ pu bien ko u khana dei chē. Oŋ ko u ĩaŋ ĩa ka report næ. Tēĩnsar u boi ka kjut heh wa ĩoh ō.

Kamtæ, pait u cha u Marbōd uwa daŋ pyllai jĩgmūt hei ĩah kari. Ĩō u, ō leh kamwa bōn pyrkhāt u tæ klam u ĩa ō, “Marbōd.”

Pait u Marbōd cha ō. “Pait, lada jia iwōn iwōn ĩa ŋa, hap kular mi ĩa ŋa wow ri wow sumar mi ĩa ka bei wa ka doŋ.”

“Ileh sanpun u klam mi kamtæ! Daw chait hi mi na-oŋ!” jubab u ĩa ō.

“Ŋa suba o, wa ka kjut heh wa ĩoh ŋa ini. Pait taŋ nei rukom klam ka doktor leh wei phah tes ko ŋa

ŊAIT O...

kamtu!”

“Æ... u sanpun, katni ki por tæ ïei kjut khian leh dei tes bñiah hi ki na-on, khnaŋ wow chem trē ki ïei kjut. Cha ki doktor heh u lai tæ, kamtu hi sæ leh bñiah ki.” Klam u Marbōd ïow pynjem ïei tēiñ u, taŋwa ō leh ha mynsēn u sy’ir bait u.

Mynda poi ki ha Mō-Suwe, li bōh ki ka kari u ma Kian ha iun tæ liwan ki da ka baik u Lamchwa. Da dep ki u klam iow ma Kian. Da khana u Lamchwa ia ō wa mynkawi u lai bian ki iow chim ki ka report wow iachem bian wa ka doktor.

Oŋ u ma Kian ia ō, “Me, kat wom pu chait bha mi, ũ boi li kreh, ieh ŋa wow pyllai ki khih ki kreh deilan wa ki menejar.”

Heitæ, sai u ma Kian ia ka poisa sanphaw hajar, da ki kot san spah, napoh katta u tæ ē u ha ō deiwa oŋ, “Chim kani, iow pynemkam mi, lada duna, tæ oŋ wan. Manda lai mi mynkawi, rah da ka bolero, boi ũ chiam phi da ka olto. Dep phōn ka Maia ia ŋa ynne tæ oŋ ko daw lai laŋ ko wa phi, ka wa ka Pynhun.”

“Khublei chibōn, ma, iei sbōn iōŋphi. Ŋa ũ tip sap dē o, kammon u su kyllian ia phi.” Oŋ u Lamchwa ia ō.

“To, me, ũpher.” Oŋ u Ma Kian. “Waioh o ka u ē leh, toh nei wa khih hok hi mi ia ŋa waroh chi kattu. Lada man mi kam u Rokki, cheiwon u ioh o ka u klah? Kam wa chkæh wa chaniah o ha me, ŋa leh toh u bah khlieh hi o iei bynta iōŋ me. Ia me, pathan, uwa sñiaw o kam u khon u pyrsa iōŋ ŋa hi, dei pran dei jinim leh smat o u ē.”

ŊAIT O...

Sñiaw luŋ i mynsien u Lamchwa manda ap u ïeiwa klam u ma Kian hadōh womtip dē u kammon u jubab. Laŋ ki umkhmat u tæ dem u ïei khlieh ïow lait ki u chynna ïeitæ.

Manda poi ki ha iuŋ, ka bei u wa ka Salan da rap ki ō daŋ na pchem. Oŋ ka Salan ïa ō wa da dep ko u tu um sum ïa ō. Ka bei u leh oŋ ko wa da ih i ja i jhur lada sñiaw thŋan u u bam.

Da dep ki u ïaphōn nadōh wa mih ki na hospital ynne, tæ kamtæ ũ sñiaw emkam dē ki u ïa parom ware ïei bhah i kjut u. Kylli hi ka bei u kammon sñiaw u, tæ oŋ u, kamjōh hi.

Oŋ ka Salan ïa iō wa phōn ka Pynhun cha ka, toh womiōh ka ō kat wa phōn leh. Heitæ oŋ u, “Ieh, ïow phōn o cha ka kattæ.” Lai wot u cha kamra thiah u tæ phōn u cha ka.

Ka doktor da iō khia jinmut katwa daŋ puræ ko iā kataē ka *report*. Chim bian ko iā ka X-RAY iōŋ ō tæ pait bniah ko. Em ka bei u, ka Pynhun, ka Maia wow Marbōd deilaŋ wa ō hapoh itæ i klinik. Ka Salan leh kwah ko u lai laŋ taŋwa ū chah u Lamchwa. Waroh ki da pait cha ka doktor. I dur ki kattæ, waroh ki, man ki kam ki khynnah wa iāŋ risot.

Da wan chim ki iā ka *report* ynne i step na NEIGRIHMS. Ka Pynhun wa ka Maia da iāŋ iā ki ha pchem hospital nadōh 9:30 i step. Iōh ki iā ka *report* hei por 10:15 tæ wan bait ki ha klinik ka Doktor Wanniaŋ.

Pait ka doktor cha ki waroh tæ oŋ ko, "Heini, du ki wa da heh hi, tæ, u klam bait o dei wachē, mo. Seiwi leh, oŋ ka Pynhun iā ŋa wa ka Maia leh kam ka paū ka diah iōŋ phi hi tæ ū pher lada ap ko leh iei wow oŋ o."

Ky'i u Lamchwa iā ka, tæ pteĩŋ ko, "Ka kjut wa iōh mi leh toh hi kam wa suba o."

Saŋeh ko chipor u klam deiwa pait cha ki iwi pa iwi. Waroh ki da pynap bha iei chkōr iōŋ ki u ap iei wow oŋ ko.

Pait bian ko cha u Lamchwa tæ oŋ ko dei wa

NAIT O...

sñiawkhia, "Sñiawsih o u khana ïa me wa ïoh kjut mi da ka *Lung Cancer*."

Heitæ, lada pynhap dow pin ha madan kataæ ka kamra leh, da sñiaw bait ïei hap u. U Lamchwa da dem tæ tba khlieh. Ka bei u, ù sñiawthōh ko ïei tæ i '*Lung Cancer*' tanwa ïei '*Cancer*' tæ da jōh sñiaw hi ko toh wa da em kiwa ïap ha chnoŋ ki na kataæ ka kjut. Ìām ko heitæ. Manda iō u Lamchwa wa iām ka bei u, ō leh da sdaŋ laŋ ki umkhmat. U Marbōd leh kamjōh.

Ka Pynhun leh da tharu wei dap dei sñiawdiaw wei sñiaw wyr-ai iōw Lamchwa. Lai i mynsien ko cha ō tæ li ksoh ko ō ha tūpha wa ha khlieh.

Ka Maïa wan pait ko cha ki arŋut, tæ dap i mynsien ko dei sñiaw wyr-ai ïa pyn arŋut ki.

Waroh ki, ù tip dē ki u klam. Ka doktor leh ēlad ko u ŋōid wow tylliat ki ïa kani ka khubor tæ klam ko hadien chibet chipor: "Sñiawsih o u oŋ leh, wa ïa kani ka jait kjut, i kam ki doktor leh, chem chitom i u pynchait, toh ù pu em u chem i ki dawai kiwow iē u pyndōh pyndam ïa ka."

Ka bei u Lamchwa da pynsuki ïei iām iōw ap ïei wa oŋ ka doktor.

Pteiñ ka doktor u klam, "Em hi kiwa iē i u pynkhōid

NAIT O...

lada chem i dan hei por wa khai ko. Em hi kiwa pōid i tæ chait noh ki. Tanwa, bōnsien hi, i pōid ū iē ko u iarap khamtam mynda rap heh i kjut. Pynsaja heh ko ia ki wa kjut. Em hi kiwa sumar i da ki kynja X-RAY, tanwa katae leh bōn i ktah ko cheiwi tawan i lian. Iē ko han u khai chawi i bynta ka doh leh."

Pait ko cha ki, tæ iō ko du kiwa pait cha ka. Tæ klam bian ko deiwa pait cha u Lamchwa, "Sa du ki dawai hi eh, iē o u ē ia me, iow dih mi. La dam iarap ki, tæ... sa du U Blai heh wa iē u pynchait ia me. I por leh ia me, sñiawsih o'u on, da tbian i. Katkam ka report iōn ka X-RAY wa katu wa leh ki ha NEIGRIHMS, pyniō ki wa ka kjut mi da sdan ko u heh. Ū iē o'u on thikna, boi chi snem, ar snem ne san snem leh. Tanwa, ū hoi u dōh kyrmen mi. I ki bru ū iē i u tip ia ka im ka iap. Chaniah tylli, du how Trekirod don hi."

Ka bei u Lamchwa da suki u iām tæ on ko ia ka doktor, "U khon o, i biri sikret leh ū jōh dih, ka kyiad leh ū jōh mād u. Tæ kammon san ioh kam katae ka jait kjut ia o?"

Sōhrkhai ka doktor ia ka, tæ jubab ko, "Ha-o, ka dih duma ka bam duma toh kawa iarap ia kani ka jait kjut u khai. Em u paralok iōn na, u doktor ha Bombay, wa khana ia na wa ha ka hospital wa kreh u, bōn ki nonkjut cancer kiwa dih dawai heitæ toh kiwa na ka thaiñ lam-mihsni iōn ka ri i, toh ki bru

NAIT O...

ha kani ka thaiñ iōŋ i toh kiwa khlan bha u bam næ u dih duma. Katkam wa oŋ ki stad tæ chem ki, wa, kamwa 30 ŋut na ka chispah kiwa iōh iā kani ka kjut toh kiwa pynemkām iōw duma la dei bam næ dei dih, hadōh 35 ŋut na ka chispah neiwa bōn ka khlaiñ ha ka pran iōŋ ki. Kiwi tawan kiwa iē u pynkhai iā kani ka jait kjut toh ki kynja X-RAY, ka rukom im iōŋ i hi, weiwa, ki tŋit wa pynmih i ha ka mariaŋ leh iē ki u pynkhai iā kani ka kjut cancer. Taŋwa, hadōh katni, ũ pu iē i u kdaw kti cheiwon cheiwon leh, toh wa bōn hi ki cancer khai ki nei bōn tylli ki daw. Pait, kām iōw Lamchwa, kamwa khana ka Pynhun iā ŋa toh uwa khih cha ´krem mōiōŋ nadōh daŋ khian u. I thaw khih thaw kreh u leh ha ki thaw wa iōh u riñ sa du ki tdem kari wa ki pum pum mōiōŋ. Ka umbam umdih leh kam cha kitu ki thaw, kawa da tŋit. Hawa kamtæ, iē ko’u man wa sdaŋ ko u sōhthied ha ō nadōh kitæ ki por tæ mih pyrthai wan ko katni. Ini toh iwa mutdur hi eh o. Iē u, u iōh iā kani ka kjut na kiwi tawan ki daw ki womtip i leh.”

Saŋeh ka doktor u klam heitæ toh sñiaw ko da dōh lyer ko u klam. Waroh ki da iā pynchoŋ nia iēi wa oŋ ka doktor iā ki. Kamtæ iā suki ki chipor.

U Lamchwa leh, ũ tip dē taŋ u klam, da bōnjait ki pyrkhata wa dap ha khlieh u. Ka Maia wa ka Pynhun pait eh ki cha ō wa dem khlieh u. U Marbōd da lai iēiñ hajan ka bei u toh ũ lait thaw dē hajan u

NAIT O...

sanpun u wa da iēiñ ka Pynhun wa ka Maia iwi
chiliaŋ iōŋ ō.

Klam biaŋ ka doktor heitæ, "Phi kiwa ha iūŋ ha
sem, sah su pynbiaŋ hi eh phi, i bam i dih u, wei
wow pait u sylli, u lum u laŋ phi ō manda jōr i
chitom u neini chakhmat. Lait neitæ, sa i ŋōh i dem
how Blai heh, iē phi u leh ia ō."

Ka bei u Lamchwa wa u Marbōd da ia ky'i ia ka
doktor. Pait ka doktor cha waroh ki tæ oŋ ko ia ki,
"Sñiawbha phi u iaŋ cha lait chibet, waroh phi. Em i
wow oŋ o iōw Lamchwa, du ŋa wa ō don hi."

Da ïa choŋ ki ha ka kamra wa jōh ïaŋ ki noŋchim dawai heitæ i klinik. Ka Maïa wa ka Pynhun da choŋ wa ka bei u Lamchwa iwi chiliaŋ. Da ïaleh ki u ē mynsien ïa ka, deiwa oŋ, “To, bei, ham khuslai, daw chait hi u.”

Ka leh, ha pyrdi i sñiawsih sñiawdiaw, pdiaŋ ko ïei ē mynsien iōŋki dei em kyrmen khajiak. Taŋwa ha mynsien ko, da sñiawthōh kó, wa deibor bru na ai, ũ em lād dē iōw khon ko. Oŋ ko ïa ki, “Ileh pynsaja u Blai iōw khon o kamni? U pli, uwa im deihok, uwa kit wabah ïei khia i chon, ka iūŋ ka sem waroh wachat. Wei ïa kiwi leh ïaleh u u leh dei bha. A! U khon o u pli, ka bainoŋ yi iōh u kamni?”

Oŋ ka Maïa ïa ka, “To, bei, ham dōh kyrmen. Nait o jan wa tynjōh u Blai ïa ō wa ïa phi, ïa i leh kamjōh. Chisien pyrkhat, ha-o, katkam wa im u, ũ toh u iōh u kām ini i chitom. Taŋwa, i ki bru, iyi u tip i ïei wa mut u Blai? Ŋa leh, da kheiñ o ō kām u sanpun iōŋ ŋa hi. Kamtæ, sñiawsih bha o nei bynta iōŋ ō. Phi, kam ka bei wakha ïa ō, ũ yi dē o u mutdur ïei sñiaw iōŋphi. Taŋwa kular o u emlaŋ wa phi, ŋa wow pa, ũ ieh i phi kam ha kani ka por. ïa ka Pynhun leh, u oŋ o ijōh, ham dōh kyrmen. I, wow emlaŋ wa pha.”

Sñiawŋōh ka bei u Lamchwa ïei wa klam ka Maïa. Pait ko cha ka Pynhun kawa da sōhiām tæ oŋ ko ïa

NAIT O...

ka, "To, u ĩa pynchkæh i kattu, ũ man u pynĩō i ĩow Lamchwa dei dur ĩām. U ĩaleh i u pynkmen ĩa ō katwa daŋ ĩoh lad i. A pli u khon o. ĩarap Blai ĩa ō."

Ka Pynhun da ŋiam ko ĩei umkhmat ko. Ka bei u Lamchwa leh da ŋiam ko ĩei khmat tæ pait ko cha u Marbōd tæ oŋ ko ĩa ō, "Me, leh, khon, pynchkæh: Bōd ĩa ka luti wa lai u sanpun mi. Im deihok, leh ĩeibha, man katwa man leh."

"To, bei." oŋ u Marbōd.

Heitæ da mih u Lamchwa na kamra ka doktor. Da rah u ha kti u ĩa ka plastik wa em ki dawai. Waroh ki da pait cha ō. Lai u cha wa choŋ ki tæ oŋ u, "Dieh li klam ĩa ka doktor ĩow liwan noh i."

U ma Kianj da em u ha iunj wa ianj u ia ki. Dadep phōn ka Maia ia ō wa daw wan ki cha iunj. Manda kylli u iei bhah u Lamchwa tæ onj ko iow khana wan ko manda poi ha iunj. Kamtæ lanj-a i mynsien u kat wom pu chē u.

Da ia choŋ ki ha kamra pdēiñ katwa danj tu chā ka Pynhun. Ka Maia mar ia poi ha iunj da khut iow pa ha kamra ionj ka chanēiñ. Heitæ khana ko ia ō waroh i wa klam ka doktor ia ki. Khana ko leh wa ia maia u Lamchwa wa ka Pynhun. Suki u ma Kianj chipor katwa danj nam itæ i khubor waroh ha ō.

Hadien chipor klam u, "Sñiaw wyr-ai sanj o iow Lamchwa, wa ioh u kam katae ka jait kjut. Iyi dē u leh i? Choŋ heibor u Kynrad. Na da jōh iēmphō o, wa dadep tyrwa o ia pha leh, wow wan sah u heini wa i, kam u pyrsa ionj na. Tanjwa, itæ leh kopsar, ū iatoh ki wei mut u Blai, tæ sah ki hei iēmphō donhi. Han la kamtæ leh, ha na hi samen, ū iē dē o'u su kyllianj iei khiah hok wei burom u Lamchwa ia i. Dabōn hi ka spah wa ioh i u pyllanj nei wa khiah hok u. Ia pha leh da iō hi i, wa syndonj u pha la kam ka diah u hadōh wa nōd u, u pynchah dei jinjim ionj ō neibhah ionj pha. Pyrkhat u leh iei bha i miat iongha wei ionj na. Na sniaw o la kam wa em khon chynranj hi o. Rai o kattæ, wow kitkhlieh iei lut i sep, ū toh du iei dih dawai u, tanjwa ia ka iunj ka sem u leh. Mo,

NAIT O...

pha, sñiaw pho kammon?"

"Kam wa sñiaw mi pa, ɲa leh kamjōh." Jubab ka Maïa ïa ō. "Ŋa leh, hadien itu i jia wow Rokki, da pyrkhat hi o ïa ka wa tyrwa phi ïa ɲa mynchwa. Tanɲwa, ha wom ïatoh ka chyēiñ kruɲ, u leh i kammon?"

"Toh hi iwa oɲ pho, khon." Oɲ u pa ko ïa ka deiwa choɲ hajan ko tæ tawah kti u ha tūmpha ko. "Tæ, pha leh pyrchanɲ u thōh u tip, boi dan em lad ïei bhah i chait i khiah u Lamchwa. Ŋa leh ũ pu em u dōh kyrmen o."

"Da em hi kiwa oɲ ïa ɲa, kat tynne wa phōn o kyllēiñ kyllēiñ cha ki lok wa cha ki wa tipmit o. Em kiwa oɲ ïa ɲa ïow lithōh dawai na Mawbyrsiew. Em u wa ē dawai kynbat wa chyrkhei bha heitæ. Ŋa mut o'u oɲ ïa phi ïow lai lanɲ i cheitæ." Oɲ ko ïa ō.

Oɲ sa'u pa ko, "Lada kamtæ tæ, u lai i pyn mynstep na-oɲ."

"Bianɲ hi." Oɲ ko tæ ïēiñ wot ko, tæ da ïa ïēiñ ki pun-ar deptæ ïa hiar lanɲ ki cha kamra pdēiñ.

Ka Pynhun wa ka Salan dan chon ki ha trē lōm hajrōn mōsian harōd chnōn hei thaw wa la-ŋam. Ka sŋi da sdan ko u sep na khap ki khlō ki Kur Khynda. Lada pait ia i pyrthai myndær ha itæ i thaw tæ, i iōsuk da kut, tanwa sep ai itæ i miat i, hakhmat kini ki arŋut toh wa i pyrkhāt ki, da lai sadu cha ū Lamchwa donhi.

U Lamchwa du wa poi ha iun da kwah sum toh wa da mih chit ware u ynne. Da em ka um wa tu ka Salan tæ da khræh sum u. Ka Pynhun khut ko ka ka Salan iow lai lan wa ka. Lai ki khlem klam hadōh wa poi ki heini i thaw. Ka Salan da iō ko wa khia pyrkhāt ka Pynhun tæ suba ko wa da khor i kjut u sanpun ko.

Manda chon ki, khana ka Pynhun ia ka waroh. Khyrŋiat chwa ka Salan, neitæ iām ko, manda tip ko iei kjut u sanpun ko hadōh wa ka Pynhun leh da sōhiām bian ko.

Manda suki i iām ki punarŋut tæ kylli ka Salan ia ka, “Pha wan, kammon pyrkhāt pho u leh?”

“Iyi mut pho? Wow ieh o ō u sanpun pho kam heini i por? Wow kut i maia o du nei daw wa kjut u? Lada mut pho kamtæ, ũ pu sñiawthōh pho iei maia.” On ka Pynhun ia ka.

NAIT O...

Suki ka Salan chipor tæ oŋ ko, "Māp, koŋ ĩa ŋa, wa kylli o kamtæ. Ŋa ũ ĩē o'u mutdur ĩei jĩnim o khlem em u Sanpun. Ō ũtoh du u sanpun hi eh o, man u leh, kam u pa, u ma ĩoŋ ŋa, nadōh wa khlād u pa i. Ladam em sa ō, ŋa da sahwiar o."

Pait ka Pynhun cha ka tæ chynna hi ko ĩei wa daŋ em itæ i jinloŋ khynnah ha ka tæ oŋ ko ĩa ka, "Ham oŋ kamtæ, daŋ em ka bei pho wow pundæh pho. Ŋa sæ kawa da sahwiar. Nadōh wa khlād u pa, im o ĩow pynsakhiat ĩei ĩemphō ĩoŋ ō. Wom em u pyllai jinmut o cha ki chynraŋ toh wa kat kiwa chem o leh du kiwa duna hakhmat ĩoŋ ŋa. Toh du u sanpun pho, uwa ĩe u kyrsu ĩei maĩa ha mynsien ha nōd ĩoŋ ŋa. Lada ĩoh o dei sa, u sai o ki i kjut u, tæ u chim noh o ka cha ŋa. Ynne leh, ha mynsien o da pan o na'u Blai u chim u na ō tæ ē cha ŋa, taŋwa, ũ choŋ i bor ha i. Kamtæ, hap pdiaŋ i katwa ē uwa ē. Ŋa tæ da chaniah o sadu how Kynrad donhi, su hun katkam wa dakam."

"Toh hi, iwa oŋ phi." Oŋ ka Salan. "Lada bien sakhiat u Blai u ē ki cha ŋa."

Heitæ da choŋ ki suki næ deiwa pyrkhāt jar i pyrkhāt. Manda sdaŋ dōm i pyrthai tæ oŋ ka Pynhun ĩa ka, "Pi yn lai noh i."

Ka Pynhun dan lum iun ko ha kamra chet. Da on u Lamchwa ia ka u lai pyndep i kam ion ka cha NEHU tanwa on ko u lai ko hadien chi taiaw. U Marbod da li boh u ka ka Salan cha Nazareth ha Shillon toh wa da toh i por wow sdan klas noh ki mynstep. O leh datoh u joiñ kreh u mynkawi. Wom kwah ko'u lai, on ko, wa kwah ko'u emlan wow sanpun ko. Chrai u Lamchwa ka, toh u bien ko u lai ta iam ko. Phet ko cha thawthiah ko ta iam choh ko heitae.

Wan ka bei ko, ta chon ko hajan ko.

"Pait bei," on ka Salan ia ka, "u sanpun u em de u maia u ia na. Wom kwah u u pait o o tan heipor wakjut u leh." Iam khyrnan ko.

Sniawthoh hi ka bei ko iei jinlon khynnah ion ka ta klam ko ia ka deiwa jei nae, "Nait pho itae iwa on pho? Tip hi pho wa katwon maia u sanpun phi ia phi punarnut phi? Ia kiyi khih chitom u? Hadien wa khlad u pa phi, da mut o'u pyndam skur phi pynar, toh wom sniaw ie o samen u pusai phi. U sanpun phi wa khan ia na deiwa kular u u khih chitom nei bhah ionphi. Itae i por, o leh utoh wa da heh u, dan 13 snem hi eh u, chim u ka lynkor kawa khia deiwow em katae ka maiñ chynran iow pyndap pynbian ia phi wa ia na. Heipor kjut pho leh, o bait wa phet wa phar nei bynta ionpha, wa dohthiah

NAIT O...

dōhdem u, iow sumar ia pha."

Saneh ka bei u klam chipor tæ deiwa syrpōd ia ka klam bian ko: "Ap khon, nait iei wa oŋ u sanpun pho, lada bien phi u puræ bha u leh bha, iow iē phi u iēiñ ha ki iōŋphi da hi ki kjat, itæ donhi iwow pynkmen iow sanpun phi. Dieh li klam iow sanpun pho tæ khræh lai. Ham pynsñiawsih ia ō weiwa ham ē u sep-ai i maia u ia pha. Tip hi o, wa kwah pho u emlaŋ wow sanpun pho heipor wa kjut u, taŋwa, i puræ pho leh toh iwa thraŋ i, ŋa wow sanpun pho. Daw ioh hi pho u pait ō manda wan thōh dawai u, pha leh, wan hi cheini manda iohpor pho."

Manda dep klam ka bei ko ia ka, tæ da dam ko u iām, ieiñ tæ lai ko cha u sanpun ko.

U Lamchwa daŋ thiah ha thawthiah, lai kdup ko ō dei iām tæ oŋ ko, "Map ia ŋa sanpun! U lai puræ bait o, ũ sñiaw lā-nōd o'u ieh me kamni."

U Lamchwa leh wa um ki khmat. Sympōd u ka na khlieh tæ oŋ u, "Tip hi o doŋ, ŋa leh kwah hi o u em pho chirup wa ŋa. Taŋwa, kwah o u pyndep pho seini iwi i puræ, tæ lada iap o leh, dahun o. Daw wan pait hi i pha cheitai, u pundæh pho leh ha Shilloŋ hi u em u. Kamtæ, ham diaw ham tliaw, lada chem ne ũ iachem de i leh, em o wa pha chilynter ha mysien. Dieh, lai suk doŋ, i kyrkhu kyrdoh iōŋ

NAIT O...

ņa emlaņ ki wa pha, u Blai leh u emlaņ u wapha. Ri ģei akor i burom ka ģuņ ka sem kat cha wa lai wa wan pho." Doh u ka ha thņa tæ ka leh doh ka ō ha ņap u pynarliņ. Daņ dei sōhġām, mih ko na kamra thiah u tæ li khræh ko.

Chwa u mih ki na ģuņ, li klam bian ki ģa ō. Snēiņ kyntu u Lamchwa ģow Marbōd deiwa oņ ģa ō wow khih hok u hei kām i jām ģoņ ō wow syndoņ u leh ģei jġlloņ i akor ģoņ ō ģow neh i burom ka ģuņ ka sem. Ē poisa u ģa ō tæ oņ u, "Me sah noh cha Shilloņ myntu, neibhah me pun mynkawi da join kreh mi, tæ ģow ģoh mi u li thied li pet ģei wa emkam ka Salan mynstep."

Punarņut ki neh ki chislem heitæ. Ka Salan da sōhġām bian heitæ. U Marbōd leh da kai ki umkhmat toh wom sņiaw lā-nōd u u ich ģow sanpun u hei kġut. Taņwa oņ u Lamchwa ģa ki, "Phi ham khuslai nei bynta ģoņ ņa, katwa daņ ģē o, u lai u wan, u bam u dih, ka bei leh emlaņ ko wa ņa. Phi pyllai jġmūt ģei kām ģoņphi, i tæ donhi kwah o. Dieh lai phi kattu, ģa slem pathan phi. Lai suk." Pyllait wot u ki nei wa ģa kduņ ki.

Dep u Marbōd u kular wow wan pait ō man ka sņi saitġaiņ, ģa mih wot ki, ō wa ka Salan na ģuņ. Ka Pynhun da lai laņ wa ki hadōh surok hei thaw ģaņ kari ki.

Wan u ma Kianj wa ka Maïa ha ïonj ki ynne. Chonkē ki ha chynkōh deilanj wow Lamchwa wa ka Pynhun. Ka bei u Lamchwa danj khræh chā ko ïa ki. Ê u ma Kianj ki dawai wa rah ki na Mawbyrsiew ha'u Lamchwa katwa ka Maïa danj batai ïei rukom diha ha ò.

Sñiawŋōh u Lamchwa ïei kitkhia ïonj ki, tæ kular u ïow diha tikna ki kitæ ki dawai. Katwa danj ïa diha chā ki, khai syndet i ky'oh u tæ thæh ka chā u ha madan. Onj ki ïa ò u thiah dei thiah ïow rap arām i doha i pran u. Deiwa kwah u pynhun ïa ki, lai u cha thawthiah tæ thiah u. Ka Pynhun nanj chonlanj wa ò heitæ katwa ka bei u danjchonj parom wow ma Kianj wa ka Maïa ha chynkōh.

Manda liwan ki, ka Pynhun leh lai lanj ko wa ki. Onj ko wa emkām ko u leh *internet* ha komputor ka Maïa ha ïunj.

Ha kataæ ka miet, chonj ka bei u wa ò hadōh wa lai khmat u. ïa parom ki bōnjait. Ap ka bei u ïei wa klam u tæ ũ iē dē ko u kun ïei umkhmat ko. Onj u ïa ka, "Bei, iwa pān o na'u Blai, weiwa thranj o, da jan man hi ki, neibhah, ki diah ïonj ŋa da jan hoibru hi ki kattu. Bien ki sōw emsalon, itæ wot i wow pynhun sakhiat ïa ŋa. Lada ini i kjut ïonj ŋa toh i jŋsu neibynta i bha i miat ïonj ki, hun hi o u man i kamtæ.

ŊAIT O...

Tæ, neilian̄ iŋpha, bei, lada em iwa tamsnēiñ o ïa pha ha kini ki por wa dadep, lada em iwa pynsñiawsih o ïa pha, sñiawbha ham ksoh nōd ki, khnaŋ wow ioh o u lai suk cha wa em u pa, mynda toh i por o.”

“Khon,” oŋ ka bei u dei wa sōhīām, “Ŋa toh ka bei wa embhah tam, toh waïoh khon o kam me. Pyndap mi ŋa, dei kmen wei hun mynsien, iyi u ioh o, u sah nōd ïa me? Boi na ŋa sæ, wa em iwa pyndōh o me? Waroh chi kattu, jōh pan o na’u Blai u ē lad ïa ŋa u iō o ïa ki ksu o, chwa u chim u ŋa neini na pyrthai; ha kattu ka sŋi wan, oŋ o ïa ō, iow chīm u ïei jīŋim iŋ ŋa, ioh U U pyndap cha me. Ini waroh khon, choŋ heimon iŋ ō. ïei wom ïe i u kylla, to ē kti i cha Ō deiwa pdiaŋ ïei ni i kjut kam ka wow pynkhōid ïei mynsien iŋ i. Ŋa leh u ŋōh o nei bynta iŋ me, boi bien u Blai u ap ïa i.”

Em u Lamchwa samen ha thawthiah. Toh wa da wan ka Pynhun ynne i step, ka bei u da lai ko cha Jwai. On ko iow phah knia Mass ko nei bynta u Lamchwa ha u Phadar. Ka Pynhun dan li rah um ko.

Katwa dan boh ko ia ka um ha tyhkon, sniaw ko iei wa ky'oh u Lamchwa khlem saneh tæ lai ko cha thawthiah u. Chynna ko ieiwa kjut i rupai u weiwa da mih wa ki umkhmat u du na wa ky'oh. Mynda iō ko iei wa chitom u, kjut cha ka. Lai ko hajan u tæ sympōd ko iei ryhkhī wei rupai u, hei mut ko iow jem itæ i ky'oh u.

Manda wiar itæ i ky'oh u, pait u cha ka dei iō diaw iwa jōr. Chim u ia ki kti iōn ka tæ tan u ka iow chon hakhmat iōn ō hajron thawthiah. Syrpē u iow sniuh wei nāp ko dei wa sōhrkhai cha ka, tanwa i dur u dei diaw wei khia jinmut. Ka leh sōhrkhai ko ia ō tæ ksoh ko ia ka kti u kawa lait.

Hadien chibet, on u ia ka dei sur wa tlot, "Iwa bha dōh jan, ieh noh na." Dem u iei khlich chapoh.

Jubab ko ia ō dei sur wa khlan, "Ham klam kamtæ! Da tip hi mi, ū ieh o me, la kammon kammon leh!"

On u ia ka, "Wom sniaw pho iei wa on ka doctor? Sa katwon sni u im o?" Suki u chipor tæ klam bian u,

NAIT O...

“Iyi u ioh o’u ē ia pha? Lait nei kjut wei chitom?”

Jubab ko heitæ, dei sur wajem, “Ka bei o iap ko, hadien wa thiah kjut ko lē snem. Heitæ i por, ɲa daŋ khynnah o, taŋwa daŋ kynmō o ki hadōh katni. U pa o, ũ jōh ieh u ka ka bei hei por kjut ko. Ri u ka, sumar u ka, pynbian u leh ia ka wa ia ɲa nadoŋ chadoŋ. I hikai wa khrō tam ioh o na’u pa toh, i maia khlan bor i ban iei kjut.”

Oŋ bian u ia ka, “Ũ chynna pho wa ɲa u wa da dep iap? Ka mynried iōŋ pha daŋ iaŋ ko ia pha! I kām wa leh pho kordor i, ũ toh du ia pha, ia ki bru ka thaiñ iōŋ i leh kordor i hadōh kattæ kattæ! ɲa ũ iatoh o u ioh kat dapha! Pha, toh u ioh pho da’u wa em kyrdan, wa dap wa bian, ban ia ɲa!”

Iām ka Pynhun heitæ tæ oŋ ko deiwa iām khyrɲaŋ, “ɲa da maia o ia me khlem kyndon. Dathehlut o leh du ha me donhi. ɲa, ũ iē dē o u maia chawi, mynstep næ ha ka mynried leh!”

Nanjōr i iām ko heitæ.

Pait u Lamchwa cha ka tæ naŋluŋ chōh chōh i mynsien u. Chlai i maia u ia ka da kuɕ. Taŋwa ũ kwah u, u pynchitom sa ia ka leh. Ũ neh chah u u pait ieiwa iām ko leh.

Kamtæ, kduŋ u ka tæ oŋ u ia ka deiwa sympōd iow

NAIT O...

tymponj ko, "A! wamaia ionj na, map ia na wa pyniam o pha." Pait u cha jronj taen u, "A Blai! Ileh ia na kamni?" R'hip u ki khmat u taen toid ki umkhmat u la kam wa jo ki umslap na ka sla wanj.

Manda ien u u kun iei umkhmat u taen pyllait u ka nei wa kduj. Ksoh u ka pun-arlianj ki kti ko taen u ia ka, "Na sniaw wiarnar sniaw kutlad sanj o itaen, hadoh womtip de o, iyi u leh, iyi u onj, iyi u klam. Manda pyrkhat o ieibhah ionjpha, kjut nod o da kut. Kwah o'u im tymmen chirup wa pha, iow ioh i'u pait iei heh iei san ki khon ki ksu ionj i. Tanjwa, i mon u Blai, onj i deiwi. Sniaw kut lad sanj o itaen, tanjwa, du i em pha wa na heini leh, pynim ko iei kyrmen ionj na. Du pha donhi wa man kam utaen u tyllan, wa ksoh ia na nei hap o heini i thlu. A! Lada bien u Blai u ap iei duwai i!"

Heitaen onj ka Pynhun ia o, "Na leh danj em i kyrmen o, dadap thoh lad o na *internet* taen chem o wa em uwi u stad saian wa hikai pyn ha NEHU hi uwa puran bniah wei leh *research* ia ka *cancer* deiwa pynemkam da ki kynbat wa em heini ha ri Khasi-Pnar ionj i. Chem o leh wa waroh ki stad saian ka pyrrhai khein ki o kam uwi na ki nonjalalam ha kani ka lain *research*. Dep puran o leh iei wa thoh ki chaphanj ionj o. Onj ki, wa pyndep u ia ka PhD ionj o na pharaen hapoh le snem donhi. Bon ki ri wa khut ia o iow kreh wa ki, tanjwa kynteit u iei taen waroh toh kwah u u chakri ia ka ri ionj o hi. Mut o'u onj ia

NAIT O...

me, wa u lai iachem o wa ō, taŋwa, chwa u lai o,
kwah o'u iathoh chonkurim noh i."

U Lamchwa naŋ pait wei ky'i katwa daŋ klam ko,
taŋwa mynda poi chei wa kut i klam ko, khyrŋiat u
wa oŋ ko kamtæ tæ pait bēij u cha ka khlem tip dē
u klam. Manda pai u u klam tæ kylli u iā ka, "Ileh
kwah pho'u chonkurim wow wa dadep iap?"

Dem ka Pynhun ha rupai iōŋ ō tæ oŋ ko, "Ŋa, da dep
o'u raikut du ha me donhi. Kamtæ, kwah o'u ioh ki
khon na me iow pyntŋen ki iā ŋa ha wom em dē mi
heini."

I sawa ka waje Anjelus daɲneh ha lyer katwa daɲ psiah u Lamchwa wa ka Pynhun ha pchem ka Parish. U Phadar Joakim daɲchoɲ emkām u hapoh ka ophis Parish kawa em ha khap ĩunmane. ĩō u ĩeiwa poi ki ha dwar tæ khut u ki chapoh.

“Psiah, psiah.” Oɲ u ĩa ki. Psiah wot ki tæ ē khublei kti ki ĩa ō pun arɲut ki. Phah choɲ u ki tæ kylli u, “Iyi emkām phi?”

Heitæ khana ka Pynhun ĩa ō ĩei eh ĩoɲ ki waroh. U Phadar Joakim dap u dei wyr-ai nei bhah ĩoɲ ki pun arɲut katwa daɲ ap u ĩeiwa khana ka Pynhun. Hciwa khatdōh oɲ ka Pynhun ĩa ō, “Ŋa samen, da raikut o i maĩa ha u Lamchwa donhi. Kamtæ, kwah o leh u ĩoh ka pateiñ na ō hi wot. Oɲ ki doktor wom im slem dē u neibhah i kjut ĩoɲ ō. Kamtæ, kwah i u iathoh choɲ kurim noh myntu hi wot ĩoh u im i kām chi kurim kat daɲneh ki sɲi ĩoɲ ō. Lait neitæ, ɲa chaniah o hei mon ĩoɲ u Blai donhi.”

U Phadar, choɲ pyrkhut u chipor tæ oɲ u ĩa ki.

“Ŋa, womjōh chem o, kamni i man hei r’ta ĩoɲ ɲa. Hei sakhiat, chwa u iathoh choɲkurim, emkām i u pyntip paidbah hadōh lē sien khnaɲ wow tip i boi em ki daw kiwow khaɲ ĩa phi arɲut u iachoh kurim. Tanɲa, manda ap o, ĩei eh ĩoɲphi, ka Balan leh

ŊAIT O...

sñiawlem ko ïei wa chem phi kam kani ka eh ka chitom. Kamtæ, ŋa leh, kam u Pa-mynsien ïonphi, sñiawsuk, sñiawkmen o wa wən khana phi ïa ŋa chwa wow chim phi ïa kani ka rai. Tæ, phi wan noh mynkawi, ha ka sñi saitjaiñ, rah laŋ wa ki sakhi ïon phi khñan wow pyndep i ïa kani ka kām hakhmat u bru u Blai. Ŋa leh, daŋ hāp pan bor o na u Bishop ïon i ïow ē u ka bor kyrpan wow pyndep o ïa kani ka kām khōid kām kyntaŋ ïon phi.”

Katwa daŋ ap ki ïeiwa klam u Phadar, dap i mynsien ki dei kyrmen wei kmen. Manda kut i klam u tæ on ka Pynhun, “Khublei chibōn, Phadar, wa ē mynsien phi ïa i. Na khap ki ly’oh wadōm, i klam ïonphi man ki kām ki kjatsñi wa ē kyrmen ïa i.”

“To, khon. Ham jōh dōh kyrmen.” Jubab u Phadar ïa ka dei sōhrkhai. “U Blai ũ jōh ieh u ïa ki khon ïon ō. Kwah u leh u dap ki dei kmen borabor. Lai suk.”

Heitæ ē khublei kti biaŋ ki ïa ō tæ lai wot ki cha iun.

Hapoh iunmane, da em lan ka bei u, ki diah u, arɣut ki paralok ka bei u na chnoŋ, u ma Kian, ka Maia wa sa lɛŋut ki paralok iorŋ ō na chnoŋ. Wan u phadar hakhmat ka duwan tæ sdaŋ u ia ka lehniām ka riti.

U Lamchwa da dep u chim ia ka smai tæ ka Pynhun dap ko dei sñiawkhia weikmen katwa daŋ smai ko deini i kyntien, “Ŋa ka Pynhun Kharsyntiew, chim o ia me u Lamchwa Lyŋdoh, iow man mi u kurim iorŋ ŋa nadōh myntu hadōh waiaŋ, la hei duk hei suk næ heikjut i chitom, lada dōh laioh leh.”

On sa u phadar, “Hawa da iaŋaitlan phi hakhmat ka Balan, to U Blai U kyrkhu U iei ni i ia monjur iorŋ phi wow pyndap ia phi leh dei kyrkhu iorŋ Ō. Neitæ i daw, u bru ũ hoi u pyniakhlād u ia kawa da pyniasohlan da U Blai.”

Manda dep ki u iakhlai ki jubanlak wei ia pyndēiñ ‘sahkti kylliaŋ, duwai u phadar kamwa san minit hadien wa dep ki u duwai ia ki jinɖuwai ki ruŋait. Pynkut u phadar da kini ki kyntien: “Kattæ, a Blai Trekirod, kyrpad i dei leh rit hakhmat iorŋ Me: to ē wa kini ki khon iorŋ Me, u iaineŋ ki ha ka jinŋait wow ri syndon ki ia ki hukum iorŋ Me; ē iow iaineŋ ki hei man chitylli ka pran wa ka mynsien, wow paw u chynna ki ha ka burom ka akor. Pynkhlan ia ki da ki kyntien iorŋ Me, iow man sakhiat ki, kitæ ki

ŊAIT O...

sakhi iōŋ u Khrist hakhmat ka pyrthai waroh kawi. Ē iōw man ki, ka iūŋ ka sem, iōw roi iōw par ki parum pareh, hajār thyndāi, iōh ki khon ki kti ki, u kdup iā ka burom iōŋ ki. Ē u bit u bian ki, iōw iōh ki ka ja-ka dakha, iōw phōh ka loŋbru manbru. Ē leh u im choŋprah choŋchan ki, khnaŋ wow poi ki chirup wa ki wamaia iōŋ ki u bam kwai ha iūŋ Blai iōŋ Me. Hei pyrtuit hei nām u Khrist u Trekirod iōŋ i. Amen.”

Ha kataē ka janmiet, khawai u ma Kian iā ki ha iūŋ iōŋ ō. Da khut u leh iā ki jan iūŋ jan sem u wa ki kur wa ki lok u Lamchwa na chnoŋ u. Kataē ka sŋi toh kawa kmen tam iā ka Pynhun wow Lamchwa.

Hadien chitaïaw, lai ka Pynhun cha NEHU. Psiah ko ha ka Department ion̄ ka Biochemistry tæ thōh ko ïa ka kamra u Dr. Khrawkupar Nongsiej, utæ u saïantis wa pawnam.

Choh ko ha dwar tæ sñiaw ko em kiwa on̄ "*Come in*" napoh tæ wai dwar ko iow psiah. Khyrñiat ko u iō da'u Bah-heh wa chon̄ heitæ. Ō leh khyrñiat u la kam wa iōh tdon̄ psciñ, u iō ka heitæ.

"Ani! Ka Pynhun! Phi poiwir kumno shane?" Klam u ïa ka dei ion̄ khynriam.

"Ani! Ko Bah-heh! Ngan lah mutdur shaei, ba phin dei maphi uta u Dr. Khrawkupar!" Jubab ka Pynhun ïa ō.

"Phin bna shaei ïa kum ma ngi! Tang ka kyrtiang ruh phi tama rat!" Klam noh u ïa ka dei ktien chnon̄ ion̄ ki toh ō leh uwa na ka thaiñ Mawkyrwat.

Ka sien nyn̄kon̄ wa ïachem ko wa ō toh ha Youth Centre ha Shillon̄ hei por wa man ka Freshers Meet ion̄ ki West Khasi Hills Students' Union. Waroh waroh ki khut ki ō u Bah-heh næ. Ō toh u *Senior* ion̄ ki wei man u leh u President kataæ ka seiñ heitæ i por. Heitæ kynmō ko wa dajōh thoh chithi u ïa ka tan̄wa ũ em u jubab ko. Bōn hi kiwa thoh chithi

NAIT O...

khynrō cha ka tanwa ū em u jubab ko tan kawi leh.

“To, iathuh ia ŋa, kumno phi wan poi shane.” Kylli u ia ka.

Noh mynsien ka Pynhun tæ oŋ ko ia ō, “I lok jong nga i ioh jingpang Lung cancer. Ki doktor ki ong ba un ym im slem shuh. Nga sngew kut lad haduh katta, kumta, nga wan sha phi da kaba kyrmen ba phin sngewbha ban iarap ia ŋi.”

Sñiaw phylla u, u tip wa da ioh kurim ko næ, wei waïoh u leh kam kataæ ka kjut. Oŋ u ia ka, “Kumno phi wan poi sha nga? Nga, ngam dei u nonsumar ia kiba pang!”

“Nga tip ia katta.” Oŋ ko ia ō. “Hynrei, nga tip ruh ba phi la jop bha ha ka *research* jongphi shaphang kane ka jingpang, bad nga ngeit skhem ba phi lah ruh ban pynkoit ia ka. Nga ong ia kane namarba nga la dep pule ia ki Paper jongphi baroh kiba la mih ha ki *Journal* bad nga tip ba tangphi hi, ba lah ban iarap ia ŋi.”

“Kumno, ka lah ban long kumta?” Kylli u ia ka. “Nga leh research tang halor ki khnai! Haoïd, nga la lah ban pynkoit ia ki khnai, tangba, ban pyrshang ha ki briew ka long be-aiñ dang mynta. Nga hap ban phah shwa ia ka formula jong nga sha ki Lab kiba leh ia kine ban leh ia kaba ki ong ka ‘Drug Testing’

NAIT O...

bad ka 'Clinical Trial' bad kan shim por ym duna ïa ka khatsan snem ban pynlait paidbah ïa kane ka dawai. Te, kumno ngan lah ban ïarap ïa phi?"

Jubab ka Pynhun, "Nga tip ïa kata ruh. Tangba, u lok jong nga un ym lah ban ap haduh khatsan snem. U lah ban ïap ha kano kano ka por!"

Sōh ïam ko katwa dan klam ko. "Ngim don por ban ap! Nga dem ha sla kjat jongphi bad nga kyrpad ïa phi, sngewbha seh, ai ïa ka dawai jongphi ba ngin pyrshang. ngan ym ïathuh ïano ïano ruh ba phi ai kata ka dawai ïa nga. Ngan bynda da ki jaka ki puta jong nga baroh ban siew ïa phi, katba phi pan."

Sai ko ïei tana ïon ka na bēk tæ njam ko ïei umkhmat ko.

U Dr. Khrawkpar da pait cha ka dei chonj pyrkhath chislem næ. Ìēiñ u neiwa chonj tæ lai u hajan ïon ka. Pait u cha ka tæ onj u, "Pynhun, ngan ïarap ïa phi tang lada phi leh ïa nga kawei ka kam."

"Nga kloï ban leh katba phi ong, lada phi treh ban ïarap ïa u lok jong nga." Smat ko u jubab ïa ò.

Heitæ, klam u jei næ, "Pynhun, phi tip ba nga la ïapmat ïaphi, naduh kato ka por ba nga ïakynduh ïaphi ha kato ka Freshers Meet. Nga la tyrwa ruh haphi, ha kata ka por, ïa ka jingicid jong nga lyngba

ŊAIT O...

ka shithi. Mynta ruh, nga dang don ka jingieid ïa phi, nga shait kynmaw ïa phi man ki por. Te, lada phi treh ban pynhun ïa nga, kum u shynrang ban poikha bad phi tang shisien ruh, ngan ai ïa phi kata ka dawai kaba phi kwah eh."

Pait ka Pynhun cha ò dei wom sñiaw ŋait ïeiwa da ap i chkōr ko, ïeiwa da klam u itæ wot. Sñiaw ko la kam ka mrad wachah kset hapoh tharu.

Mar syn poi ko ha iun u Lamchwa, da sai ko ia kitæ ki dawai wa ē u Dr. Khrawkupar ia ka. Dep thied ko leh ia ki siriñ (thyrnia siam dawai) na dukan dawai ha Jwai.

Dep ko u khleh ia kitæ ki dawai kamwa da batai u Dr. Khrawkupar ia ka, pyndap ko ia utæ

U Lamchwa da riñ mysien ionheh tæ pynchkæh u katwa dang siam ka Pynhun u thyrnia injek dawai ha ka thied snam heh ion ō. Pait u cha ka tæ iō pher iō phylla u, iei dur i dar ion ka.

Ka Pynhun da dep u injek iei dawai iwa da ē u Dr. Khrawkupar ia ka, tæ da sai iow thyrnia. Pait ko cha ō tæ iō u kamwa than ion i dur ko.

HADIEN 3 SNEM

I por kattæ da jan sep ka sñi. Emlaŋ ki waroh ha lōm jįntep, ka bei u Lamchwa wa ka Salan daŋ pynchna ĩa ki syntu hajroŋ jįntep katwa u Marbōd daŋ thaŋ ĩa ki mombati tæ pynĳeiŋ u ki deiwa ĩō ryntih.

Ka Pynhun daŋ ĩaleh ko u synjre ĩa'u khon ĩoŋ ka uwa daŋ 2 snem, wa daŋ ku u hajroŋ jįntep ĩow lehke.

"Kitbok!" Oŋ ko ĩow khon ko, "Hiar pynsmat neitu! Læ heini!"

Heitæ oŋ u khon ko, "Papa! Papa!"

Waroh ki heitæ da khyruiŋ cha wa pait u. ĩō ki ĩow Lamchwa uwa dei sōhrkhai lai u cha u khon tæ chim u ō ha kti. Waroh ki dei ĩōkmen i dur ki heitæ.

Kylli ka Pynhun ĩa ō, "Īleh slem phi?"

"Wa su poisa ki dkhar ynne tæ li ē chwa o ka cha u ma Kiaŋ ha ĩuŋ u." Pait u cha ka bei u tæ oŋ wan u, "To, sdaŋ noh i meitæ."

Sdaŋ ki u ŋōh Blai heitæ i jįntep u pa ki. Ynne da dap 18 snem i ĩap u.

NAIT O...

Katwa dan liwan ki cha iun na lōm jingtep, ka Pynhun pynwandur bian ko iei wa da dep jia 3 snem nachwa ha kamra u Dr. Khrawkupar.

Khyrnat ka Pynhun wei sñiaw kulmar jingmut ko heipor wa on u, u pynhun ia ō. Sñiaw kynchiñ ko iei tæ wa dawa u na ka. Sñiaw kwah ko leh nadōh mynsien, u ioh ia itæ i dawai na ō, iwa kyrmen ko'u pynchait iow Lamchwa. Suki ko chipor deiwa pyrkhat kammon u leh.

Khatdōh, ieiñ ko tæ pait ko ō markhmat tæ klam ko, "Ngam shym poi pyrkhat ba phin long kumne. Nga wan da ka jingthmu ka babha. Pleng! Phi pat phi don jingmut da kaba sniew! Ngan ym treh ban leh ia kane ka pop, da lei lei ruh em!" Lai wot ko cha dwar iow mih neitæ.

Da poi ko ha dwar tæ on u, "Pynhun, ap khyndiat," tæ sañeh ko.

Klam bian u, "Nga shu kwah ban tynjuh ia phi. Nga tip mynta, ba phi ieid hok ia la u tnga bad ia u Blei ruh. Ale, wat sngew ei ci, shong biang hangne."

Lai chon bian ka Pynhun ha chuki deiwa sñiaw iynsur i mynsien. U Dr. Khrawkupar da lai u cha wa em ka frij tæ dei wa sai u chabi na kata, wai u ka tæ sai u ia ar tylli ki klon khian. .

NAIT O...

Ē u kitæ ki klon ha ka tæ on u ia ka, "Kaei kaba nga leh mynta, ka long be-aiñ. Phi dei ban tip ia kane. Tangba, namar jongphi bad u lok jongphi, ngan ai ia phi kine ki dawai ba nga la *extract* na u Kseh Blei bad u Lynñiang. Phin shim ia kine da ka jingkitkhlich lajong, namar ngam tip kumno kan trei ha u briew. Nga la dep kheiñ ia ka *dosage* tangba ngam tip thikna haduh katno ngi lah ban ai ia u briew. Nga ruh nga don ka jingngeit ba namarba ki dei ki dawai kynbat, kin ym ktah eh ia ka met u briew. La katta ruh, ngim dei ban kheiñ sting ia kane."

Sangh u chipor tæ kylli u ia ka, "Phi don briew shatei ba nan ban injek?"

Jubab ko ia o. "Haoid, nga ruh nga nang. Nga la ju trei kum ka volunteer ha ki *immunisation program* ha ki thaiñ jong ngi mynshuwa bad nga la dep ia ki training halor kane." Heitæ da iō kmen i dur ko.

"To, ka bha eh kumta." On u. "Shim 2 ml na kane ka bitor ba nga la thoh 'Kseh Blei' bad 4 ml na kane kaba la thoh 'Lynñiang'. Milai lang ia kine bad injek ha u thied snam man la ka 12 kynta. Lada phi lap ba don ki *side effects* kumno kumno ruh, sangh noh ban ai bad pyntip sha nga. Ynda la jan lut kine, sa wan biang shane ba ngan ioh ai shuh shuh ia phi." Ē u kitæ ki klon dawai ha ka tæ chim ko ki.

NAIT O...

"Khublei shibun eh Bah-heh." On ka ia o. "Ngam tip, kumno ban siew kylliang iaphi, ngan iai duwai ha u Blei ba phin long u ba jop ha baroh ki kam jongphi bad ba un phah ruh ia ka briew kaba lah ban ai jingkmen ia phi."

"To Pynhun, ia phi ruh khublei, na ka bynta ki jingduwai jongphi. Tangba, ngam tharai ngan ioh ia kaba kum ma phi. Nga dang ieid ia phi mynta ruh bad nga bishni ia u lok jong phi. Te, map ia nga ba nga tynjuh ia phi, ngan ym lah ban ieid ia kawei pat kumba nga ieid ia phi, hynrei phim dei kata ka bynta jong nga. U Blei U la thoh ia kane bad nga pdiang ia katta. Khie, katta, donbok ba u lok jongphi un koit noh khnang ba phin dap da ka jingkmen."

Da sōhrkhai ka Pynhun ia o tæ tia ko hajan u tæ doh ka o ha nap u. On ko, "Nga tip, ba phi long u briew uba bha, hynrei, ngam lah ban ieid ia phi ha kano kano ka rukom lait tang kum ka para jong phi. Nga sngew iaphi la kum u hynmen lajong bad phi la pynshisha ia kane da kaba phi kloi ban iarap ia nga. Nga kyrmen skhem ba phin lap ia kata kaban ieid ia phi kumba phi mon."

"Em, Pynhun." On u ia ka. "Nga la sangeh ban wad naduh ba nga la iakynduh bad phi. Mynta, ka kam jong nga dei ka baieid jong nga. Ia, ngin leit dih sha lang ha *canteen*."

NAIT O...

Sōhrkhai ko heitæ tæ sñiawñōh sakhiat ko ïa u Dr. Khrawkupar wa da bien u u ïarap ïa ki. Chwa u mih ko na *canteen*, da oŋ ka ïa ō: “Nga ngeit skhem ba phin shem ïa kaba u Blei u la mang ïa phi.”

Sōhrkhai u ïa ka tæ oŋ u, “*Bye, see you soon.*”

Waroh ki bru da sñiaw phylla ki wa kammon lait u Lamchwa na kam kani ka jait kjut. Kam wa iō ki toh kiwa iōh kjut *cancer* du kiwa iap bait hapoh 5 snem kamtæ.

Wat ka doktor Wanniang leh phylla ko u pait ha ki X-RAY iōŋ ō wa dajan wiar itæ i kjut u. Da khana hi ka Pynhun ia ka, daŋ ha kini wot ki sŋi, wa dih laŋ u wei kynbat pnar wei tæ i dawai wa ē u Dr. Khrawkupar.

Oŋ ka Dr. Wanniang ia ka, "Kani toh ka kamphylla! Kawa leh kyrpaŋ u Blai ia phi!"

U Lamchwa hadōh katni ki por leh, ũ iē u u oŋ na iyi i daw wa sdaŋ ka kjut u u wiar. Na ki dawai doktor mo, na ki dawai kynbat mo, na ki dawai u Dr. Khrawkupar mo, næ dei wa iakrehlaŋ ki mo. Ka bei u leh, nadōh kitu hi ki por wa tip ki iēi kjut u, da lai bait ko man ka taiaw cha Jwai iōw phah kñia Mass ha u Phadar wei duwai ko leh kut jait ki jingduwai Nobena. Kamtæ, ŋait u, wa kini waroh toh ki jingkyrkhu iōŋ u Blai Trekirod.

Ka Pynhun da pyndep ko ia ka PhD iōŋ ka. Da iōh ko leh u hikai ha ka Department of Environmental Science ha NEHU.

NAIT O...

U Dr. Khrawkupar da dep u iakular ktien wa ka Maïa. Ar snem chiteiñ nachwa, ia pyntipmit ka Pynhun ia ki hei por wa lai lan ka Maïa wa ka ha lab ion o iow lithoh bian ia ki dawai u Lamchwa.

Jia sakhiat iwa on ko ia o, hawa san ka Maïa u lai lan wa o. Ka Maïa leh da pyndep ko ia ka PhD ion ka. Em jinmut ko u leh ia ka Post Doctorate cha ri Finland.

U Marbod leh da jan san u ka ion o hi ka Accounting Business. Ka Salan wan, dan du wadep ko ia i puræ nos ko, da join kreh wot ko ha Nazareth Hospital.

Kamtæ, waroh ki dap ki dei sniawnoh iow Blai katwa dan psiah ki ha iunmane ha katae ka Sni U Blai. Choñ lan ki hakhmat doh.

U Lamchwa dem khyrsu u tæ deiwa sniawnoh iei wa e lad u Blai ia o u dan im ha pyrthai, san u u duwai, "Nait o..."

--- Da Kut ---

Chaphan u nonthoh

U Dkhar Rinson Maikhæl Buam toh u khon wa lê (na ki 11 nüt) ion u Ma Denis Dkhar (Bam kwai ha ion u Blai) wa ka Kon Sumer Sisilia Buam. I chnon trê ion ô toh na Jong-U-Shen ha ri lôm War-Jaintia. Pyndep u ia ka Matrik na Holy Cross School, Silchar (Assam) wa ka P.U. (Science) na G.C. College (Silchar). Da pyndep u wan iei puræ BSc wa ka DCA na St. Anthony's College, Shillong wa ka Red Hat Certified Engineer (RHCE) na Venus Technology Park, Bangalore.

Da jôh hikai skur u ha Shillong, Sawsymer, Mawsynram wa ha Mawkynrew. Ila u snem 1998, kreh u ha North Eastern Hill University (NEHU) kam u *Research Fellow* ha ka North Eastern Biodiversity Research Cell kamwa 8 snem. Ha kitæ ki snem, da em ki jinthoh (*Paper*) wa da pynmih laŋ u wa ki para-nonkreh kiwa da mih ha ki kot "Biodiversity:North East India Perspectives" wa ka "Ecologist Asia". Ila kijôh hi ki snem da em bynta u ha ki projek wa pynmih ia ki *report* "Meghalaya Biodiversity Strategy and Action Plan", "Conservation and Sustainable Utilization of Medicinal Plants in Meghalaya", "Master Plan for Community based Conservation and Commercialization of Medicinal and Aromatic Plants of North East Region of India" wa ka "Gender Analysis of Local Health Tradition and Practitioners of Meghalaya" Iadien wa iehnoh kam u na NEHU ha u snem 2005, wan seiñ u ia ka kompani ion ô hi, ka TechLife ha lawmusiang, Jwai.

Ka TechLife toh ka kompani kawa chakri hei iatoh wa ki kor komputer, nadôh i dai wei chna wei hikai hadôh ki kam taip kot, prin wei pynchna dur-neh (*graphics*) wa ki dur-im (phlim). Ka TechLife man ko leh, ka kompani kawa da pynmih pynchna chibôn ki dur-im (phlim) ion pnar wei ion war.

Katni, man u, u *Director* iong ka TechLife wei man u leh uwi na ki *Director* wa seiñ ia ka kompani *Picturewave Production* kawa kreh hei lian ka *Media Technology*. Man u leh u Vice Chairman (Meghalaya Chapter) ka North East Film Producers & Directors Association wei man Member u ha ka Signis India North East.

U Ma D. R. Maikhæl Buam katni choŋ-wai u ha Lômpariat, Ladthadlaboh, ha Jwai chirup wa ka kurim u wa ki khon ki lê nüt.

Nait o... is the story of Lamchwa who had to shoulder responsibility of his mother and younger siblings at an early age owing to the death of his father in a mining accident. By dint of his honesty, grit and hard work, he rescues his family from the grips of poverty. A woman, he is irresistibly attracted to, enters his life and he falls in love with her. But unexpected and unbelievable events shatter his dreams of a perfect world and pushes everyone connected to him in turmoil...



Dedication

This book is dedicated
to my parents:

Mrs. Sumner Sistha Guam
and
(Late) Mr. Denis Dkhar.